


RA'ME'R RAJYABHISEKA



OR

১৪৮২

CORONATION OF RA'MA.



BY

SASI BHUSAN CHATTOPA'DHYAYA.

— ০০০ —

FORTH EDITION.

CALCUTTA.

PRINTED AT THE NEW SCHOOL-BOOK PRESS.

10, Crouche's Lane, St. Jame's Square.

1873.

রামের রাজ্যাভিষেক।



শ্রীশশিভূষণ চট্টোপাধ্যায় প্রণীত।



চতুর্থ সংস্করণ।



কলিকাতা।

কুউচেস্ লেন, ১০ নম্বর ভবনে

নূতন স্কলবুক যন্ত্রে

মুদ্রিত।

সংখ্যা ১৯২০।

সিদ্ধাপিন ।



প্রায় দুইবৎসর অতীত হইল, আমি রামের রাজ্যাভিষেক লিখিতে প্রবৃত্ত হই। কিন্তু এতদিন নানা কারণে, বিশেষতঃ শরীর নাতিশয় অসুস্থ হওয়াতে ইহা মুদ্রিত করিয়া উঠিতে পারি নাই। এইক্ষণে ইহা মুদ্রিত ও প্রচারিত হইল। ইহা কোন গ্রন্থবিশেষের অনুবাদ নহে। ভবভূতি-প্রণীত বীরচরিত ও মুরারি-মিশ্র-কৃত অনর্ঘরায়ব হইতে, ইহার প্রথম, দ্বিতীয়, ও তৃতীয় পরিচ্ছেদ সংগৃহীত। অবশিষ্ট সমুদায় অংশ রামায়ণের পূর্বকাণ্ড অবলম্বন করিয়া লিখিত হইয়াছে। রামচন্দ্র যেরূপ অলৌকিক গুণগ্রামসম্পন্ন ছিলেন; লক্ষ্মণের যেরূপ অনন্যসাধারণ ভ্রাতৃভক্তি, ও সীতার যে প্রকার অসামান্য পতিপরায়ণতা গুণ ছিল; তাহাতে এরূপ গ্রন্থে তৎসমুদায় সূচাক্রুরূপে লিখিয়া উঠা, কোন প্রকারেই সম্ভব নহে। যাহা হউক, যদি মহাদয় পাঠক-বর্গ, রামের রাজ্যাভিষেকের কোন অংশ পাঠ করিয়া, তৃপ্তি লাভ করেন, তাহা হইলেই পরিশ্রম মার্ধক্য, বিবেচনা করিব। ইতি।

১৩ ই আশ্বিন
সংবৎ ১৯২৬
কলিকাতা

শ্রীশশিভূষণ শর্মা ।



রামের রাজ্যাভিষেক ।



৩৮৮২

প্রথম পরিচ্ছেদ ।

একদা রাজা দশরথ রাজ্যাসনে আসীন হইয়া, অমাত্যবর্গের সহিত অবিচলিতচিত্তে রাজকার্য্য পর্যালোচনা করিতেছেন, ইত্যবসরে প্রতiharী আসিয়া কৃতাজলিপুটে নিবেদন করিল, মহারাজ ! মহর্ষি বশিষ্ঠদেবের আশ্রম হইতে সংবাদ লইয়া বামদেব মুনি আসিয়াছেন । দশরথ শ্রবণমাত্র আশ্চর্য্যে পুলকিত হইয়া কহিলেন, ত্বরায় তাঁহাকে বিশ্রামভবনে লইয়া যাও । আমিও তথায় চলিলাম । অনন্তর তিনি সভাভঙ্গ করিয়া মুনিদর্শনমানসে বিশ্রামভবনে প্রবেশ করিলেন ।

বামদেব বিশ্রামভবনে প্রবিষ্ট হইয়া আসনপরিগ্রহ করিলে, রাজা প্রণিপাত-পূর্ব্বক জিজ্ঞাসা করিলেন, ভগবান্ বশিষ্ঠদেবের কুশল ? কেমন নিয়ম কার্য্য নিৰ্ব্বিঘ্নে সম্পন্ন হইতেছে ত ? কোন স্থাপদ ত তপোবনের বিঘ্ন উৎপাদন করে নাই ? বামদেব পুণ্য-প্রণয়ের কুশলবার্তা বিজ্ঞাপন করিয়া কহিলেন, মহারাজ ! আপনি অধীশ্বর থাকিতে আমাদের তপোবিঘ্নের সম্ভাবনা কি ?

দশরথ প্রজাপালনসমূহ স্বকীয় প্রশংসাবাদ শ্রবণ করিয়া প্রীতি-প্রকল্লবদনে কহিলেন, ঋষে ! কুলগুরু বশিষ্ঠদেবের আজ্ঞা-সুবত্তী হইয়া প্রজাপালন করিতে করিতে আমি বার্কক্যাদশায় উপনীত হইয়াছি তথাপি যে ভগবান্ এখনও আমাকে অনুশাসন করিয়া পাঠানু; ইহাতেই বোধ হয়, আমার উপর তাঁহার সবিশেষ কৃপাদৃষ্টি আছে। বামদেব কহিলেন, মহারাজ ! ঋষিরা সমপক্ষ-পাতী হইলেও পাত্রবিশেষে তাঁহাদের স্বাভাবিক চক্ষুঃপ্রীতি জন্মে। মহর্ষি রঘুকুলের সাধারণ গুরু; কিন্তু তিনি আপনাকে যেরূপ স্নেহ করেন, অপর কাহারও প্রতি তাঁহার তাদৃশ স্নেহভাব লক্ষিত হয় না।

দশরথ শুনিয়া হর্ষপ্রকাশ পূর্বক জিজ্ঞাসা করিলেন, মহাশয় ! ভগবান্ বশিষ্ঠদেব আমাকে কি আদেশ করিয়াছেন ? বামদেব কহিলেন, মহর্ষি বশিষ্ঠদেব সাদর ও সস্নেহসম্ভাষণ পূর্বক আপনাকে কহিয়াছেন, নিরন্তর যাগাদি সংকর্ষের অনুষ্ঠান দ্বারা দীনদরিদ্র-দিগের অভিলাষ পূরণ করাই রঘুবংশীয়দিগের প্রধান ধর্ম। অতএব যিনি যখন বাহা প্রার্থনা করিবেন, তাহা যেন অবিলম্বে সম্পাদিত হয়। দেখিবেন, যেন অর্থিজনের প্রার্থনা অসম্পূর্ণ থাকে না। দশরথ শুনিয়া কহিলেন, ভগবানের এই অনুশাসনে সাতিশয় অনু-গৃহীত হইলাম। তাঁহার আদেশ আমার শিরোধার্য্য। আমি কায়-মনোবাক্যে তদীয় আজ্ঞা প্রতিপালনে যত্নবান্ হইব। কখনই ইহার অন্যথা হইবে না।

উভয়ের এইরূপ কথোপকথন হইতেছে, এমন সময়ে প্রতী-হারী সহসা তথায় উপস্থিত হইয়া বিনয়নব্রবচনে নিবেদন করিল, মহারাজ ! ভগবান্ কুশিকনন্দন দ্বারদেশে অবস্থান করিতেছেন। দশরথ শুনিবামাত্র সাতিশয় ব্যগ্রচিত্ত হইয়া কহিলেন, প্রতীহারিন্ !

সত্ত্বর তাঁহাকে এখানে আনয়ন কর । প্রতীহারী শুনিয়া, তথা হইতে প্রস্থানপূর্বক, পুনরায় বিশ্বামিত্র-সমভিব্যাহারে তথায় উপস্থিত হইল । দশরথ দেখিবামাত্র, সহর্ষে ও সমস্ত্রমে আসন হইতে উত্থিত হইয়া, গলগলীকৃতবাসে মহর্ষিচরণাবুজে প্রণিপাত করিলেন । বিশ্বামিত্র চিরং জীব বলিয়া, হস্ত তুলিয়া আশীর্বাদ করিলেন । অনন্তর তিনি আসনে উপবিষ্ট হইলে, রাজা কৃতজ্ঞলিপূর্বক অতিবিনীতভাবে তদীয় আগমনের কারণ জিজ্ঞাসা করিলেন । বিশ্বামিত্র যথোচিত সম্ভাষণ করিয়া কহিলেন, মহারাজ ! ত্রতবিদ্বেষী নিশাচরগণের উপদ্রবে যাগাদি পুণ্যকর্ম কিছুই হইতেছে না । প্রায় প্রতিদিন ছুরাচার রাক্ষসেরা যজ্ঞস্থলে উপস্থিত হইয়া পূর্ণাহুতি-প্রদানকালে অন্তরীক্ষ হইতে রুধিরধারাবর্ষণ করিয়া থাকে । তাহাতে আরক্লষজসমাপ্তির বিঘ্ন অন্তরায় উপস্থিত হইয়াছে । আপনি ত্রৈলোক্যের অভয়দাতা, বিপন্নের আশ্রয়, এবং রাজ্যের অধিপতি ; এই হেতু আমি আপনার নিকট সাহায্যপ্রার্থনা করিতে আসিয়াছি । তাহাতে আমরা পুণ্যকর্ম সকল নিরাপদে সম্পন্ন করিয়া উঠিতে পারি, আপনি তাহার উপায়বিধান করুন । কিন্তু নিশাচরেরা বেরূপ দুর্দাস্ত ও দুহৃদয়, তাহাতে উহাদিগকে দমন করা রাম ভিন্ন অন্য কাহারও সাধ্য নাই । অতএব যজ্ঞরক্ষার্থে কতিপয় দিবসমাত্র রামচন্দ্রকে আমাদের আশ্রমে সশস্ত্র কালযাপন করিতে হইবে । এক্ষণে আপনি রামকে আমার সহিত পাঠাইয়া দিউন ।

রাজা মহর্ষিবাক্য শ্রবণ করিয়া, ক্ষণকাল নিশ্চেষ্টভাবে মৌনাবলম্বন করিয়া রহিলেন । পরে দীর্ঘনিঃশ্বাস পরিত্যাগ পূর্বক মনে মনে কহিতে লাগিলেন, আমি যে বংশে জন্মগ্রহণ করিয়াছি, তাহা

নিষ্কলঙ্ক ও চিরবিশুদ্ধ । কএক দিবস প্রাণাধিক রামচন্দ্রকে না দেখিয়া আমার মনে যৎপরোনাস্তি কষ্ট হইবে বটে, কিন্তু আমি যদি এক্ষণে মহর্ষির অভিনাবপুরণে অসমর্থ হই, তাহা হইলে নিশ্চয়ই আজি আমা হইতে সেই চিরনির্মল রঘুবংশ অতিথিপ্রত্যাখ্যানরূপ দুরপণেয় পাপপঙ্কে মগ্ন হইবে ; এবং আমা হইতেই এই জগদ্বিখ্যাত রঘুকুল-গৌরব একবারে অন্তমিত হইবে ! ইহাও আমার জীবনধারণ অপেক্ষা যত্নাই শ্রেয়ঃ । এইমাত্র ভগবান্ বশিষ্ঠ-দেবও আজ্ঞা করিয়া পাঠাইয়াছেন, কখন যেন অর্থি জনের প্রার্থনা বিফল না হয় । বোধ হয়, এই কারণেই ভগবান্ জ্ঞানময় চক্ষুঃ দ্বারা অগ্রে জানিতে পারিয়াই আমাকে আদেশ করিয়া পাঠাইয়াছেন । অতএব যেমন করিয়া হউক, অদ্য আমাকে মহর্ষির বাসনা পূর্ণ করিতে হইবে ।

মনে মনে এইরূপ স্থির করিয়া, দশরথ সন্নিহিত পরিচারক-দ্বারা অবিলম্বে তথায় উপস্থিত হইবার নিমিত্ত রাম ও লক্ষ্মণকে ডাকিয়া পাঠাইলেন । অঙ্গকালের মধ্যে তাঁহারা তথায় উপস্থিত হইলে, রাজা উহাদিগকে লইয়া সাক্ষাৎসম্মুখে মহর্ষিহস্তে সমর্পণ করিলেন । বিশ্বামিত্র তাঁহাদিগকে সঙ্গে লইয়া হৃষ্টচিত্তে তপোবনাভিমুখে গমন করিলেন, এবং দুই দিবস পথে অতিবাহন করিয়া পরিশেষে, তৃতীয় দিবসের অপরাহ্নসময়ে স্বীয় আশ্রমে উপস্থিত হইলেন ।

এই সময়ে ভগবান্ মরীচিমালী স্বীয় ময় খমালা একত্রিত করিয়া, প্রিয়সহচরী ছায়ার সহিত অন্তর্গিরিশিখরে অধিরোহণ করিলেন । পশ্চিম দিক্ যেন আক্লাদে বিচিত্র লোহিতাস্বর পরিধান করিয়া দিনকরের অভ্যর্থনায় স্নসজ্জীভূত হইল ।

ক্রমে কুমুদিনী-বিয়োগ-কাতর ভগবান্ চন্দ্রমা উদয়গিরির অন্ত-
 রাল হইতে স্বীয় মনোরম মূর্তি প্রদর্শন করিতে লাগিলেন । সায়াং-
 সময় উপস্থিত দেখিয়া, মহর্ষি সাদরসম্ভাষণে কহিলেন, বৎস রাম !
 বৎস লক্ষ্মণ ! তোমরা কএক দিবস অনবরত পথপ্রমেসাতিশয়
 কাতর হইয়াছ ; অতএব অদ্য উত্তমরূপে প্রাপ্তি দূর কর ।
 এই কথা কহিয়া, সমিহিত শিষ্যের প্রতি তাঁহাদের আতিথ্য-সৎ-
 কারের ভার্যাপণ করিয়া, স্বয়ং সায়াংকালীন সন্ধ্যাবন্দনাদি করিবার
 নিমিত্ত তথা হইতে চলিয়া গেলেন । রামলক্ষ্মণও তাপস-তরুমূল-
 স্থিত শিলাতলে কিয়ৎকাল বিশ্রাম করিয়া পরে, 'তপোবন-সমুত্ত
 কন্দমূলকলাদি পরম পুখে আহার করিলেন ; এবং কুটীরাভ্যন্তরে
 পত্রাসনে শয়ন করিয়া বামিনীষাপন করিলেন ।

প্রভাতে উভয়ে কুটীর পরিত্যাগ করিয়া, যথারীতি প্রাতঃ-
 কৃত্য সমাপন করিলেন । অনন্তর, রাম মহর্ষির যজ্ঞদর্শনমানসে লক্ষ্ম-
 ণকে কহিলেন, বৎস ! চল, যজ্ঞস্থলে উপস্থিত হইয়া মহর্ষির পাদ-
 পদ্মদর্শনে আত্মাকে চরিতার্থ করা যাউক । এই কথা কহিয়া, রাম
 সশস্ত্র হইয়া অগ্রে অগ্রে এবং লক্ষ্মণ শিষ্যের ন্যায় তাঁহার পশ্চাৎ
 পশ্চাৎ গমন করিতে লাগিলেন ।

কি প্রাতঃকালে, কি মধ্যাহ্নকালে, কি সায়াংকালে, সকল সম-
 য়েই তপোবনের অপূর্ণ শোভা হইয়া থাকে । কোন স্থানে ললিত-
 লতাগৃহের চারি দিকে মধুলোলুপ অলিকুল গুণ গুণ রবে এক পুষ্প
 হইতে পুষ্পান্তরে বসিয়া মধুপান করিতেছে ; কোথায় অনতি-
 দীর্ঘ আশ্রমপাদপ-শ্রেণী রসালকলতরে অবনত হইয়া, যুগ্মমুগ্ধ সমী-
 রণে ঈষৎ কম্পিত হইতেছে, তাহাতে বোধ হয় যেন, তরুবরেরা
 সমীপবর্তী ক্ষুৎপিপাসাতুর পথিকজনকে আহ্বান করিতেছে ;

কোন স্থানে নির্ঝল-সরোবর-সলিলে কেলিপর মরালকুল জলকেলি করিতে করিতে, স্নানমুখী সরোজিনীকে দিনকরের শুভাগমনসংবাদ দিবার নিমিত্তই যেন তৎসকাশে উপস্থিত হইতেছে, এবং প্রভাকরের প্রিয় করসমাগমে বিকসিত কমলিনী, আহ্লাদে ঈষৎ কম্পিত হইয়াই যেন মধুব্রতসমূহকে সাদরসম্ভাষণে আহ্বান করিতেছে ; কোথাও হোমগৃহের পূর্বভাগ হইতে অনর্গল ধূমপটল উখিত হইয়া গগনমার্গ স্পর্শ করিতেছে, এবং পবিত্র গন্ধবহ হোমগন্ধ বহন-পূর্বক আশ্রমের চারিদিক আমোদিত করিতেছে ; কোন স্থানে মৃগকদম্ব শ্যামল দুর্বাদল ভঞ্জন করিতে করিতে নিরাতকে ইতস্ততঃ চরিয়া বেড়াইতেছে ; কোথাও বা ঋষিকুমারেরা সমিৎ কুশাদি আহরণ করিয়া এক মনে পুষ্পচয়ন করিতেছেন, এমন সময়ে মৃগশাবকেরা সহসা তথায় উপস্থিত হইয়া লক্ষ্য প্রদান পূর্বক উহাদের পৃষ্ঠদেশ হইতে কুশাদি ভক্তের চেষ্টা করিতেছে ; কোন স্থানে শুকমুখভট্ট শ্যামাকতগুলকণা তরুতলে পড়িয়া রহিয়াছে, আর বায়সেরা উহা ভঞ্জন করিতেছে ; কোথাও মদমত্ত শিথিকুল প্রস্থানিত কদম্বতরুশাখায় কলাপবিস্তারপূর্বক নৃত্য করিতেছে, এবং মদকল কোকিল প্রভৃতি বিহঙ্গমগণ কাকলীস্বরে গান করিতেছে ।

রাম প্রভাতকালে তপোবনের অনুপম সৌন্দর্য্যসন্দর্শন করিয়া হর্ষোৎকল্লনয়নে গদগদবচনে কহিলেন, লক্ষ্মণ ! তপোবনের যে দিকে দৃষ্টিনিষ্ক্রেপ করি, সেই দিকই চিত্ত আকর্ষণ করে । যাহার চিত্ত নিরন্তর শোক ও তাপে দগ্ধ হইতেছে, যে ব্যক্তি জন্মাবধি মনের স্রুথ কাহাকে বলে জানে না, তপোবনে প্রবেশ করিলেই অচিরে তাহার চিত্তবৃত্তির ঈশ্বর্য্য সম্পাদন হয়, হৃদয় শান্তিসলিলে অবগাহন করিতে থাকে ; এবং অন্তঃকরণে অভূতপূর্ব আনন্দরসের

সঞ্চার হয়। বৎস ! দেখ, দেখ, কেমন সিদ্ধাশ্রমের হোমধেতু শাস্তভাবে অমৃতময় দুগ্ধ প্রদান করিতেছেন। উহার ঐতিস্মিক দুগ্ধধারাদ্বারা আশ্রমের চারিদিকে ব্যাপ্ত হইতেছে। লক্ষ্মণ অন্যত্র দৃষ্টি সঞ্চালন করিয়া কহিলেন, আর্য্য ! এ দিকে দেখুন, কেমন ঐ পুণ্যাত্মা ঋষিগণ বেত্রাসনে উপবিষ্ট হইয়া সর্বলোকপিতামহের ন্যায় উদাত্তাদিস্বরে বেদপাঠ করিতেছেন। আহা ! উহারা যেমন স্বভাব-সৌম্যমূর্তি তেমনি ছুরবগাহগম্ভীরপ্রকৃতি। দেখিলেই বোধ হয়, যেন উহারা দয়া ও ক্ষমাগুণের আধার, জগতের মূর্তিমান পুণ্যরাশি, এবং সদগুণের আশ্রয়। রাম কহিলেন, লক্ষ্মণ ! ও দিকে দেখ, কেমন ঐ তরুণবয়স্কা ঋষিকন্যারা স্ব স্ব সামথ্যাকুরূপ সেচনকলস কক্ষে করিয়া আশ্রমতরুমূলস্থিত আলবালে জলসেচন করিতেছেন, আর ঐ জলবেগী আলবালমধ্যে কেমন ধীরে ধীরে গমন করিতেছে। আহা এ স্থানটী কি রমণীয় !! বোধ হইতেছে যেন তরুবরশ্রেণী রুজ্জুবলয়ে বিভূষিত হইয়া মুনিকন্যাগণকে শিরঃ-কম্পনস্থলে কৃতজ্ঞতা-সূচক সাদরসম্ভাষণ করিতেছে।

লক্ষ্মণ যাইতে যাইতে অন্যদিকে অঙ্গুলিনির্দেশ করিয়া বিস্ময়াকুলিতচিত্তে সহাস্যবদনে কহিলেন, আর্য্য ! এদিকে অবলোকন করুন, কি চমৎকার ব্যাপার !! ঋষিরা দেবান্ননার নিমিত্ত যে সমস্ত তণ্ডুলাদি উপকরণসামগ্রী আহরণ করিয়াছিলেন, অবসর পাইয়া হরিণেরা অশঙ্কিতচিত্তে তৎসমুদায় ভক্ষণ করিতেছে, আর ঋষিপত্নীরা ব্যাকুলান্তঃকরণে যষ্টি উত্তোলন পূর্বক বারম্বার উহাদিগকে তাড়াইবার চেষ্টা করিতেছেন ; কিন্তু তাহাতেও হরিণেরা ভীত না হইয়া কেবল উহাই খাইতেছে, আর এক বার গ্রীবা উন্নত করিয়া মুনিপত্নীদিগের হস্তস্থিত উজ্জ্বলদুগ্ধ আশ্রাণ করিতেছে ; তদু-

শীনে ক্রমাবৃত্তি ঋষিগণ কেবল উচ্চৈশ্বরে হাস্য করিতেছেন ।
ওদিকে দেখুন, বজ্রবেদির অদূরে যুগশিশু সকল কেমন নির্ভয়চিত্তে
অনন্যমনে কুসুমকুমার তাপসকুমারদিগের হস্ত হইতে নীবার
গ্রহণ করিয়া আস্তে আস্তে চৰ্চণ করিতেছে । আৰ্য্য ! সম্মুখে দৃষ্টি-
পাত করুন, তপোধন-বালকেরা পিপীলিকাদিগের আহারার্থ চতু-
র্দিকে শ্যামাকতগুলকণা স্থাপন করিতেছেন, আর পিপীলিকারা ঐ
সকল মুখে করিয়া শ্বেণীবদ্ধ হইয়া, কেমন আশ্রমপথের উপর দিয়া
গমন করিতেছে । আহা ! ইহাতে আশ্রমপথের কি রমণীয়
শোভাই হইয়াছে । বোধ হইতেছে, যেন পথে কে পত্রাবলী চিত্রিত
করিয়া রাখিয়াছে । অহো ! তপোবনের কি মাহাত্ম্য । বোধ হয়
এখানে মূর্ত্তিমতী শান্তিদেবী সাক্ষাৎ বিরাজ করিতেছেন । যাঁহার
প্রভাবে হিংসা, ভয় ক্রোধ, ঘেঁষ প্রভৃতি অসৎপ্রবৃত্তির লেশমাত্র
নাই । তাহা না হইলে আমরা অপরিচিত ; আমরাদিগকে দেখিয়া
ভীরুস্বভাব যুগজ্ঞাতি কখনই চিরপরিচিতের ন্যায় এক্রূপ নির্ভয়চিত্তে
ইতস্ততঃ বেড়াইতে পারিত না । ফলতঃ তপোবনের ষাছা কিছু
সকলই অদ্ভুত ও অলৌকিকপ্রীতিপ্রদ ।

উভয়ে এইরূপে তপোবনের বিহারভূমিতে ভ্রমণ করিতেছেন,
এমন সময়ে ভগবান মরীচিমালী গগনমার্গের মধ্যস্থলে উপস্থিত
হইয়া প্রচণ্ড অংশুজাল নিক্ষেপ করিতে লাগিলেন । তখন রাম
উর্দ্ধে দৃষ্টিপাত করিয়া, কহিলেন, বৎস ! আমরা মনোহারিণী তপো-
বনশোভা সন্দর্শন করিতে করিতে একবারে এক্রূপ সংজ্ঞাহীন হইয়া
ছিলাম, যে মধ্যাহ্নকাল উপস্থিত হইয়াছে, কিছুই জানিতে পারি
নাই । এক্ষণে আর বিলম্ব না করিয়া, ভগবান্ বিশ্বামিত্রের সমিহিত
হই, চল । লক্ষ্মণ দূর হইতে দৃষ্টিপাত করিয়া হর্ষোৎফুল্লহৃদয়ে কহি-

লেন, আৰ্য্য ! ঐ দেখুন, ভগবান্ কুলপতি দীক্ষিতবেশপরিগ্রহ করিয়া এদিকেই আগমন করিতেছেন । রাম দেখিয়া সহর্ষে কহিতে লাগিলেন, যিনি জ্ঞানময় নেত্রদ্বারা ভূত ও ভবিষ্যৎ বর্তমানের ন্যায় দর্শন করেন, এবং তপঃপ্রভাবে দ্বিভুবনের ষাণ্ডীয়া সামগ্রী সম্মুখস্থিত পদার্থের ন্যায় দেখিতে পান, ষাঁহার হৃদয়-দর্পণে সমস্ত-জগৎই নিরন্তর প্রতিফলিত হইয়া থাকে, সেই তাসপশ্রেষ্ঠ মহর্ষি কৌশিক দ্বিতীয় ভাস্করের ন্যায়, প্রজ্বলিত দীপসমষ্টির ন্যায়, তেজঃপুঞ্জে অলিত হইয়াই যেন কি ভাবিতে ভাবিতে আমাদের নিকট আগমন করিতেছেন । আহা ! মহর্ষিকে দেখিবামাত্রই বোধ হয়, যেন পরমযোগী ভগবান্ ভবানীপতি অবনীতে অবতীর্ণ হইয়া দুষ্কর তপস্যায় ব্রতী হইয়াছেন । বৎস ! মহর্ষি সন্নিহিত হইয়াছেন ; চল, ঐ ন্যগ্রোধতরুতলে যাইয়া উহার সহিত সাক্ষাৎ করা যাউক ।

অনন্তর তাঁহারা তথায় গমন করিলে, মহর্ষি আসিয়াসমুপস্থিত হইলেন, এবং রামদর্শনে বিপুলহর্ষলাভ করিয়া কহিলেন, বৎস ! তোমরা রাজপুত্র, নিরন্তর রাজভোগে কালযাপন কর । আমাদের এই অকিঞ্চিৎকর তপোবনভূমি কি তোমাদের চিত্তবিনোদনে সমর্থ হয় ? কেমন, তপোবনে আসিয়া তোমাদের কোন প্রকার অপুথ হয় নাই ত ? রাম কহিলেন, ভগবন্ ! তপোবনের যে কি মাহাত্ম্য, তাহা এক মুখে বর্ণন করিয়া শেষ করা যায় না । তপোবনদর্শনে যে ব্যক্তির মন মুগ্ধ না হয়, জগতে এক্রূপ লোক অতি বিরল । বস্তুতঃ ধরাতলে তপোবনের ন্যায় রমণীয় স্থান আর নাই ।

রাম এই বলিয়া বিরত হইতেছেন, এমন সময়ে সহসা যজ্ঞবেদী-সমীপে মহান্ কলকল শব্দ উপস্থিত হইল । কোলাহলের কারণ

কি, জানিবার নিমিত্ত সকলে সেই দিকে দৃষ্টিপাত করিলেন ; দেখিলেন, কৃতান্তের সহধর্মিণীর ন্যায় বিকটমূর্ত্তিধারিণী পাপীয়সী শুল্কেশ্বরিন্দিনী সুবাহু ও মারীচ নামে পুত্রদ্বয় সমভিব্যাহারে যজ্ঞস্থলে উপস্থিত হইয়াছে, এবং অনবরতরুধিরবর্ষণে যজ্ঞীয় অগ্নিকুণ্ড-নির্কানের উপক্রম করিতেছে । তদর্শনে বিশ্বামিত্র রামচন্দ্রকে সম্বোধন করিয়া সসন্ত্রমে কহিলেন, বৎস ! শুল্কেশ্বরভার্য্যা তাড়কা সপুত্রে আমাদিগের বৈদিককার্য্যের বিঘ্ন বিঘ্ন জন্মাইতেছে । অতএব সত্ত্বর চাপগ্রহণ করিয়া, উহার নিধনসম্পাদন কর । রাম শুবনমাত্র সাতিশয় রোষপ্রকাশপূর্ব্বক ভীষণ শরাসনে শরসঙ্কান করিয়া তদভিযুখে ধাবিত হইলেন । কালের করালদণ্ডের ন্যায় তদীয় দিব্যাস্ত্রপ্রহারে তাড়কা ও রাক্ষসচমুনায়ক সুবাহু ভূতলশায়ী হইল । তাড়কার নিধনে লক্ষাপতি দশামনের অখণ্ড প্রতাপ খণ্ডিত ও অচলা রাজ্যলক্ষ্মী কম্পিত হইল; এবং ইহা হইতেই রাক্ষসগণের ভাবী পরাজয়ের সূত্রপাত আরম্ভ হইল ।

বীরকুলধুরন্ধর রামচন্দ্র রাক্ষসসেনা সংহার করিয়া, প্রসম্মমনে মহাবীৰ্য্যসমীপে উপস্থিত হইলেন ; এবং প্রগাঢ়ভক্তিসহকারে তাঁহার চরণারবিন্দে অভিষাদন করিলেন । বিশ্বামিত্র রামদর্শনে হর্ষাতিশয় প্রদর্শন পূর্ব্বক, স্নেহভরে তাঁহাকে আলিঙ্গন করিলেন; এবং নিজ পবিত্র হস্ত দ্বারা তদীয় জয়লক্ষ্মীলাঙ্ঘিত কলেবর অবমর্ষণ করিয়া স্মিতমুখে কহিলেন, বৎস ! অদ্য তোমার বাহুবলপ্রভাবে ত্রাতবিদ্বেষী দুই নিশাচরদিগের দর্প খর্ব্ব হইয়াছে । এক্ষণে আমি যজ্ঞবেদি বিঘ্নবিরহিত, তপোবন সমুৎসাহিত ও আত্মা কৃতার্থ বিবেচনা করিতেছি । কিন্তু যে পর্য্যন্ত আরক যজ্ঞশেষ না হয়, তদবধি তোমাকে এই স্থানে অবস্থান করিতে হইবে । এই কথা কহিয়া তপোধন

তথা হইতে প্রস্থান করিলেন । রামও মহর্ষিবাক্য শিরোধার্য্য করিয়া অল্পকালমধ্যেই তাহার অনুগমন করিলেন ।

যথাকালে যজ্ঞ নির্ব্বিঘ্নে সম্পন্ন হইলে, কালত্রয়দশী ভগবান্ মহর্ষি সহর্ষে মনে মনে কহিতে লাগিলেন, তাড়কা সৰ্ব্বদেবে নিধন-প্রাপ্ত হইয়াছে । দেবতাদিগের তৃপ্তিজনক যজ্ঞোৎসাহও সূক্ষ্ম হইল । এক্ষণে বাহ্যতে রামচন্দ্র হরধনু ভঙ্গপূর্ব্বক, মৈথিলীর পাণি-গ্রহণ করিয়া দুর্দান্ত রাবণাদি বধরূপে দেবকার্য্যে দীক্ষিত হন, অগ্রে তাহার উপায় উদ্ভাবন করা আবশ্যিক । এইরূপ চিন্তা করিয়া তিনি, রামকে সম্বোধন পূর্ব্বক কহিলেন, বৎস ! রাক্ষসগণের উপদ্রব-বিরূপে আমরা দিগের যজ্ঞ নির্ব্বিঘ্নে সূক্ষ্ম হইল । কিন্তু নিশাচরেরা আমার চিরন্তন-প্রিয়সুহৃদ সীরধ্বজ-নৃপতির আরদ্ধবাগানুষ্ঠানের বিরূপ অবস্থা ঘটাইয়াছে, তাবিয়া কিছুই স্থির করিতে পারিতেছি না ।

রাম শুনিয়া কৌতূহলাক্রান্তচিত্তে কহিলেন, ভগবন্ ! আপনি ত্রিভুবনচূর্ণিত প্রিয়সুহৃদশব্দে যে মহাত্মার নামোচ্চারণ করিলেন, এই নৃপতি কে ? বিশ্বামিত্র কহিলেন, বোধ করি, তোমার মিথিলা নগরীর নাম শুনিয়া থাকিবে । এই রাজর্ষি তথাকার অধিপতি । ইহার অন্যতর নাম রাজা জনক । ইনিই মহর্ষি যজ্ঞবল্ক্য হইতে ব্রহ্মসংহিতা শিক্ষা করিয়া পরমযোগী হইয়াছেন । সম্প্রতি মিথিলেশ্বর এক যজ্ঞ আরম্ভ করিয়াছেন । তথায় আমাদেরও নিমন্ত্রণ আছে । অতএব কল্য নিমন্ত্রণ রক্ষার্থে আমি মিথিলায় গমন করিব ; তোমাদিগকেও সঙ্গে লইয়া যাইব ।

রাম সহর্ষে ও সুবিস্ময়ে কহিলেন, ভগবন্ ! শুনিয়াছি, জনক-রাজত্ববনে, অদ্ভুতাকার হরধনু ও বিশ্বম্ভরাদেবীপ্রসূতি অগস্ত্য-সম্ভবা কন্যা, এই আশ্চর্য্যদ্বয় বিদ্যমান আছে । বিশ্বামিত্র মহাত্মা-

বদনে কহিলেন, বৎস ! তুমি যাহা বলিলে তাহা সত্য । আবার মিথিলেশ্বর এই প্রতিজ্ঞা করিয়াছেন, যে ব্যক্তি সেই হরকাম্বুকে গুণারোপণ করিয়া আপনার প্রভুত গুণগরিমা দেখাইলে সমর্থ হইবেন, তাঁহাকে সেই অগর্ভমন্ডবা কন্যা প্রদান করিবেন । রাম লক্ষ্মণের প্রতি আনন্দ-পরিপূর্ণ দৃষ্টিনিক্ষেপ করিয়া কহিলেন, লক্ষ্মণ ! অনেক দিন অবধি হরপাণিপ্রণয়ি শরাসনদর্শনে আমার কৌতূহল জন্মিয়াছে । মহর্ষিও সঙ্গে লইয়া যাইবেন কহিতেছেন ; অভাব কল্য আমরা মিথিলায় গমন করিব ।

দ্বিতীয় পরিচ্ছেদ।



পরদিন, বিশ্বামিত্র রাম ও লক্ষ্মণকে সমভিব্যাহারে লইয়া মিথিলাভিমুখে যাত্রা করিলেন ; এবং দ্বিতীয় দিবস মধ্যাহ্নসময়ে তথায় উপস্থিত হইয়া দেখিলেন, রাজা জনক অতি মহৎ যজ্ঞ আরম্ভ করিয়াছেন । কোন স্থানে শত শত পরিচারকেরা ঘৃতপূর্ণ হেমকুম্ভ হস্তে করিয়া দণ্ডায়মান রহিয়াছে, কোথায় নানা দিগ্দেশাগত নিমজ্জিত ব্রাহ্মণগণের পরম্পর শিষ্টালাপে যজ্ঞভূমি কোলাহলময় হইতেছে, কোন স্থানে ঋষিগণ বিবিধ রত্নাসনে উপবিষ্ট হইয়া ধর্মশাস্ত্রের আলোচনা করিতেছেন, কোথায় কিকরেরা রাশি রাশি যজ্ঞীয় দ্রব্যসামগ্রী মস্তকে করিয়া যজ্ঞবেদির নিকট গমন করিতেছে ; বেদির উপরে আচার্য্যেরা উচ্চৈঃস্বরে মন্ত্রোচ্চারণ পূর্বক প্রজ্জ্বলিত ছত্ৰাশনে সকল যুতাহতি প্রদান করিতেছেন । ফলতঃ যে দিকে দৃষ্টি নিক্ষেপ করা যায়, সর্বত্রই যজ্ঞসংক্রান্ত মহা সমারোহ ভিন্ন, অপর কিছুই লক্ষিত হয় না ।

এইরূপে তাঁহারা কোতুহলাক্রান্তচিত্তে যজ্ঞসমৃদ্ধিদর্শন করিতেছেন, ইত্যবসরে রাজা জনক, রাজপুরোহিত শতানন্দ ও অন্যান্য আত্মীয়বর্গের সহিত তথায় আসিয়া উপস্থিত হইলেন ; এবং পরম সমাদর প্রদর্শন পূর্বক তাঁহাদিগকে যথাস্থানে লইয়া গেলেন । তথায় সকলে উপবিষ্ট হইলে, রাজর্ষি তপোবনের কুশলবার্তা জিজ্ঞাসা করিয়া হর্ষেৎফুল্ললোচনে সম্বন্ধকরপুটে নিবেদন করিলেন,

ভগবন্ ! ত্রিভুবনচূর্ণিত অমৃত প্রাপ্ত হইলে অন্তঃকরণে যে রূপ আনন্দোদয় হয়, চিরপ্রার্থিত প্রিয়সমাগমে যে প্রকার সুখানুভব হয়, তদ্রূপ অদ্য ভগবদর্শন লাভে আমার অন্তরে অভূতপূর্ব সুখ-সঞ্চার হইতেছে ; সর্বাবয়ব যেন পীষ্মরূপে আশ্রুত হইয়া আসিতেছে । এক্ষণে বিবেচনা করি, আপনার শুভাগমনে আমার যজ্ঞ নির্মিষ্টে সুসম্পন্ন হইল ।

বিশ্বামিত্র মিথিলেশ্বরের ঈদৃশ ক্ষুণ্ণিতমুখ শিষ্টাচার পরম্পরা শ্রবণে অপারিসীম হর্ষলাভ করিয়া স্মিতমুখে কহিলেন, সখে ! আপনার ন্যায় রাজর্ষি আমাদিগের কখন নয়নগোচর হয় নাই । আপনি ত্রিভুবনসাক্ষী ভগবান্ তাক্ষরের অনুশিষ্য, মহর্ষি ষাঙ্ক-বল্ক্যের শিষ্য, সাক্ষাৎ ধর্ম্মের অবতার, ও ব্রহ্মতত্ত্বের মর্ম্মজ্ঞ । অতএব আপনার নিমিত্ত প্রার্থয়িতব্য আর কিছুই দেখিতেছি না । তবে এইমাত্র প্রার্থনা করি, আপনি অচিরে যামাতৃমুখাবলোকন করিয়া সফলপ্রতিজ্ঞ হউন । শ্রবণমাত্র রাজা কহিলেন, ভগবন্ ! আপনার এতাদৃশ অনুগ্রহাতিশয়ে কৃতার্থ হইলাম । ঋষিবাক্য কখনই অন্যথা হইবার নহে । অতএব নিশ্চয়ই জানিলাম, তনয়ার পরি-
ণয়োৎসব অচিরে সুসম্পন্ন হইবে ।

রাজা জনক এই কথা বলিয়া বিরত হইতেছেন, এমন সময়ে সহসা তাঁহার চক্ষুঃ রামের প্রতি পতিত হইল । তিনি রামের মোহনমূর্ত্তি অবলোকন করিয়া, সবিস্ময়ে মনে মনে কহিতে লাগিলেন, আহা ! একরূপ রূপল্যাব্ধের মাধুরী ত কখন নয়নগোচর হয় নাই । যেমন অসামান্য সৌম্যাকৃতি, তেমনি অলৌকিক গম্ভীর-প্রকৃতি । বোধ হইতেছে, যেন ভগবান্ নারায়ণ বৈকুণ্ঠধাম পরি-
ত্যাগ পূর্ব্বক জুভারহরণের নিমিত্ত ধরাতলে অবতীর্ণ হইয়াছেন,

অথবা স্বভাব-চঞ্চলা কমলার অন্বেষণে পৃথিবীতে পরিভ্রমণ করিতেছেন। নতুবা মনুষ্যালোকে একরূপ অসামান্যরূপসম্পন্ন পুরুষ কখনই দৃষ্ট হয় না। বিবেচনা করি, বিধাতা জগতের তাবৎ সৌন্দর্য্যরাশি একত্রিত করিয়া ইহার মুখচন্দ্র নির্মাণ করিয়াছেন। তাহা না হইলে, পৃথিবীতলে সকল সৌন্দর্য্যের একত্র সমাবেশ কিরূপে সম্ভবিত্তে পারে।

এইরূপ বলিতে বলিতে রাজর্ষির মুখমণ্ডল আচ্ছাদে অপূর্ব্ব-শ্রীধারণ করিল। তখন তিনি পুনরায় কহিতে লাগিলেন, জগতে এক পদার্থ বারংবার দেখিলে কখন তৃপ্তিকর হয় না। কিন্তু আশ্চর্য্য এই, ইহাকে যতবার দেখিতেছি ততই যেন আমার দর্শনপিপাসা বলবতী হইতেছে। এইমাত্র কহিয়া পুনঃ পুনঃ রামের আপাদমস্তক নিরীক্ষণ করিতে লাগিলেন।

অনন্তর এ বালকটী ঋষিপুত্র কি কোন রাজর্ষির তনয়, এই সন্দেহ উপস্থিত হওয়াতে, তিনি পুনরায় ভাবিতে লাগিলেন, ইহার সবল শরীরকান্তি, আজামূল্যিত বাহ্যুগল, প্রশস্ত ললাটদেশ, ঈষৎ বন্ধিম জন্মুগ্ধ, বিশাল লোচনদ্বয়, অপারিসীম-সাহসপূর্ণ মুখশ্রী এই সকল দেখিয়া, ইহাকে কখনই ঋষিতনয় বলিয়া বোধ হয় না। বোধ করি, ইনি কোন রাজর্ষির পুত্র। নচেৎ, ঋষিতনয় হইলে কখনই বামহস্তে কার্ধ্বক, পৃষ্ঠদেশে তুণীর, এবং দক্ষিণ হস্তে বীরচিহ্ন অসিলতা ধারণ করিতেন না। বাহা হউক, মহর্ষিকে জিজ্ঞাসা করিয়া সন্দেহ অপনয়ন করি।

মনে মনে একরূপ কহিয়া, তিনি বিশ্বামিত্রকে সম্বোধন পূর্ব্বক কহিলেন, ভগবন্! এ ছুটী বালক কে? ইহার কোন মহাত্মার পুণ্য-পরিণাম এবং কোন বংশের সুকৃতি-পতাকা। বিশ্বামিত্র অভিপ্রেত

সিদ্ধির অবসর বুঝিয়া সহর্ষে কহিলেন, রাজর্ষে! ইহারা ককুৎস্থ-
কুলপ্রদীপ কোশলাধিপতি রাজা দশরথের তনয়। ইহাদের
একের নাম রাম, অপরের নাম লক্ষ্মণ।

মহর্ষির বাক্য শেষ হইতে না হইতেই, শতানন্দসাতিশয় হর্ষ-
প্রকাশ পূর্বক কহিলেন, ভগবন্! পূর্বে শুনিয়াছিলাম, রাজা দশ-
রথ মহর্ষি ঋষাশৃঙ্গের রূপায়, চারিটি পুত্র লাভ করেন। ইহারা
সেই ঋষাশৃঙ্গের চরুপ্রসূতি, কোশলেশ্বরের তনয়? অহো! নৃপতি
কি পুণ্যাত্মা! না হবে কেন, ক্ষীরসাগর ব্যতিরেকে চন্দ্রকৌস্তভের
উৎপত্তি কি অপর কোন স্থানে সম্ভব হয়? ভগবন্! ইহাদের
মধ্যে কোন্টি রাম, কোন্টি লক্ষ্মণ।

বিশ্বামিত্র রামের প্রতি অঙ্গুলি নির্দেশ করিয়া, সপ্রশ্রয়ে কহি-
লেন, রাজা দশরথ যে চারিটি পুত্ররত্ন লাভ করেন, তন্মধ্যে রাম
সর্বজ্যেষ্ঠ ও লক্ষ্মণ তৃতীয়। রাম তাড়কাকালরাত্রির প্রত্যাষস্বরূপ,
সুচরিতকথার অদ্বিতীয় উদাহরণ স্বরূপ, এবং অলৌকিক গুণসমুদয়ের
একধারস্বরূপ। কত্রক দিবস হইল, দুই নিশাচরদিগের উপদ্রব
নিবারণার্থে তপোবনে রামচন্দ্রের শুভাগমন হইয়াছিল। এক্ষণে
রামের অদ্বুতভুজবলপ্রভাবে তাড়কাদি নিহত হইয়া, আমাদের
আশ্রমপদ বিঘ্নশূন্য হইয়াছে। এই কথা কহিয়া, মহর্ষি রাম ও
লক্ষ্মণকে সম্বোধন পূর্বক কহিলেন, বৎস! তোমরা মিথিলাধিপতি
মহারাজ জনককে অভিবাদন কর। তদনুসারে তাঁহারা তদীয়
চরণে অভিবাদন করিলেন। "

অনন্তর রাজর্ষি উভয়কে বধোচিত আশীর্বাদ করিয়া, অঙ্গুলি-
সঙ্কেত পূর্বক, গোপনে শতানন্দকে কহিলেন, ভগবন্! অদ্য
দশরথকুমারদ্বয়কে অবলোকন করিয়া অন্তঃকরণে যেরূপ স্মখোদয়

হইতেছে, বলিতে পারি না। বোধ করি, মহর্ষির আশীর্বাদ বা কলোন্মুখ হইল। শতানন্দ কহিলেন, রাজন্ ! ইহাদিগকে দেখিবার মাত্র আপনাইহতেই সীতা ও উর্ঝিলার কথা আমারও স্মৃতিপথে উদিত হইয়াছিল। তাহাতেই বিবেচনা হয়, এতদিনের পর বুঝি, রাজপুত্রীদিগের সৌভাগ্যদেবতারা স্ত্রপ্রসন্ন হইয়া থাকিবেন।

রাজা পুরোধার বাক্য শ্রবণ করিয়া, নিরতিশয় হর্ষের সহিত বিশ্বামিত্রকে সম্বোধন-পূর্বক কহিলেন, ভগবন্ ! ইহাদের রূপগুণে আমার চিত্ত যুগপৎ সমাকৃষ্ট হইয়াছে। আচ্ছাদভরে সর্ব শরীর পুলকিত হইতেছে, এবং অন্তঃকরণ যেন পীষ্মরসে পরিপ্লুত হইয়া আসিতেছে। আমি প্রতিক্রমেই আত্মাকে কৃতার্থ ও চরিতার্থ বোধ করিতেছি। বিশ্বামিত্র স্মিতমুখে কহিলেন, সখে ! আপনি ইহাদের প্রতি যেরূপ অভাবিত স্নেহ ও করুণা প্রকাশ করিতেছেন, তাহাতে এক্ষণে রামচন্দ্রকে হর ধনু দেখান। রাম হরশরাসনে গুণারোপণ করিয়া আপনার হৃদয়ক্ষেত্রে অপ্রমেয় স্নেহ ও অদ্ভুত রসের উৎপত্তিবিধান করুন।

রাজা মহর্ষিবাক্য শ্রবণে সাতিশয় হর্ষিত হইয়া কহিলেন, ভগবন্ ! ভগবান্ ভাস্কর ষাঁহাদের আদিপুরুষ, ব্রহ্মবাদী বশিষ্ঠদেব ষাঁহাদের ধর্মোপদেশক, ষাঁহারা আপনার পরমপ্রিয়পাত্র, এতাদৃশ রাজন্যবর ভূপতিগণের সহিত অশেষসুখকর সম্বন্ধ সংস্থাপিত হইবে, এই মনে করিয়া অন্তঃকরণে যে পরিমাণে আনন্দ উদ্ভূত হইতেছে, আবার নিদারুণ আত্মপ্রতিজ্ঞা স্মরণ করিয়া, তদ্রূপ বিবাদও জন্মাইতেছে। প্রায় শত শত অলৌকিকবীর্যশালী নৃপতিগণ আমার তনয়ার পাণিগ্রহণলালসায়, হরশরাসনে জ্যা-যোজনা করিবার নিমিত্ত প্রভূত আয়াস পাইয়াছিলেন, কিন্তু কেহই কৃতকার্য হইতে

পারেন নাই । অধিক কি, ঐ ধনু একবার তুলিতেও কোন বীরপুরুষের সাধ্য হয় নাই । রাম কেমন করিয়া সেই অদ্ভুত ব্যাপার সমাধান করিবেন, এই চিন্তায় আমার হৃদয় অতিমাত্র ব্যথিত হইতেছে ।

বিশ্বামিত্র স্মিতমুখে কহিলেন, সখে ! আপনি রামচন্দ্রের বাহুবল অবগত নহেন, তাহাতেই ওরূপ কথা কহিতেছেন । যে সকল রাজকুমারেরা জানকীলাভলালসায় এস্থানে সমাগত হইয়াছিলেন, তাঁহারা যদি রামের ন্যায় ভুজবীৰ্য্যশালী হইতেন, তাহা হইলে কখনই তাঁহাদিগকে বিফল হইয়া, দীনমনে প্রতিগমন করিতে হইত না । অতএব আপনি বালক বলিয়া রামে অন্যথা সম্ভাবনা করিবেন না । এক্ষণে কালবিলম্ব না করিয়া, সত্ত্বর রামচন্দ্রকে হরধনু দেখান । রাম নিজ বাহুবল দেখাইয়া আপনার হৃদয় হইতে সংশয় অপনোদন করুন ।

মহর্ষি এইরূপ বলিয়া বিরত হইতেছেন, এমন সময়ে দৌবারিক তথায় উপস্থিত হইয়া, কৃতঞ্জলিপুটে নিবেদন করিল, মহারাজ ! লক্ষাপতি দশাননের পুরোহিত শৌঙ্কল দ্বারদেশে দণ্ডায়মান আছেন ; কি অনুমতি হয় । জনক শ্রবণমাত্র সাতিশয় উদ্বৈগসহকারে কহিলেন, ত্বরায় তাঁহাকে এখানে আনয়ন কর । দৌবারিক যে আজ্ঞা বলিয়া, তৎক্ষণাৎ তথা হইতে প্রস্থান করিয়া, পুনরায় শৌঙ্কল সমভিব্যাহারে তাঁহাদের সম্মুখে আসিয়া উপস্থিত হইল । রাম শৌঙ্কলকে দেখিয়া, লক্ষ্মণকে কহিলেন, বৎস ! বুঝি, ছুরায়া রাক্ষসেরা হরধনুর রত্নাস্ত্র অবগত হইয়া থাকিবে । নচেৎ এমন সময়ে এখানে আসিবার আবশ্যকতা কি ।

শৌকল জনকসমীপে উপস্থিত হইয়া, সম্মুখে দৃষ্টিপাতপূর্বক ব্যথিত হৃদয়ে মনে মনে কহিতে লাগিলেন, হা দিক ! এখানেও আমাদিগের বিষমশত্রু বিশ্বামিত্র, জনক ও শতানন্দের সহিত প্রণয়গত্ৰ মধুরালাপে কালযাপন করিতেছে । আমি যে উদ্দেশ্য সাধনের নিমিত্ত এখানে আগমন করিয়াছি, বোধ করি, এ দুই তাপস হইতে তাহার বিশেষ অত্যাহিত জন্মিতে পারে । যাহাউক, যখন আমি এখানে আসিয়াছি, আর বিশেষতঃ ত্রিলোকাধিপতি মহারাজ দশানন আজ্ঞা করিয়াছেন, তখন অবশ্যই একবার অভিপ্রেতসিদ্ধির চেষ্টা করিতে হইবে । থাকুক, দুই কি করিতে পারিবে ।

মনে মনে এইরূপ বহু তর্কবিতর্ক করিয়া, অবশেষে তিনি রাজাকে যথারীতি আশীর্বাদ করিলেন । অনন্তর রাজনির্দিষ্ট আসনে উপবেশন পূর্বক, সহসা রাম ও লক্ষ্মণকে অবলোকন করিয়া, সবিষ্ময়ে ভাবিতে লাগিলেন, এই দুইটী কুমার কে ? আকার প্রকার দেখিয়া, ক্ষত্রিয়-তনয় বলিয়া প্রতীতি হইতেছে । কিন্তু এ নবীনবয়সে ইহাদের ব্রহ্মচারীর বেশধারণের কারণ কি ? আহা ! কি চিত্তচমৎকারিনী স্মৃতি ! বোধ করি, পূর্বে আমাদের রাজসভায় যে রামলক্ষ্মণের কথা শুনিয়াছিলাম, হয়ত, তাহারই দুই কৌশিকের সহিত মিথিলায় আসিয়া উপস্থিত হইয়াছে ।

শৌকল এইরূপ চিন্তা করিতেছেন, এমন সময়ে রাজা জনক তাঁহাকে সম্বোধন করিয়া জিজ্ঞাসা করিলেন, মহাশয় ! মহারাজ রাবণের কুশল ? শৌকল, ঈষৎ হাস্য করিয়া কহিলেন, ক্ষত্রিয়বর ! যিনি চতুর্দশ-ভুবনের অধিপতি,

শাকশাসন বিনয়নম্রশিরে যাঁহার শাসন বহন করিয়া থাকেন, কৈলাসগিরি যাঁহার অসীম ভুজ-বলগরিমা ঘোষণা করিতেছে, যাঁহার প্রতাপে জগৎ কম্পমান, সেই নিখিলভুবন-নায়ক মহারাজ লঙ্কেশ্বরের কুশলবার্তা কি জিজ্ঞাসা করিতেছেন ? কোন্ ব্যক্তি তাঁহার প্রতিকূলাচরণ করিয়া, শলভের ন্যায় আত্মাকে প্রজ্বলিত হতাশনে নিক্ষেপ করিবে ! রাজন ! যিনি কঠোর তপোবলে দেবাধিদেব মহাদেবকে স্তুত-সম করিয়া অলৌকিকপ্রভুশক্তিসম্পন্ন হইয়াছেন, যাঁহার নাম-মাত্র কর্ণকুহরে প্রবিষ্ট হইলে, অমর সুরসন্দেরও ত্রাস উপস্থিত হয়, সেই লঙ্কাপতি দশানন আপনার সহিত সম্বন্ধসংস্থাপন করিতে অভিলাষী হইয়াছেন । দেবরাজ যাঁহার অনুগ্রহলাভ-লালসায় মধ্যে মধ্যে, যেমন উৎকৃষ্ট মহার' রত্নাদি উপঢৌকন দিয়া থাকেন, তদ্রূপ আপনি সকল-ভুবন-চূর্ণিত কন্যারত্ন প্রদান করিয়া মহারাজের প্রিয়সুহৃদপদে অভিষিক্ত হউন । দেখুন, লোকে যেরূপ সুপাত্র অবেষণ করিয়া থাকে, আমাদের মহারাজ তাহার কোনবিষয়ে কিছুই ন্যূন নহেন । আপনি লঙ্কেশ্বর ভিন্ন, কুত্রাপি একাধারে সকল গুণের অবস্থান দেখিতে পাইবেন না । কি আভিজাত্য, কি সমৃদ্ধি, কি পরাক্রম, কি তপস্যা, সকল বিষয়েই মহারাজ পরাকাষ্ঠী লাভ করিয়াছেন । এবম্বৃত সৰ্বগুণসম্পন্ন সুপাত্রে কন্যাদান করিতে কাহার না ইচ্ছা হয় ? আর বিশেষতঃ লঙ্কেশ্বর স্বয়ং প্রার্থনা করিতেছেন ! অতএব এ বিষয়ে আপনার যে অভিমত হয়, দ্বরায় বলুন ।

শৌর্যের বাক্য শেষ না হইতেই হইতেই, বিশ্বামিত্র জনককে সম্বোধন করিয়া কহিলেন, সখে ! রামচন্দ্রকে সান্তিশয় উৎকণ্ঠিত

বোধ হইতেছে। অতএব সত্ত্বর ইহাকে হরধনু দেখান। জনক ঈষৎ হাস্য করিয়া, অনুচরবর্গকে অবিলম্বে ধনুক আনিভূত আদেশ করিলেন।

নৃপতিকে উত্তরপ্রদানে পরাজুখ দেখিয়া, শৌঙ্কল অমব-
কর্শস্বরে জনককে সম্বোধন-পূর্বক জিজ্ঞাসা করিলেন, সীরধ্বজ !
আমার বাক্য কি আকাশকুসুমের ন্যায় জ্ঞান করিলেন ? আমি
এতক্ষণ কি অরণ্যে রোদন করিলাম ? অথবা ভুবনবিজয়ী মহারাজ
দশাননের প্রার্থনা কি শ্রবণ-যোগ্য নয় বলিয়াই স্থির করিলেন ?
যে হেতু এ পর্য্যন্ত একটা প্রত্যুত্তরও প্রদান করিতেছেন না। কি
আশ্চর্য্য ! এ প্রকার ব্যাপার ত কখন কোথায় দেখি নাই,
ও শুনি নাই। শতানন্দ কহিলেন, ব্রহ্মন্ ! ইতি পূর্বেই উত্তর
প্রদত্ত হইয়াছে ; তুমি বুঝিতে পার নাই। যে বীরপুরুষ দেবদেব
মহাদেবের কার্য্যকে গুণারোপণ করিয়া, আমাদের হৃদয়ে বিপুল-
আনন্দসুধাবর্ষণ করিতে পারিবেন, আমরা তাঁহাকে পারিতোষিক
স্বরূপ এই অমূল্য কন্যারত্ন প্রদান করিব।

শৌঙ্কল শুনিয়া সজ্জভঙ্গে স্মিতমুখে কহিলেন, ঋবে ! এমন
কথা কখন মুখে আনিবেন না। যিনি অনায়াসে প্রকাণ্ড কৈলাস-
গিরি তুলিয়াছিলেন, তিনি যে হরচাপে জ্যা-যোজন্য করিতে
অক্ষম, ইহা সম্ভব নহে। তবে শিবধনুর সমাকর্ষণে, পাছে
গুরুর অবমাননা হয়, এই ভয়ে তিনি একরূপ অনার্য্য কার্য্যে
কখনই সম্মত হইবেন না। শতানন্দ সহর্ষমনে কহিলেন, ব্রহ্মন্ !
পূর্বেই আমি বলিয়াছি, মিথিলেশ্বর এই প্রতিজ্ঞা করিয়াছেন যে,
যে বীরপুরুষ হরশরাসনে গুণারোপণ করিতে পারিবেন, তাঁহার
হস্তে জানকীসমর্পণ করিবেন। যদি রাক্ষসরাজ তদ্বিষয়ে অপারগ

হন, তবে আমাদের যে প্রত্যুত্তর তাহা ত জানিতে পারিয়াছেন ?
অতএব এ বিষয়ে আর অধিক বাদানুবাদের আবশ্যকতা কি ।

শৌক্ল পুরোধার বাক্য শ্রবণ করিয়া, কিয়ৎকাল অধোমুখে
মৌনাবলম্বন করিয়া রহিলেন । অনন্তর ক্ষোভভরে একান্ত ব্যথিত
হইয়া সীতাকে উদ্দেশ্য করিয়া কহিতে লাগিলেন, হা সীতে !
তুমি যখন ত্রিলোকাধিপতি লঙ্কানাথ রাবণের সহধর্মিণীপদে
বরণীয় হইতে পারিলে না, তখন নিশ্চয়ই জানিলাম, বিধাতা
তোমার ললাটে অনেক কষ্ট লিখিয়াছেন । যে কার্য্যকে স্বয়ং দশ-
কণ্ড জ্যারোপণ করিতে অক্ষম হইলেন, তাহা যে সামান্য রাজ-
পুত্রেরা তুলিতে পারিবে, কখনই বোধ হয় না । অতএব বিবেচনা
করি, জনক বুঝি তোমার সর্বনাশের জন্যই এই দারুণ প্রতিজ্ঞা
করিয়া থাকিবেন ।

অনন্তর রাজার আদেশানুসারে সপ্তশত মহাবল পুরুষ অতিকষ্টে
হধরু সভাস্থলে আনয়ন করিল । বিশ্বামিত্র দেখিয়া পরমপ্রীতি-
লাভ করিয়া, রামচন্দ্রকে কহিলেন, বৎস ! অনর্থক কালহরণ করা
বিধেয় নহে । তমি ত্বরায় হরধরু গ্রহণ করিয়া, উহাতে জ্যা-
ঘোজনা কর । রাম গুনিয়া নতশিরে সকৌতুকে গাত্রোত্থান করি-
লেন ; এবং অতিবিনীতভাবে মহর্ষির পাদপদ্ম বন্দনা করিয়া ধনুক
গ্রহণ করিলেন । তখন সভাস্থ সমস্ত লোকে, বিস্ময়াকুলহৃদয়ে
রামের প্রতি অনিমিষ দৃষ্টি নিক্ষেপ ও মনে মনে নানা তর্কবিতর্ক
করিতে লাগিল ।

তাড়কাস্তকারী রামচন্দ্র বামকরে হরকোদণ্ড গ্রহণ করিলে,
জানকী ও জামদগ্ন্যের বামলোচন যুগপৎ কম্পিত হইতে লাগিল ;
এবং বিশ্বামিত্রের হৃদয় একবারে আনন্দে উদ্ভূসিত হইয়া উঠিল ।

কিন্তু অগ্রে অশুভসম্ভাবনাই মনোমধ্যে উদ্ভিত হয়, এই কারণে তৎকালে জনকের স্নেহাৰ্দ্দহৃদয়ে তাদৃশ সুখোদয় না হইয়া, বরং তাঁহার চিত্ত নিরন্তর সন্দেহদোলায় ছলিতে লাগিল । পূর্বে রামকে দেখিয়া অবধি তাঁহার অন্তরে একপ্রকার অপূৰ্ণ বাৎসল্যভাবের আবির্ভাব হইয়াছিল ; এক্ষণে রাম কিরূপে কৃতকার্য হইবেন, তিনি কেবল সেই চিন্তায় নিমগ্ন রহিলেন, এবং মনে মনে অভীষ্ট দেবতার নিকট তাঁহার মঙ্গলকামনা করিতে লাগিলেন ।

তদনন্তর, সূর্য্যবংশাবতংস রামচন্দ্র অবলীলাক্রমে ভার্গব-গুরুর শরাসনে জ্যারোপণ করিয়া, বৈদেহীর হৃদয়ের সহিত সহসা সমাকর্ষণ করিলেন । আকর্ষণমাত্র মহেশ্বরের ধনুর্দণ্ড দ্বিখণ্ড হইয়া গেল । ভগ্নকোদণ্ডের মড় মড় শব্দে রাজভবন পরিপূর্ণ হইল । বোধ হইল, যেন রামের বাহুবল ঘোষণা করিবার জন্যই এরূপ প্রচণ্ড ধ্বনি সহসা সমুথিত হইল । তৎকালে সভাসীন সমস্ত লোকেই চিত্রার্পিতের ন্যায়, ক্ষণকাল নিম্পন্দভাবে রহিলেন ; পরক্ষণেই সাধু সাধু বলিয়া রামচন্দ্রের গুণানুবাদ ও প্রশংসা গান করিতে লাগিলেন ।


এই সকল দেখিয়া, শৌর্য্যলের হৃদয় একান্ত ব্যথিত ও বিষম মৎসরে পরিপূর্ণ হইল । তখন তিনি সবিষাদে মনে মনে কহিতে লাগিলেন, পূর্বে ভাবিয়াছিলাম, সামান্য ক্রত্ৰিয়শিশু কখনই এমন কার্য্য সমাধা করিতে পরিবে না । কিন্তু ছুরাঙ্গার কি প্রভাব ! ভাল, যাহা দেখিবার তা ত দেখিলাম । আর এখানে থাকিবার প্রয়োজন কি ? এক্ষণে যাই, গিয়া আমাদের মহারাজকে এ সংবাদ দিই । এই বলিয়া, তিনি তথা হইতে প্রস্থান করিলেন ।

রামচন্দ্রকে কৃতকার্য্য দেখিয়া, জনকের চিত্ত আনন্দভরে নৃত্য

করিতে লাগিলে। তিনি স্নেহভরে রামকে বারংবার গাঢ় আলিঙ্গন করিয়া, বিশ্বামিত্রকে সম্বোধন পূর্বক কহিলেন, ভগবন্! আমার দুইটী কন্যা। তন্মধ্যে রাম আমার প্রতিজ্ঞা সাধন করিয়া স্বয়ং প্রাণাধিকা সীতাকে লাভ করিলেন। এক্ষণে আমি লক্ষ্মণহস্তে উর্ধ্বীলাকে সমর্পণ করিতে বাসনা করি। এবিষয়ে আপনার মত কি? বিশ্বামিত্র কহিলেন, এ উত্তম কল্প। ঈশ্বরেচ্ছায় আপনার অভিলাষ পূর্ণ হইবে।

শতানন্দ কহিলেন ভগবন্! রাজা দশরথের যেমন চারি পুত্র, ইহাদেরও তেমনি চারিটী কন্যা। রাম ও লক্ষ্মণ যখন সীতা ও উর্ধ্বীলার পাণিগ্রহণ করিবেন, তখন ইহার কনিষ্ঠের মাণ্ডবী ও শ্রুতকীৰ্ত্তি নামে কন্যাদ্বয় ভারত ও শক্রবল্লকে প্রদান করিলে, অতি সুখের বিষয় হয়। বিশ্বামিত্র শতানন্দের হস্ত ধারণ করিয়া কহিলেন, বৎস! রাজা দশরথ এখানে আসিলে সকল বিষয়েরই মীমাংসা হইবে। অতএব তুমি সত্ত্বর অযোধ্যায় গমন করিয়া, উত্তরকোশলেশ্বরকে আমার সাদরসম্ভাষণ জানাইয়া আল্পপূর্বক এই সমস্ত কথা কহিও। তোমায় আর অধিক কি বলিব। তুমি সকল বিষয়ই সমক্ অবগত আছ। এক্ষণে আর অনর্থক কালহরণ করিও না।

শতানন্দ এইরূপ আদিষ্ট হইয়া, তৎক্ষণাৎ অযোধ্যাভিমুখে গমন করিলেন।



তৃতীয় পরিচ্ছেদ ।



তৃতীয় দিবস মধ্যাহ্নকালে, শতানন্দ অষোধ্যায় উপস্থিত হইলেন এবং দশরথের সহিত সাক্ষাৎ করিয়া রামের কুশলসংবাদ বিজ্ঞাপন পূর্বক, তদীয় তপোবন গমন অবধি হরধনুর্ভঙ্গপর্য্যন্ত যাব-
তীয় রত্নাস্ত্র আদ্যোপাস্ত্র বর্ণন করিয়া কহিলেন, মহারাজ ! মহর্ষি বিশ্বামিত্র আপনাকে এই অনুরোধ করিয়া পাঠাইয়াছেন যে, মিথি-
লেশ্বরের চারি কন্যার সহিত আপনার চারিপুত্রের বিবাহ দিতে হইবে । এক্ষণে প্রার্থনা, আপনি সবাক্ষবে মিথিলায় গমন করিয়া শুভ পরিণয়োৎসব নিৰ্ব্বাহ করুন ।

ইতিপূর্বে রাজা দশরথও মনে মনে পুত্রচতুষ্টয়ের বিবাহ দিবার কল্পনা করিয়াছিলেন । অধুনা রামের কুশলবার্তার সহিত মনো-
রথের সম্পূর্ণ অনুকূল সংবাদ প্রাপ্ত হইলেন ; অতএব উভয়ই তাঁহার অন্তরে অনির্ব্বচনীয় স্নেহপ্রদ হইল । দুঃখের পর স্নেহ অধিকতর রম-
ণীয় হইয়া উঠে । রামের কোন সংবাদ না পাওয়াতে তাঁহার চিন্তা সাতিশয় ব্যাকুল হইয়াছিল ; এক্ষণে এবজ্জুত অচিন্তনীয় শুভ সংবাদ শ্রবণ করিয়া, দশরথের চিন্তা আত্মলাভে একবারে উচ্ছ্বসিত হইয়া উঠিল । গণ্ডস্থল বহিয়া অবিরলধারায়, হর্ষবারি প্রবাহিত হইতে লাগিল । তখন তিনি বশিষ্ঠদেবকে সযোধন করিয়া জিজ্ঞাসা করিলেন, ভগবন্ ! কেমন আপনার এবিষয়ে মত কি ? বশিষ্ঠদেব হর্ষাতিশয় প্রদর্শন পূর্বক, তৎক্ষণাৎ সম্মতি প্রদান করিলেন ।

পরদিন দশরথ, ভরত শত্রুঘ্ন, এবং অন্যান্য আত্মীয়বর্গ সমভিব্যাহারে লইয়া, বশিষ্ঠ বামদেব প্রভৃতি মহর্ষিবর্গের সহিত মিথিলাভিমুখে যাত্রা করিলেন । তাঁহার সঙ্গে বহুসংখ্যক দাসদাসী, অসংখ্য সেনা, অগণিত হস্ত্যশ্বরথ প্রভৃতি গমন করিল । যথাকালে মিথিলায় উপস্থিত হইলে, মিথিলেশ্বর সবাঙ্কবে প্রত্যাগমন করিয়া, অশেষসমাদরপূর্বক তাঁহাদিগকে আপন ভবনে লইয়া গেলেন । রাম ও লক্ষ্মণ পিতৃদর্শনে পরম প্রীত হইয়া, নতশিরে তদীয় চরণ বন্দনা করিলেন । দশরথ প্রসারিতবাহু-যুগলদ্বারা প্রণত তনয়দ্বকে গাঢ় আলিঙ্গন করিয়া, অকৃত্রিম স্নেহভরে বারংবার উহাদের মুখচুষন ও মস্তক আশ্রাণ করিতে লাগিলেন । পরে উহাদের কুশল জিজ্ঞাসা করিয়া স্বয়ং স্নহচিত্ত হইলেন ।

অনন্তর রাজা জনক, দশরথের সহিত শিষ্টাচারসম্মত বহুল কথোপকথন সমাপন পূর্বক, বৈবাহিকসম্বন্ধসংস্থাপন জন্য, স্বীয় অভিপ্রায় ব্যক্ত করিলেন । দশরথ হর্ষাতিশয়ের সহিত তদীয় প্রার্থনায় অনুমোদন করিলেন । তদনুসারে সেই কালেই বিবাহের শুভদিন ও শুভলগ্ন স্থিরীকৃত হইল ।

রাজর্ষি জনকের ঐশ্বর্যের সীমা নাই । তিনি পরমসমারোহে তনয়াদিগের পরিণয়োৎসব সমাপনমানসে, পূর্বাচ্ছেই বিবাহের যাবতীয় আয়োজন করিয়া রাখিয়াছিলেন । এক্ষণে মহাহর্মান্বিত মানিক্যে সুপ্রশস্ত পরম, সুন্দর এক সভাগৃহ সুসজ্জীভূত করিলেন । ক্রমে নানা দিগ্দেশ হইতে নিমন্ত্রিত রাজগণের সমাগম হইতে লাগিল । পরাজিত ও শরণাগত শত শত নৃপতিগণ, সভামণ্ডপে উপস্থিত হইয়া, বহুমূল্য উপহার প্রদান করিতে

লাগিলেন । নিরুপিত দিবসে জনক ও তাহার অল্পজ, সভ্য-
গণের অল্পমতি লইয়া, কৌলিক রীত্যানুসারে দশরথের পুত্রচতু-
ষ্টয়কে পরিণয়সূচক বেশভূষায় বিভূষিত চারিটী কন্যারত্ন সম্প্রদান
করিলেন । যেমন নীলাম্বরতলে তারকারাজি সমুদিত হইলে
অপূর্ণ শোভা হয়, কাঞ্চনহারে নীলকান্ত মণি গ্রথিত হইলে
যেক্রপ উভয়ের শ্রী ও সৌন্দর্য্য বৃদ্ধি হয়, তক্রপ সেইকালে অভি-
নবদম্পতীদিগের পরস্পর মিলনে, পরস্পরের একটী অলৌকিক
সৌন্দর্য্য লক্ষিত হইতে লাগিল । রাজা অন্ধ, খঞ্জ, বধির,
প্রভৃতি দীন দরিদ্রদিগকে অকাতরে অসংখ্য ধনদান করিতে
লাগিলেন । যে ব্যক্তি যাহা অভিলাষ করিয়া তথায় উপস্থিত
হইতে লাগিল, তিনি তৎক্ষণাৎ তাহার অভিলাষ পরিপূর্ণ করি-
লেন । কেহ বা অপরিয়াপ্ত অর্থলাভ করিয়া, কেহ বা প্রার্থনা-
ধিক ভূমিলাভ করিয়া, কেহ বা অতীপ্সিত বস্ত্র ও আহার-
সামগ্রী লাভ করিয়া, হৃষ্টচিত্তে মনের উল্লাসে নবীন দম্পতীদিগকে
ভূরি ভূরি আশীর্বাদ করিয়া সু সু স্থানে প্রতিগমন করিল ।
চতুর্দিকে অনবরত নৃত্যগীত ও বাদ্যধ্বনি হইতে লাগিল । ক্ষণ-
কালমধ্যে মিথিলা নগরী উৎসবপূর্ণ হইয়া উঠিল । তৎকালে
নগর মধ্যে এক প্রাণীও অসুখী ছিল না । নগরবাসী আবাল-
বৃদ্ধবনিতা সকলেরই মুখে আমোদ ও আনন্দের চিহ্ন স্পষ্টরূপে
লক্ষিত হইতে লাগিল । ফলতঃ রাজতনয়াদিগের পরিণয়োৎসব
অতি সমৃদ্ধি ও সমারোহের সহিত সুসঙ্গম হইয়াছিল ।

এইরূপে পৌরজনেরা অভিনব জামাতৃগণকে লইয়া, নিত্য নিত্য
নূতন নূতন উৎসবে কালক্ষেপ করিতে লাগিলেন । ক্রমে অষ্টাহ গত
হইল । দূরদেশাগত নিমন্ত্রিত নৃপতিগণ সু স্ব দেশে প্রস্থান

করিলেন । দশরথ অধিক বিলম্ব করা অবিধেয় বিবেচনায়, বৈবাহিক-সমীপে স্বদেশে যাইবার ইচ্ছা প্রকাশ করিলেন । জনকও তদীয় প্রস্তাবে কোন আপত্তি উত্থাপন না করিয়া, প্রসন্নমনে তাঁহাদের তৎকালোচিত গমনের সমুদায় আয়োজন করিয়া দিলেন ।

তদনন্তর দশরথ, বৈবাহিকের নিকট বিদায় গ্রহণ করিয়া, পুত্র-পুত্রবধূগণ সমভিব্যাহারে স্বদেশযাত্রা করিলেন । অগ্রে অগ্রে গভীর বাদ্যধ্বনি হইতে লাগিল । সৈন্যগণের কল কল রবে, রথচক্রের ঘর্ঘরশব্দে, মাতঙ্গের ও তুরঙ্গের চীৎকারে দশদিক্ ব্যাপ্ত হইল । এক্ষণে আর কিছুই শুনিত পাওয়া যায় না । কেহ কাহাকে ডাকিয়া আলাপ করিবেন, এরূপ অবকাশ প্রায়ই রহিল না । ক্রমে অশ্ব-খুরোথিত ধূলিপটলে গগনতল সমাচ্ছন্ন হইলে, দিগ্ভূ খমগুল যেন তমোময় আবরণে অবগুণ্ঠিত বোধ হইতে লাগিল । এক্ষণে আর কোন পদার্থই নয়নগোচর হয় না । যে দিকে দৃষ্টি নিক্ষেপ করা যায়, সেই দিকই নিরবচ্ছিন্ন ধূলিধূসরিত দৃষ্ট হইতে লাগিল । সেনা-গণের সদর্প পাদবিক্ষেপে ধরাতল যেন কম্পিত হইতে লাগিল । ক্রমে, সকলে মিথিলা নগর পশ্চাতে রাখিয়া, নানা দেশ, নানা নদী, নানা জনপদ অতিক্রম পূর্বক অষোধ্যাভিমুখে গমন করিতে লাগিলেন ।

এদিকে হরচাপভঙ্গবার্তা শ্রবণে, রোষরসে কলুষিত হইয়া ভগ-বান্ ভৃগুনন্দন, রামের অষোধ্যাগমনপথ অবরোধ পূর্বক, মনে মনে কহিতে লাগিলেন, অহে ! ছুরায়া ক্ষত্রিয়শিশুর কি প্রগল্ভতা ! যিনি ত্রিভুবনের অধীশ্বর, আমি যাঁহার প্রিয়শিষ্য, সেই ত্রিপুর-বিজয়ী দেবদেব মহাদেবের শরাসন স্পর্শ করিতেও ভূমণ্ডলে কেহ সাহসী হয় না ; কিন্তু কি আশ্চর্য্য ! ছুরাশয় দশরথপুত্র অশংসয়িত-

চিন্তে সেই হরধনু ভগ্ন করিল ! দুর্কিনীত দশরথতনয়ের কি দুঃসাহস ! যাহার ভুজবলপ্রভাবে, রণপণ্ডিত ক্ষত্রিয়গণ কৃতান্তের করালকবলে নিপতিত হইয়াছে, এবং যুদ্ধকথা একবারে তিরোহিত হওয়াতে, ধরিত্রী অপূর্ব শাস্তিস্থল লাভ করিতেছে, সেই ব্যক্তি ত্রিপুরাস্তকারীর প্রিয়শিষ্য হইয়া যে, গুরুর ঈদৃশ অভিনব অবমাননা অবলোকন করিয়া, কাপুরুষের ন্যায় উদাসীনহুতি অবলম্বন করিয়া থাকিবে, ইহা কখনই সম্ভব নহে । আমি যে মুহূর্ত্তে হরশরাসনভঙ্গবার্ত্তা শ্রবণ করিয়াছি, সেই মুহূর্ত্তেই আমার হৃদয়ে ক্রোধাগ্নি পুনরুদ্দীপ্ত হইয়া উঠিয়াছে । এক্ষণে দ্বর্জিত রামকে সমুচিত শাস্তি প্রদান করিয়া, ক্রোধাগ্নি নির্মাণ করিব ।

এইরূপ স্থির করিয়া, ভৃগুনন্দন রোষতরে সঙ্কঠার ভুজদণ্ড বারংবার কম্পিত করিয়া, গর্জিতবচনে উচ্চৈঃস্বরে সৈনিকগণকে কহিতে লাগিলেন, ওরে সৈনিকগণ ! তোদের রাজার পুত্র রামকে সংবাদ দে, যে ব্যক্তি একবিংশতিবার ভূমণ্ডলস্থ সমস্ত ক্ষত্রিয়ের শোণিতশ্রোতে পিতৃলোকের তর্পণ-ক্রিয়া সমাপন করিয়া, ক্রোধাগ্নি নির্মাণ করিয়াছে ; যাহার খরধার কুঠার ভুজসহস্র-সম্পন্ন অর্জুনের রুধিরপানে পরিতৃপ্ত হইয়াছিল, অদ্য সেই পরশুরামের করাল কুঠার দ্বর্জিত রামের শোণিতপানে লোলুপ হইয়াছে । অতএব কোথায় সেই নরাধম, শীঘ্র আমাকে দেখাইয়া দে ।

সাগরের ন্যায় গম্ভীরপ্রকৃতি, মতিমান রামচন্দ্র, দূর হইতে ভৃগুনন্দনকে রোষাক্ষচিত্র দেখিয়া, কিছুমাত্র বিকলচিত্ত হইলেন না ; বরং সহর্ষে মনে মনে কহিতে লাগিলেন, যিনি সমরক্ষেত্রে দুর্দম হৈহয়পতিকে সংহার করিয়া জয়ত্রী লাভ করিয়াছেন, যাহার নিকট অজেয় সেনানীও সম্মুখসংগ্রামে পরাভূত হইয়া-

ছিলেন, অদ্য, সৌভাগ্যক্রমে সেই অসামান্যপ্রতাপশালী ত্রিভুবনবিজয়ী ভগবান্ ভৃগুনন্দনকে সাক্ষাৎ দেখিতে পাইলাম। আহা! কি মুনি-বীর-ব্রতাকারী প্রশান্তগম্ভীর কলেবর!! দেখিলেই বোধ হয়, যেন ইনি সাক্ষাৎ তেজোরশি, মূর্তিমান্ তপঃপ্রভাব, এবং প্রচণ্ড বীররসের আশ্রয়। ইহার মস্তকে আপিজ্জল জটাজ্জাল, পৃষ্ঠদেশে তুণীর, বামহস্তে ধনু, দক্ষিণকরে কুঠার, প্রকোষ্ঠে .রৌদ্রাক্ষবলয়, স্কন্ধদেশে এণচর্ম, বক্ষঃস্থলে অক্ষসূত্র, গলদেশে যজ্ঞোপবীত, এবং কটিদেশে বস্কলবাস। বস্তুতঃ এরূপ সুন্দর অথচ ভয়ঙ্কর আকৃতি ত কখন নয়নগোচর হয় নাই। যাহা হউক, ইনি যখন ব্রাহ্মণ-সুভাবস্বলভ রৌষপরবশ হইয়া, আমাকে অন্বেষণ করিতেছেন, তখন আর অধিক বিলম্ব না করিয়া স্বয়ংই ইহার নিকট গমন করা যাউক। এইরূপ বিবেচনা করিয়া, তিনি সমস্রমে রথ হইতে অবতীর্ণ হইলেন এবং জামদগ্ন্য-সমীপে উপস্থিত হইয়া, নতশিরে তাঁহাকে অভিবাদন করিলেন।

ভৃগুনন্দন, প্রিয়দর্শন রামচন্দ্রকে অবলোকন করিয়া, স্মিতমুখে সজ্ঞভঙ্গে কহিলেন, পূর্বে ইহার যেরূপ গুণানুবাদের কথা শুনিয়াছিলাম, ইহার আকার প্রকারও দেখিতেছি সেইরূপ। শরীর যেমন সামর্থ্যসারময়, তেমনি রমণীয়। কিন্তু এই দুষ্কৃত অবমাননা স্মৃতিপথাক্রুত হইলে, আমার অন্তঃকরণে অনিবার্য ক্রোধানল উদ্দীপ্ত হয়। কিছুতেই চিত্তের ঠৈর্য্য থাকে না। যাহা হউক, অদ্য দুরাত্মার শৌর্য্যসীমা সূচক্কে অবলোকন করা যাইবে।

মনে মনে এইরূপ বিবেচনা করিয়া, ভৃগুনন্দন রৌষপরুষবাক্যে রামকে আহ্বানপূর্ব্বক কহিলেন, রে কল্মষশিশো! তুই সামান্য

যুগশিশু হইয়া, কিরূপে কেশরীর কেশাকর্ষণে উদ্যত হইয়াছি।
যে চন্দ্রশেখরের শরাসন আকর্ষণ করিতে সুরাসুরমধ্যে কেহই
সাহসী হয় না, তুই সামান্য ক্ষত্রিয়-শিশু হইয়া সেই হরধনু
ভগ্ন করিলি ! অতএব তোর এ অপরাধ 'কখনই উপেক্ষণীয়
নহে। এক্ষণে তুই আমার ক্ষত্রিয়কুলসংহারকারী কোপানলে
অচিরে পতঙ্গরূতি প্রাপ্ত হইবি। যদি সামর্থ্য থাকে, প্রতি-
বিধানের চেষ্টা কর ।

পরশুরামের ঈদৃশদর্পোদ্ধত বাক্য শ্রবণ করিয়া, রাম প্রশান্ত-
গম্ভীরস্বরে বিনয় করিয়া কহিলেন, ভগবন্ ! আমি আর্য্য বিষ্ণা-
মিত্রের নিদেশানুবর্তী হইয়া, রাজর্ষি জনকের প্রতিজ্ঞাপাশ-
চ্ছেদনমানসে, বৈদেহীর পরিণয়-পরিপাকী হরকার্মুক ভগ্ন করিয়াছি ।
ত্রিপুরাস্তকারীর বা কার্তবীৰ্য্যজিতার অবমাননা করা আমার
উদ্দেশ্য ছিল না । অতএব আমার অপরাধ ক্ষমা করুন ।

জামদগ্ন্য, রামমুখনিঃসৃত পৌরুষগত্ব বিনয়বাক্য শ্রবণে উচ্চৈঃ
হাস্য করিয়া কহিলেন, ওরে রণভীরু ! যে ব্যক্তি বারংবার ধরিত্রীকে
নিঃক্ষত্রিয় করিয়াও তৃপ্তিলাভ করে নাই, অদ্য যে তাহার
কোপশাস্তি হইবে, কখনই সম্ভব নহে। তুই যখন বীরমদে
প্রমত্ত হইয়া অপথে পদার্পণ করিয়াছিস, তখন তোকে অবশ্যই
উহার প্রতিফল ভোগ করিতে হইবে। অদ্য আমি এই পরশুদ্বারা
তোর শিরশ্ছেদন করিব ।

যেমন নির্ঝাঁত স্থির জলাশয়ে শিলাখণ্ড নিক্ষিপ্ত হইলে উহার
জল চঞ্চল হইয়া উঠে, তদ্রূপ পরশুরামের এবম্বূত আত্মশাঘা-
মিশ্রিত পরুষবাক্যে, রামের চিত্ত চঞ্চল হইয়া উঠিল। তিনি
ভৃগুনন্দনকে সম্বোধন করিয়া কহিলেন, ভার্গব ! বারংবার আপ-

নার একরূপ বাক্বিভীষিকায় আমার চিত্ত অতিমাত্র ব্যথিত হইতেছে। আপনি শ্রেষ্ঠবর্ণসমুত্ত ব্রাহ্মণ, জাতিতে পূজ্য। আমি দ্বিতীয়বর্ণজাত ক্ষত্রিয়। আপনার সহিত বিবাদে প্রবৃত্ত হওয়া মাদৃশ ব্যক্তির কর্তব্য নহে। অতএব আপনি আমার প্রতি প্রসন্ন হউন।

ভৃগুনন্দন, রামবাক্য শেষ না হইতে হইতেই, অধিকতর রোষ প্রকাশ পূর্বক, কম্পিতকলেবর হইয়া কহিলেন, ওরে মূঢ়! আমি কি কেবল জাতিতেই পূজ্য, আর কিছুতে নহি। আঃ পাপ! জীর্ণ হরধনু ভাঙ্গিয়া তোর একরূপ বিসদৃশ অহঙ্কার বদ্ধিত হইয়াছে। রে মূঢ়! সশ্বুখে কালের করাল কবল দেখিয়াও কি দেখিতেছিস না! এই মুহূর্ত্তেই তোর দর্প খর্ব্ব করিতেছি; তুই অস্ত্রগ্রহণ কর। অথবা অস্ত্রগ্রহণের আবশ্যকতা নাই। তোর সহিত সংগ্রামে প্রবৃত্ত হইলে, লোকে আমার অপঘণ ঘোষণা করিবে। আমি প্রতিজ্ঞা করিতেছি, তুই যদি আমার এই ধনুকে মৌরীযোজনা করিতে পারিস, তাহা হইলে আমি ত্বৎকৃত যাবতীয় অপরাধ মার্জনা করিব। নতুবা আমার এই কুঠার তোর গলদেশ দ্বিখণ্ড করিবে।

পরশুরামের ঈদৃশ অংবনকটু বচনবিন্যাস শ্রবণে, রঘুকুল-তিলক রামচন্দ্র, পাদদলিত ভুজঙ্গের ন্যায়, তিরস্কৃত মাতঙ্গের ন্যায়, মেঘাস্তুরিত পতঙ্গের ন্যায়, প্রবল রোষপ্রকাশপূর্বক, অবলীলাক্রমে বামকরে ভার্গবধনুগ্রহণ করিয়া, উচ্চাতে গুণযোজনা করিলেন। অনন্তর অধিজ্যশরাসনে শরমন্ধান করিয়া, ভার্গবের স্বর্গগমনপথ অবরোধ করিলেন। জামদগ্ন্যের যাবতীয় দর্প এক-বারে খর্ব্ব হইল। চতুর্দিক হইতে সৈনিকগণ রামজয়শব্দে

কোলাহল করিতে লাগিল । জামদগ্ন্য নবপরাভবে যৎপরোনাস্তি অপমানিত হইয়া, লজ্জাবনতমুখে তথা হইতে প্রস্থান করিলেন ।

পূর্বে ভার্গবদর্শনে, রাজা দশরথ অতিমাত্র ভয়াকুল ও হতবুদ্ধি হইয়া, অজস্র অশ্রুবিসর্জন ও মনে মনে কতই তর্কবিতর্ক করিতে ছিলেন, এক্ষণে রামজয়শব্দ তাঁহার কর্ণকুহরে প্রবিষ্ট হইলে, প্রথমতঃ তিনি উহা অলীক বলিয়া আশঙ্কা করিলেন । তৎপরে, ভৃগু-নন্দন রামচন্দ্রের নিকট পরাজিত হইয়াছেন, এই সংবাদ অসংশয়িত-রূপে অবগত হইয়া, আহ্লাদভরে কি করিবেন কিছুই স্থির করিতে পারিলেন না । ক্ষণকাল কেবল স্তব্ধপ্রায় হইয়া রহিলেন । তদনন্তর সহায়বদনে বশিষ্ঠদেবকে জিজ্ঞাসা করিলেন, ভগবন্ ! অপত্যস্নেহ কি বিষম পদার্থ । কোন প্রকার গুরুতর ঘটনা উপস্থিত হইলে, সর্বপ্রায়েই যেন অমঙ্গলের আশঙ্কা হইয়া থাকে । পূর্বে, যখন আমি ভৃগুনন্দনের আগমনবার্তা শ্রবণ করিলাম, তৎকালে বোধ হইয়াছিল, যেন আমার জীবন দেহত্যাগ করিয়া পলায়ন করিতেছে ! আমি মনে মনে কতই যে কূতর্ক করিতে-ছিলাম, তাহা বলিতে পারি না । একবার ভাবিলাম, কেনই বা বৎস রামচন্দ্র হরধনু ভাঙ্গিলেন, আবার ভাবিলাম, যদি বিশ্বামিত্রের সহিত রামকে না পাঠাইতাম, তাহা হইলে আর একরূপ বিপদ ঘটিত না । পুনরায় ভাবিলাম, বা হবার তা হইয়াছে, এক্ষণে আমি স্বয়ং গিয়া পরশুরামের চরণে ধরিয়া তাঁহাকে প্রসন্ন করি ; তখনই আবায় মনে হইল, ভার্গবের ক্রোধ কিছুতেই শাস্ত হইবে না । তাহার পর ভাবিলাম যদি বৎসের কোন প্রকার অমঙ্গল ঘটে, তাহা হইলে সেই দণ্ডেই আত্মহত্যা করিয়া এ পাপদেহ বিসর্জন করিব ; তখনই আবার মনে

এই উদয় হইল, আত্মহত্যা ধৰ্ম্মশাস্ত্রে নিষিদ্ধ । অতএব এ হৃদ্ধবয়সে আত্মহাতী হইয়া, না জানি কোন্ ঘোর নিরয়ে গমন করিতে হইবে । কখন বা বিধাতাকে নিরর্থক নিন্দাবাদে তিরস্কার করিতে লাগিলাম । কখন বা ইহা স্বকীয় দুষ্কৃতির দুৰ্দ্ধিপাক ভাবিয়া নির্বেদসাগরে নিমগ্ন হইতে লাগিলাম । এইরূপ কতপ্রকার কুতর্কই আপনা হইতে অন্তঃকরণকে বিলোড়িত করিতে লাগিল । ভগবন্ ! রাম আমার অঙ্কের অবলম্বন । এই নিমিত্তই বুঝি, জগদীশ্বর অনুকূল হইয়া বৎসের প্রাণরক্ষা করিলেন । কিন্তু এখন ও ভয় হইতেছে ; পাছে, ভৃগুনন্দন অসহ্য অপমানভরে জাতক্ৰোধ হইয়া প্রত্যাভর্জন করেন, এবং পুনরায় অনিষ্ট চেষ্টায় প্রবৃত্ত হন ।

বশিষ্ঠদেব শুনিয়া স্মিতমুখে কহিলেন, রাজন্ ! আপনার কোন চিন্তা নাই । দেখুন, যে জামদগ্ন্য দশাননবিজয়ী হৈহয়পতিকে বিনাশ করিয়া, ভুবনমধ্যে অদ্বিতীয় বীরপুরুষ বলিয়া অভিহিত হইয়া থাকেন, যাহার নামমাত্র কর্ণকুহরে প্রবিষ্ট হইলে মহা মহা বীরপুরুষদিগেরও হৃৎকম্প উপস্থিত হয়, যাহার অপ্রতিহত প্রতাপ এপর্যন্ত কেহই ব্যাহত করিতে সাহসী হয় নাই, অদ্য সেই ভার্গব রামচন্দ্রের নিকট পরাভূত হইয়াছেন । অতএব ত্রিভুবনে রামের ন্যায় অসামান্যপরাক্রমশালী আর দ্বিতীয় দৃষ্ট হইতেছে না । রামের পরাক্রম অনতিক্রমণীয় । কস্মিন্ কালে কোন বীরপুরুষ বৎসের হায়া স্পর্শ করিতেও সমর্থ হইবে না । এক্ষণে আপনি অকারণ উদ্বেগ পরিত্যাগ করুন ।

তদন্তর বশিষ্ঠদেব সম্মুখে দৃষ্টি-নিষ্কম্প করিয়া হৃষ্টচিত্তে কহিলেন, এই যে বৎস রামচন্দ্র অপূৰ্ণ বিজয়শ্রী ধারণ করিয়া, এদিকে

আগমন করিতেছেন । আহা ! বৎসের শরীর কি মাহাত্ম্যসারসম ।
এরূপ অমানুষ কৰ্ম সম্পাদন করিয়াছেন, তথাপি ইহার মুখে
আত্মগোরবমন্তৃত গৰ্বচিহ্ন কিছুমাত্র লক্ষিত হইতেছে না । আমি
কত শত রাজপুত্র দেখিয়াছি, কিন্তু রামের ন্যায় অসামান্য শাস্ত্র-
প্রকৃতি, অনুপম উদারচিত্ত, লোকোত্তরবিনয়ী, অলৌকিক পরাক্রম-
শালী, ভূমণ্ডলে আর দ্বিতীয় দেখিনাই । রাম অপ্রাকৃতগুণগ্রামের
সমষ্টি, অপ্রমেয় সাগৰ্থ্যসমুদয়ের একাধার, এবং জগতের মূর্তিমান
পুণ্যরাশি । ফলতঃ একাধারে ষাবতীয় গুণের অবস্থান, রাম ভিন্ন
পাত্রান্তরে দৃষ্ট হয় না ।

বশিষ্ঠদেবের বাক্য শেষ না হইতে হইতেই রাম তথায় উপ-
স্থিত হইয়া প্রগাঢ়ভক্তিসহকারে অগ্রে মহর্ষিচরণাশ্রুজে, তদনন্তর
পিতৃচরণে অভিবাদন করিয়া, নতশিরে তৎপাশ্বে উপবিষ্ট হইলেন ।
যেৰূপ অপহৃত প্রিয়পদার্থের পুনঃপ্রাপ্তি হইলে, মনোমধ্যে অসীম
আনন্দের উদয় হয়, তক্রূপ রামদর্শনে দশরথের অন্তঃকরণে অনির্ব-
চনীয় সুখের সঞ্চার হইল । তিনি আত্মাদভরে প্রাণপ্রতিম
তনয়কে প্রসারিতবাহুগলদ্বারা বারংবার গাঢ় আলিঙ্গন করিয়া,
তদীয় মস্তকোপরি অজস্র আনন্দাশ্রু বিসর্জন করিতে লাগিলেন ।
তৎপরে স্নেহসম্বলিত মধুরবচনে তাঁহার কুশল জিজ্ঞাসা করিয়া
সমভিব্যাহারী ষাবতীয় অনুচরবর্গকে, ত্বরিতগমনে অযোধ্যায়
যাইতে আদেশ করিলেন ।

রাজার আজ্ঞানুসারে সৈন্যগণ শ্রেণীবদ্ধ হইয়া, জয়পতাকা
উড্ডয়ন পূর্বক, মহোল্লাসে অযোধ্যাভিমুখে গমন করিতে
লাগিল । তাহাদের সাহস্কার পাদপ্রক্ষেপে, ধরাতল যেন রসাতলে
যাইবার উপক্রম করিল । এই ভাবে কিয়দূর গমন করিলে,

ক্রমে দূর হইতে অযোধ্যানগর অম্প অম্প দৃষ্ট হইতে লাগিল । অনতিবিলম্বে সকলে অযোধ্যায় আসিয়া পৌঁছিলেন । ক্রমে রথসমূহ, প্রান্তরভাগ অতিক্রম করিয়া পুরদ্বারে উপনীত হইল । তথা হইতে ক্রমে ক্রমে নগরমধ্যবর্তী রাজপথে প্রবেশ করিল । বন্দিগণ উচ্চৈঃস্বরে রাজগুণগরিমা কীর্তনপূর্বক স্তুতিপাঠ করিতে লাগিলেন । রামচন্দ্র অম্লজগণের সহিত নববধূ পরিগ্রহ করিয়া নগরে প্রত্যাবর্তন করিতেছেন, শুনিয়া যাবতীয় নগরবাসী স্ব স্ব আরক্ত কার্য পরিত্যাগ পূর্বক, রাজপথে আসিয়া দণ্ডায়মান হইল; এবং অনিমিষনয়নে বধুর সহিত রাজকুমারদিগের মনোহর-মূর্তি অবলোকন করিতে লাগিল । রাজপুত্রেরা দেখিতে দেখিতে তাহাদের নেত্রপথের অতীত হইলেন । সকলে কত কথাই কহিতে লাগিল ; কেহ কহিল, আমাদের রক্ত রাজা কত পুণ্যই করিয়া-ছিলেন যে, শেষ দশায় একুপ সৰ্বগুণসম্পন্ন চারিটীপুত্র লাভ করিয়াছেন । আহা ! ইহাদিগকে দেখিলে চক্ষু জুড়ায় । যেমন কর্ণায়ত চক্ষু, তেমনি বিপুল নাসিকা, যেমন মনোহর মুখশ্রী, তেমনি সুন্দর অঙ্গসৌষ্ঠব । অপর কেহ কহিল, রাজপুত্রেরা যেকুপ সৰ্বাঙ্গসুন্দর, বধুগুলিও তদনুরূপ হইয়াছে । অন্য কেহ কহিল, আমাদের রক্ত রাজার জ্যেষ্ঠতনয় রামচন্দ্র যেমন সুশীল, তেমনি বিনয়ী ও মিষ্টভাষী । আমি তাঁহাকে নমস্কার করিলাম, তিনি তৎক্ষণাৎ ঐব্রহ্মমিতমন্তকে উহা প্রত্যর্পণ করিয়া, চিরপরিচিতের ন্যায়, স্নিতযুখে সাদরসম্ভাষণে আমাকে নিকটে ডাকিয়া কুশল জিজ্ঞাসা করিলেন । আহা ! রামচন্দ্রের কি মধুর বাক্যবিন্যাস, শুনিলে কর্ণ জুড়ায় । আমাদের রাজা রক্ত হইয়াছেন ; উনি কিছু আর অধিক দিন রাজত্ব করিতে পারিবেন না । কিছুদিন

পরেই রামচন্দ্র আমাদের রাজা হইবেন । পূর্বে কখন কখন আমরা চিন্তা করিতাম, রক্তরাজার পরে যিনি রাজ্যভার গ্রহণ করিবেন, তাঁহার শাসনে হয়ত, আমাদেরকে কতই উৎপীড়ন সহ্য করিতে হইবে । কিন্তু আজি আমাদের সে আশঙ্কা দূর হইল । আমরা রামরাজ্যে আরও সুখে কালযাপন করিতে পারিব ।

ক্রমে রথসমূহ রাজত্ববনের দ্বারদেশে উপনীত হইল । দ্বারের দুই পাশ্বে বারিপূর্ণ হেমকুম্ভ, তৎসমীপে অভিনব শাখাপল্লব এবং তোরণের উপরিভাগে একাবলীহারের ন্যায় কল্যাণসূচক পুষ্পমালা, উহার মধ্যে মধ্যে বিচিত্র কুমুমস্তবক দোলায়মান রহিয়াছে । রাজকুমারেরা পুর মধ্যে প্রবেশ করিলে, পৌরজনেরা আনন্দসূচক মঙ্গলধ্বনি করিতে লাগিল । তদনন্তর অন্তঃপুরবাসী পুরস্ক্রীবর্গ অগ্রে জলধারা, তৎপরে লাজবর্ণ প্রভৃতি তৎকালোচিত মঙ্গলাচরণ করিতে করিতে রাজপুত্র ও বধুদিগকে অন্তঃপুর মধ্যে লইয়া গেলেন । রাম, ভরত, লক্ষ্মণ, ও শত্রুঘ্ন, চারিভ্রাতা একে একে সর্দজ্যেষ্ঠা কোশল্যা মাতাকে, তদনন্তর মধ্যমা কৈকেয়ীকে, তৎপরে কনিষ্ঠা স্মিত্রা জননীকে অভিবাদন করিলেন । তাঁহারা “আয়ুস্মান্ হও” বলিয়া পুত্রদিগকে আশীর্বাদ করিয়া, বধুযুথাবলোকনে যত্নবতী হইলেন । পুত্রবধুদিগের লোকাভীত রূপমাধুরী-দর্শনে রামভ্রাতৃদিগের চিত্ত আনন্দে উদ্বেল হইয়া উঠিল । তখন রাজ্ঞীরা আহ্লাদভরে “এস মা এস” বলিয়া প্রণত বধুদিগকে ক্রোড়ে লইলেন, এবং স্নেহবিকসিত স্ফুটহলোচনে বারংবার উহাদের মুখচুম্বন করিতে লাগিলেন । তাঁহারা যতবার বধুদিগের চন্দ্রানন নিরীক্ষণ করিতে লাগিলেন, ততই যেন তাঁহাদের দর্শন-পিপাসা বলবতী হইতে লাগিল । একবার দেখেন, আরবার

দেখিতে ইচ্ছা হয় । পুনরায় দেখেন, তথাপি লোচনের তৃপ্তি জন্মায় না । এইরূপে প্রতি দর্শনেই, যেন, বধুগণের সৌন্দর্য্যরাশি নূতন নূতন মূর্ত্তি ধারণ করিয়া, রামজননীদিগের হৃদয়ে অপূৰ্ণ সুখপ্রদান করিতে লাগিল । আহা ! তৎকালে মহিষীদিগের অন্তঃকরণে কি এক অনিৰ্ব্বচনীয় ভাবের উদয় হইয়াছিল । অনন্তর সকলে, মহাহর্ষে আশীঃপুষ্পাদি হস্তে করিয়া, ‘পতিরতা হইয়া বীরপ্রসবিনী হও’ এই বলিয়া বধুদিগকে আশীর্বাদ করিলেন ।

ক্রমে ক্রমে কোলিকরীতানুসারে, শুভ পরিণয়ের পর যে যে মাজলিক ক্রিয়াকলাপ করিতে হয়, তত্তাবতই সুসম্পন্ন হইল । অন্তঃপুরললনাগণ অভিনব বধুদিগকে লইয়া, নিত্য নিত্য নূতন উৎসবে কালযাপন করিতে লাগিলেন । তাহাতে বধুগণ পিতৃমাতৃ-বিয়োগনিবন্ধন দুঃখভার বড় অনুভব করিতে পারিলেন না । কএক দিবস ক্রমান্বয়ে নগরমধ্যে মহোৎসব হইতে লাগিল । কি প্রাতে, কি মধ্যাহ্নকালে, কি সায়াহ্নে, সকল সময়েই সকল স্থানে নৃত্যগীত বাদ্য আরম্ভ হইল । নগরবাসী তাবৎ লোকেই আনন্দসূচক বস্ত্রালঙ্কার পরিধান করিয়া মহাহর্ষ প্রকাশ করিতে লাগিল । দশরথও হৃষ্টচিত্তে দীন, দরিদ্র, অনাথগণকে অজস্র ধনদান করিতে লাগিলেন । যে যাহা ইচ্ছা করিল, তৎক্ষণাৎ তাহার অভিলাষ পূর্ণ করিয়া দিলেন ।

তদনন্তর পরিণয়োৎসব সমাপ্ত হইলে, ভিন্নদেশীয় সূর্য্যদ্বর্গ স্ব স্ব গৃহে প্রতিগমন করিলেন । পৌরজন, ভূত্যবর্গ ও প্রজালোক সকলে নিজ নিজ নিয়মিত কর্মে ব্যাপ্ত হইল । রাজা দশরথও প্রজাপালনকার্য্যে তৎপর হইলেন । রাজকুমারেরা নববধুদিগের

সহিত নিত্য নিত্য নব নব উৎসবে কালক্ষেপ করিতে লাগিলেন।
অম্পকালের মধ্যেই অভিনব দম্পতীদিগের হৃদয়ে অকৃত্রিম প্রণয়-
সঞ্চার হইতে লাগিল। পরস্পরের প্রতি পরস্পরের মন সমাকৃষ্ট
হইল। বধূগণ ছায়ার ন্যায় স্ব স্ব পতির অনুরাগিনী এবং বিশ্বস্তা
সখীর ন্যায় হিতৈষিনী হইলেন। ফলতঃ অনুরূপসমাগমে যেরূপ
অপারিসীম সুখের উদয় হয়, তাঁহাদের তদ্রূপই হইয়াছিল। রাজ-
পুত্রেরাও তাঁহাদের সুখে সুখী ও দুঃখে দুঃখী হইয়া, নিরন্তর বিশুদ্ধ
আনন্দপ্রমোদে দিনযামিনী অতিবাহন করিতে লাগিলেন।

চতুর্থ পরিচ্ছেদ।



এইরূপে কিছুকাল গত হইলে, এক দিবস রাজা দশরথ মনে মনে চিন্তা করিতে লাগিলেন, আমি বৃদ্ধ হইয়াছি, আর কতকালই বা বাঁচিব। শরীর ক্ষীণ, গ্রস্থি শিথিল, মাংস লুলিত, ইন্দ্রিয় সকল নিস্তেজ ও মস্তকের কেশ শুভ্রবর্ণ হইয়াছে। পূর্বে কত পরিশ্রম করিয়াছি, কিছুতেই কষ্ট বোধ হয় নাই। এক্ষণে সামান্য শ্রমেই শরীর পরিক্রান্ত হয়, সামান্য চিন্তায় চিত্তাবসাদ উপস্থিত হয়। শরীরের সঙ্গে সঙ্গে মনোবৃত্তি সকল বিকল ও নিস্তেজ হইয়া পড়িতেছে। কোন গুরুতর বিষয়ের আন্দোলনে আর আমার অধিক প্রবৃত্তি জন্মে না। সর্বদাই চিত্তবিভ্রম উপস্থিত হয়। এই এক বিষয়ের চিন্তা করিতেছি, অমনি তাহার সঙ্গে সঙ্গে বিষয়াস্তরের ভাবনা আসিয়া উদয় হয়। কোন প্রকার শ্রমসাধ্য কার্যে আর আমার উৎসাহ হয় না। এক্ষণে কেবল নিরুপদ্রবে নিশ্চিন্তচিত্তে কালযাপন করিব, সর্বক্ষণ এইমাত্র ইচ্ছা হয়। জরা আমার দেহ আক্রমণ করিয়া, আমাকে তৎসহচর নিদ্রা, তন্দ্রা, আলস্য প্রভৃতির অধীন করিয়াছে। এ সময়ে আমি যখন স্বীয় দেহভারবহনে অক্ষম, তখন দুর্ব্বল রাজ্যভারই বা কি প্রকারে বহন করিতে সমর্থ হইব। রাজ্যাশাসন বহু আয়াসসাধ্য ও সামর্থ্য-সাপেক্ষ। আমি যে অবস্থায় উপনীত হইয়াছি, ইহাতে প্রকৃতরূপে রাজ্যপালন করা দুষ্কর। অতএব এরূপ অবস্থায়, আমি হইতে প্রজাপুঞ্জের সর্বা-

জীন মঙ্গলসম্ভাবনা কিরূপে সম্ভবে । বস্তুতঃ এক্ষণে আমার শরীরের অবস্থা যেরূপ, তাহাতে আর বিষয়মৃগতৃষ্ণিকায় ভ্রান্ত হইয়া, যথা কালক্ষেপ করা বিধেয় নহে । আর যদি অন্তিমকাল পর্য্যন্তই একরূপ সাংসারিক ব্যাপারে লিপ্ত থাকিয়া, আপাত্তরম্য পরিণামবিরস পার্থিবস্বর্থে সময়ক্ষেপণ করি ; তবে আমার পরকালের দশা কি হইবে ? ইহলোকে ধর্মসঞ্চয় করিতে না পারিলে, পরলোকে পরি-
ত্নানের উপায়ান্তর নাই । অতএব এক্ষণে জ্যেষ্ঠতনয় গুণাকর
রামচন্দ্রের উপর রাজ্যভার সমর্পণ করিয়া, শেষদশায় পারত্রিক
মঙ্গলচিন্তা করাই কর্তব্য ।

মনে মনে এইরূপ কৃতসংকল্প হইয়া, রাজা দশরথ, অভিলষিত
বিষয়ের সমুচিতকর্তব্যনির্দ্ধারণের নিমিত্ত, মন্ত্রভবনে প্রবেশ করি-
লেন, এবং সমীপস্থ পরিচারকদ্বারা বশিষ্ঠদেবকে তথায় উপস্থিত
হইবার নিমিত্ত আজ্ঞান করিয়া পাঠাইলেন । বশিষ্ঠদেব তথায় উপ-
স্থিত হইয়া আসন পরিগ্রহ করিলে, রাজা আপন অভিপ্রায় ব্যক্ত
করিয়া, কহিলেন, ভগবন্ ! রঘুবংশীয়েরা শেষাবস্থায় গৃহস্থাপ্রম
পরিত্যাগ করিয়া, মুনিহস্তি অবলম্বন করিয়া থাকেন এবং ঈশ্বরচিন্তায়
জীবনের শেষভাগ অতিবাহন করেন । এক্ষণে আমার মানস, সেই
কুলক্রমাগত প্রশংসনীয় রীতির অনুসরণে জীবন ক্ষেপণ করি ।
আমি বদ্ধ হইয়াছি । আমার আর রাজকার্য্যপর্যালোচনায় ইচ্ছা
নাই । এ অবস্থায় আমার কেবল পরকালের চিন্তা করাই শ্রেয়ঃ ।
ভগবন্ ! আমি সংসারাপ্রমের বাবতীয় সুখ অনুভব করিলাম ।
আমার সকল প্রকার বাসনাই পরিপূর্ণ হইয়াছে । অতএব আর,
চর্কিতচর্কণবৎ যথা বিষয়ভোগে কালক্ষেপ করা উচিত নয় । এক্ষণে
আমি চিরসেবিতা রাজ্যলক্ষ্মী জ্যেষ্ঠপুত্র রামচন্দ্রকে সমর্পণ করিয়া,

নিশ্চিতচিত্তে ঈশ্বরচিন্তায় মনোনিবেশ করিব । রাজ্যাশাসন করিতে হইলে যে যে উৎকৃষ্ট গুণ থাকা আবশ্যিক, রামে তৎসমুদায়ই দৃষ্ট হয় । রাম সকল শাস্ত্রে পারদর্শী, সকল বিদ্যায় বিশারদ । বিশেষতঃ রাজনীতিতে অদ্ভুত নৈপুণ্য লাভ করিয়াছেন । কি পণ্ডিতমণ্ডলী, কি মন্ত্রিবর্গ, কি প্রজালোক, সকলেই রামচন্দ্রের অশেষ প্রশংসা করিয়া থাকেন । সর্বদা সর্বস্থানে রামের স্মৃতিশ্রুতি শুনিতে পাওয়া যায় । আমার বোধ হইতেছে, রামের যৌবরাজ্যে অভিষেক, কাহারও অপ্রীতিকর বা অসন্তোষের কারণ হইবে না । তথাপি কল্যাণপ্রাপ্তিতে রাজসভায় এ বিষয়ের প্রস্তাব উত্থাপন করিয়া, প্রজালোকের মতামত জিজ্ঞাসা করা যাইবে । এক্ষণে আপনার কি আদেশ হয়, জানিলে চরিতার্থ হইব ।

বশিষ্ঠদেব রাজার কথা শ্রবণ করিয়া, পরমপরিভূক্ত হইয়া, অশেষসাধুবাদ প্রদান পূর্বক কহিলেন, মহারাজ ! উত্তম সঙ্কল্প করিয়াছেন । আপনি যে বংশে জন্মগ্রহণ করিয়াছেন, ইহা তদনুরূপ কার্য্যই বটে । রঘুবংশীয় নৃপতিগণ অপত্যনির্ঝিংশেষে প্রজাপালন করিয়া পরিশ্রান্ত হইলে, চরমে রাজ্যসম্পত্তি পুত্রহস্তেসমর্পণ করিয়া বানপ্রস্থাপ্রমে প্রবেশ করেন । আপনারও সেই সময় উপস্থিত । অতএব আপনি যে রামচন্দ্রকে যৌবরাজ্যে অভিষিক্ত করিতে অভিলাষ করিয়াছেন, ইহা অতি প্রশংসনীয় । বিশেষতঃ কুমার রামচন্দ্রের অভিষেক সকলেরই প্রার্থনীয় । রাম রাজা হইবেন বলিয়া কেহই রুচি বা অসন্তুষ্ট হইবেন না । মহারাজ ! আমরা ইতিপূর্বে ভাবিয়াছিলাম, এবিষয়ে আপনাকে অনুরোধ করিব । যাহা হউক, মহারাজ যখন স্বয়ংই সেই অভিলষিত বিষয়ের অনুষ্ঠানে উদ্যত হইয়াছেন, তখন আর বিলম্ব করা কোন মতে কর্তব্য নয় ।

এ মধুর মধুমাস সৰ্ব্বকার্যে শুভদ; বিশেষতঃ মাজলিক ও প্রমোদ-
কর কার্যানুষ্ঠানের প্রকৃত সময় । এ সময়ে শীতগ্রীষ্মের সমভাব ।
পথ ঘাট পঙ্করহিত ও পরিষ্কৃত । কমলপরিমলবাহী মলয়মারুত
ধীরে ধীরে প্রবাহিত । আকাশমণ্ডল, মেঘরহিত হইয়া, নীলিমায়
রঞ্জিত । তরুলতার নব নব কিসলয় উদ্গাত । স্বচ্ছ সরোবর সকল
বিকসিত কমল, কুমুদ, কল্লোরাদি জলজকুসুমেরে নুশোভিত । এসময়ে
প্রকৃতি দেবী, যেন নূতন পরিচ্ছদ ধারণ করিয়া আহ্লাদভরে হাস্য
করিতেছেন । অতএব মহারাজ ! এমন রমণীয় বসন্তসময়ে
রামের অভিষেক সম্পাদন করিয়া, আপনি অচিরে পূর্ণমনোরথ
হউন ।

বশিষ্ঠদেব এই কথা বলিয়া বিরত হইলে, রাজা দশরথ শ্রীতি-
শ্রদ্ধাভ্রময়নে কহিলেন, ভগবন্ ! আপনার যে অভিরুচি ! শুভকার্য্য
যত শীঘ্র সম্পন্ন হয় ততই ভাল । কারণ, শুভকর্মে পদে পদে
বিপদ ও ব্যাঘাত ঘটিবার সম্ভাবনা । সুতরাং আমার আর এক
মুহূর্ত্তকালও বিলম্ব করিতে ইচ্ছা নাই । এক্ষণে কেবল প্রজালোকের
মত জিজ্ঞাসা করার অপেক্ষা রহিল । কল্য তাহাদের মত জিজ্ঞাসা
করিয়া, সত্ত্বর শুভকার্য্য সম্পন্ন করা যাইবে ।

পরদিন, দশরথ প্রাতঃকৃত্য সমাপন করিয়া, রাজসভায় গমন
করিলেন ; এবং ধর্ম্মাসনে আসীন হইয়া সভাস্থ সমুদয় লোককে
সম্বোধন করিয়া কহিলেন, হে সভাসদগণ ! এক্ষণে আমার জরা
উপস্থিত । এ বয়সে আমার পরকালের উপায় চিন্তা করাই বিধেয় ।
এই হেতু, আমি যুবরাজ রামচন্দ্রকে যৌবরাজ্যে অভিষিক্ত করিয়া,
রাজকাৰ্য্য হইতে অবসর গ্রহণ করিবার মানস করিয়াছি । এ বিষয়ে
তোমাদের মতামত কি ? দেখ, রাজা সৰ্ব্বপ্রকারে প্রজায়ত্ত ;

সকল বিষয়েই প্রজার মতামত গ্রহণ করিয়া কার্য্যনির্দ্ধারণ করা রাজার কর্তব্য । প্রজার অমতে কোন কৰ্ম্ম করা, রাজধর্ম্মের একান্ত বহির্ভূত । বিশেষতঃ রঘুবংশীয় কোন রাজা কন্মিন কালে প্রজালোকের বিরাগভাজন হন নাই । প্রজাই রাজার প্রধান সম্পত্তি, প্রজাই রাজার বিশেষ শক্তি, এবং প্রজাই রাজার সকল সুখের আশ্রয় । প্রজার সুখেই রাজার সুখ, প্রজার দুঃখেই রাজার দুঃখ, প্রজার মঙ্গলেই রাজার মঙ্গল । ফলতঃ প্রজা ভিন্ন রাজার আর গত্যন্তর নাই । প্রজাগণ অসুখী হইলে সে রাজার রাজ্য কিছুতেই রক্ষা পায় না । প্রজা যেমন রাজার অকৃত্রিম স্নেহের পাত্র ; তদ্রূপ রাজাও, প্রজার প্রগাঢ় ভক্তির ভাজন । রাজা যে পরিমাণে প্রজাকে ভাল বাসেন, রাজার প্রতি প্রজারও সেই পরিমাণে অনুরাগ জন্মিয়া থাকে । প্রজারঞ্জন যেমন প্রশস্ত রাজধর্ম্ম, রাজ-ভক্তিও সেইরূপ প্রজার অবশ্য কর্তব্য কৰ্ম্ম । বস্তুতঃ পিতাপুত্রে যেরূপ সম্বন্ধ, রাজাপ্রজাতেও অবিকল তদ্রূপ । অতএব প্রস্তাবিত বিষয় তোমাদের অভিমত কি না, জানিতে ইচ্ছা করি । এ বিষয়ে কুলগুরু বশিষ্ঠদেব সম্মতি প্রদান করিয়াছেন ; এক্ষণে তোমাদের অভিপ্রায় অবগত হইলেই কর্তব্যনিরূপণ করিব ।

দশরথ এইরূপ বলিয়া বিরত হইলে, তৎক্ষণাৎ সকলে একবাক্য হইয়া, আন্তরিক হর্ষ প্রদর্শন পূর্বক, তদ্বাক্যে অনুমোদন করিলেন । তখন দশরথ বশিষ্ঠদেবকে সন্মোদন করিয়া কহিলেন, ভগবন্ ! যখন রামাভিষেক আপনার অভিমত, বিশেষতঃ প্রজাবর্গের অনুমোদিত হইয়াছে, তখন আর তদ্রূপযোগী অনুষ্ঠানের কর্তব্যতাবিষয়ে কিছুমাত্র সন্দেহ নাই । এক্ষণে আপনি অভিষেকের দিনস্থির করুন । বশিষ্ঠদেব কহিলেন, মহারাজ ! পরশ্বঃ অতি

উত্তম দিন । সচরাচর এরূপ শুভ দিন পাওয়া দুর্ঘট । অতএব ঐ দিনেই রামচন্দ্রকে রাজ্যকার্য্যে দীক্ষিত করিয়া মনোরথ পূর্ণ করুন । তদনন্তরঃ রাজা দশরথ প্রধান প্রধান কর্ম্মচারীদিগকে নিকটে আহ্বান করিয়া কহিলেন, তোমরা, ভগবান্ বশিষ্ঠদেব যাহা কহিলেন, শুনিলে ; এক্ষণে আর কালহরণের আবশ্যকতা নাই । অদ্যই অভিষেকের বাবতীয় দ্রব্যসম্ভার আহরণ কর, এবং দেশদেশান্তরের রাজগণকে এরূপ সুযোগ করিয়া নিমন্ত্রণপত্র পাঠাও, যেন অদ্যই নিমন্ত্রণপত্র তাঁহাদিগের হস্তগত হয় । আমার অধিকারস্থ তাবৎ প্রদেশে এই ঘোষণা করিয়া দাও, পরশ্বঃ যুবরাজ রামচন্দ্র রাজা হইবেন, আগামী কল্য তাহার অধিবাস । দেখ, যেন রাজ্যমধ্যে কেহ অনিমন্ত্রিত বা অনাহূত না থাকে । অতি যত্নপূর্ব্বক সকল কার্য্য সমাধা করিবে । কোন বিষয়ের অসঙ্গতিনিবন্ধন যেন ক্ষোভ পাইতে না হয় । এইরূপ আজ্ঞা প্রদান করিয়া, তিনি হর্ষোৎফুল্লহৃদয়ে বিশ্রামভবনে প্রবেশ করিলেন, এবং সুমন্ত্রকে ডাকিয়া কহিলেন, রামকে ত্বরায় এখানে আনয়ন কর ।

রাজার আজ্ঞানুসারে, সমস্ত রামচন্দ্রের নিকট উপস্থিত হইয়া, অভিবাদনপূর্ব্বক ক্রুতাঞ্জলিপুটে নিবেদন করিল, যুবরাজ ! মহারাজ আপনাকে আহ্বান করিতেছেন ; কি আজ্ঞা হয় । রাম, পিতার আদেশশ্রবণে অতিমাত্র ব্যগ্রচিত্ত হইয়া, সুমন্ত্রের সহিত পিতার বিশ্রামভবনে উপস্থিত হইলেন । দশরথ প্রাণত পুত্রকে গাঢ় আলিঙ্গন করিয়া, প্রীতিপ্রকুলনয়নে গদগদবচনে কহিলেন, বৎস ! তুমি আমার জ্যেষ্ঠ সন্তান । এক্ষণে তুমি দুর্ব্বল রাজ্যভার বহনে উপযুক্ত হইয়াছ । অতএব পরশ্বঃ তোমাকে যৌবরাজ্যে অভিষিক্ত করিব । অতঃপর তুমি প্রজাপালনকার্য্যে দীক্ষিত হইয়া, পরম সুখে রাজ্য

ভোগ কর। তুমি সকল শাস্ত্র অধ্যয়ন করিয়াছ। সকল প্রকার বিদ্যাই তোমার হৃদয়দর্পণে নিরন্তর সমভাবে প্রতিকলিত হই-
তেছে। বিশেষতঃ, তুমি রাজনীতি উত্তমরূপে অবগত হইয়াছ,
লোকাচারেও সম্পূর্ণ অভিজ্ঞতা লাভ করিয়াছ। অতএব তোমার
প্রতি আর উপদেক্য কিছুই দেখিতেছি না। তবে আমার এই-
মাত্র বক্তব্য, সর্বদা তুমি প্রজারঞ্জন কার্যে তৎপর থাকিবে।
যাহাতে প্রজালোকের অসন্তোষ বা বিরক্তির কারণ উপস্থিত হয়,
এমন কার্যে কদাপি হস্তক্ষেপ করিও না।

রাম পিতার আদেশবাক্য শিরোধার্য করিয়া, জননীদর্শনার্থ
অন্তঃপুরমধ্যে প্রবেশ করিলেন, এবং মাতৃভবনের দ্বারদেশে উপ-
নীত হইয়া দেখিলেন, স্নেহময়ী জননী সন্তানের মঙ্গলকামনা
করিয়া, একান্তচিত্তে তগবতীর আরাধনা করিতেছেন। তিনি গৃহ-
ভ্যস্তরে প্রবিষ্ট হইয়া ভক্তিভাবে মাতৃচরণে প্রণিপাত করিলেন।
যেমন শুধাংশুদর্শনে জলধির জল, উদ্বেল হইয়া তীরভূমি প্লাবিত
করে, তদ্রূপ প্রণত প্রিয়পুত্রের বদন-সুধাকর সন্দর্শনে, কৌশল্যার
হৃদয়-কন্দর অপ্রমেয় আনন্দাতিশয়ে আপ্তবৃত্ত হইল। তিনি বারং-
বার সতৃষ্ণনয়নে রামের চন্দ্রানন নিরীক্ষণ করিয়া, স্নেহময় মধুর-
বাক্যে জিজ্ঞাসা করিলেন, হৃদয়নন্দন ! আজি পুরবাসিগণের মুখে
যে কথা প্রবণ করিলাম, তা কি সত্য ? মহারাজ না কি তোমাকে
রাজপদ প্রদান করিয়া, স্বয়ং শান্তিসুখসেবায় কালযাপন করিতে
মানস করিয়াছেন ? রাম, বিনয়বচনে কহিলেন, মাতঃ ! আপনি
যাহা বলিলেন, তাহা ষথার্থ বটে। অদ্য পিতৃদেব, আমাকে প্রজা-
পালনকার্যে ব্রতী করিবার অভিপ্রায় প্রকাশ করিয়াছেন ; পরঞ্চঃ
যৌবরাজ্যে অভিষিক্ত করিবেন।

রামজননী, তনয়যুথনিঃস্থত অমৃতায়মান বচনপরম্পরা শ্রবণে মনে মনে বিপুল হর্ষ লাভ করিয়া কহিলেন, রাম ! এতদিনের পর, বুঝি কুলদেবতারা প্রসন্ন হইয়া, আমার চিরশত্রুত মনোরথ পূর্ণ করিলেন । এতকালের পর বুঝি গুরুজনের আশীর্বাদ সফল হইল ! আমি কি শুভক্ষণেই তোমাকে গর্ভে ধারণ করিয়াছিলাম । তোমার গুণে রাজজননী হইলাম । বৎস ! তুমি রাজপরিচ্ছদ পরিধান করিয়া যখন সিংহাসনে উপবেশন করিবে, আর সকলে তোমাকে রাজশব্দে আহ্বান করিতে থাকিবে, তখন আমার মনে কি অপূর্ণ স্রুতের উদয় হইবে, বলিতে পারি না । এক্ষণে, রঘুকুল-দেবতাদিগের নিকট কায়মনোবাক্যে প্রার্থনা করি, তুমি নিরাপদে কুলক্রমাগত বিশাল রাজ্যলক্ষ্মী ভোগ করিয়া, পবিত্র বংশের গৌরব রক্ষি কর ।

কৌশল্যা এইরূপ বলিয়া বিরত হইতেছেন, এসম সময়ে লক্ষ্মণ রামের অভিব্যেকসংবাদ শ্রবণ করিয়া, হৃষ্টমনে তথায় আসিয়া উপস্থিত হইলেন । রাম লক্ষ্মণকে দেখিয়া সাদরসম্ভাষণে কহিলেন, বৎস ! পিতার আদেশক্রমে, পরশ্বঃ আমি রাজ্যভার গ্রহণ করিব । তোমরা আমার জীবিতস্বরূপ । নিরন্তর তোমাদের মঙ্গলানুষ্ঠানই আমার জীবনের প্রধান কর্তব্য এবং তোমাদের স্নেহসম্ভোগই আমার রাজ্যভার গ্রহণের একমাত্র উদ্দেশ্য । দুর্ব্বহ রাজ্যভার বহন করা নিতান্ত দুর্লভ ব্যাপার । কিন্তু আমি কেবল তোমাদের কল্যাণ সাধনের নিমিত্তই, এরূপ ত আয়াসসাধ্য ক্লেশকর কার্যের ভারগ্রহণে উদ্যত হইয়াছি । লক্ষ্মণ কহিলেন, আর্ষ্য ! আপনি ব্যতীত, এ নিখিল রঘুকুলের ভারবহনের উপযুক্ত পাত্র কে ? আপনি যেমন প্রভুত্বগুণবিশিষ্ট, পিতৃরাজ্যও তদ্রূপ বিশাল ।

এ রাজ্য কি অন্যের দ্বারা শাসিত হইতে পারে? রাম আশ্রমগৌরব প্রবণে লজ্জিত হইয়া, বদন অবনত করিলেন। তদনন্তর লক্ষ্মণের সহিত বহুবিধ সম্মেলনমধুর কথোপকথন করিয়া, জানকীভবনে গমন করিলেন এবং সীতাসমক্ষে পিতার আদেশ ব্যক্ত করিয়া, মনের উল্লাসে সে দিন অতিবাহন করিলেন।

পরদিন, নগরমধ্যে মহোৎসব হইতে লাগিল। কল্য রাম রাজা হইবেন, অদ্য তাহার অধিবাস, এই সংবাদ সর্বত্র প্রচারিত হইলে, নগরবাসী তাবৎ লোকেই, স্ব স্ব আবাসে মহোল্লাসে উৎসবসূচক ক্রিয়াকলাপ আরম্ভ করিল। অন্তঃপুররাজ্যনাগণ মনের আনন্দে সামাজিক কার্যে ব্যাপ্ত হইলেন। ভৃত্যবর্গ রাজদত্ত বেশভূষায় বিভূষিত হইয়া, হর্ষাতিশয়ের সহিত ইতস্ততঃ সঞ্চরণ করিতে লাগিল। রাজভবন ঐতিসুখাবহ বেণু, বীণা, মৃদঙ্গাদিধ্বনিতে পরিপূর্ণ হইল। ক্ষণকালমধ্যে রাজভবন উৎসবময় ও নগর আনন্দময় হইয়া উঠিল। নিরন্তর রামজয়শব্দে নগর প্রতিধ্বনিত হইতে লাগিল। ফলতঃ রাম রাজা হইবেন, ইহাতে সকল লোকে যে কিরূপ প্রমোদিত ও উল্লাসিত হইয়াছিল, তাহার ইয়ত্তা করা যায় না।

কল্য, যুবরাজের অভিষেক। রাজ্যজানুসারে আজি হইতেই রাজদ্বার অবারিত, কাহারও যাইবার বাধা নাই। সূতরাং অর্থিগণ অসংকুচিতচিত্তে রাজভবনে প্রবেশ করিয়া, কেহ বা অতীপ্সিত মিষ্টামলাভ, কেহ বা বিচিত্র বস্ত্রলাভ, কেহ বা প্রার্থনাধিক অর্থলাভ করিয়া, পরমানন্দে প্রত্যাভর্তন করিতে লাগিল। রাম রাজা হবেন, এমন সুখের দিন আর কবে হবে, এই ভাবিয়া, দশরথ কাম্পতরুর ন্যায় মনের উল্লাসে দীন দরিদ্রদিগের বাসনা পরিপূর্ণ করিতে লাগিলেন। রাজ্যমধ্যে যত বন্দী ছিল, সকলকে কারামুক্ত করিয়া

দিলেন । তাঁহার অধিকারমধ্যে আর কেহই অশ্রুধী রহিল না ।
রাম রাজ্যসনে বসিয়া প্রজাপালন করিবেন, এবং দণ্ডধর হইয়া
দুষ্কের দমন ও শিষ্টের পালন করিবেন ; এই বিষয়ের বতই তিনি
আন্দোলন করিতে লাগিলেন, ততই যেন তাঁহার অন্তরে অনির্ক-
চনীয় সুখসঞ্চার হইতে লাগিল এবং সর্বশরীর যেন অমৃতরসে
অভিষিক্ত হইয়া উঠিল । কলতঃ তৎকালে তিনি একরূপ আনন্দ-
বিচ্ছল হইয়াছিলেন, যেন পৃথিবী তাঁহার পক্ষে স্বর্গভূলা সুখের স্থান
বলিয়া প্রতীয়মান হইয়াছিল ।

আহা ! সুখের অবস্থা কাহারও চিরকাল সমভাবে যায় না ।
সুখের অবসানে দুঃখ, দুঃখের অবসানে সুখ, সম্পদের পর বিপদ,
বিপদের পর সম্পদ, অবশ্যই হইয়া থাকে । জগতের এই অপরিবর্ত-
নীয় নিয়ম, রথচক্রের ন্যায় চলিয়া আসিতেছে । ইহার অন্যথা
কখনই হয় না । যেমন দিবাকর অন্তর্গত হইলে, তমোময়ী বামি-
নীর সমাগম হইয়া থাকে, তদ্রূপ সুখের অবস্থা অন্তর্মিত হইলেই
দুঃখের দশা আসিয়া সমুপস্থিত হয় । রাজা দশরথ, পরমানন্দে
মনের সুখে, ঐহিক সুখের পরাকাষ্ঠী অমুভব করিতেছিলেন ; রাম
রাজা হবেন, ইহার জন্য তাঁহার কতই আমোদ, কতই আনন্দ
হইয়াছিল ; তিনি প্রতিক্ষণেই আপনাকে অপরিমিত সৌভাগ্যশালী
বলিয়া বিবেচনা করিতেছিলেন ; এমন সুখের সময়ে হঠাৎ তাঁহার
চিত্তের অবস্থান্তর সমুপস্থিত হইল । বামনয়ন অনবরত স্পন্দিত,
সর্বশরীর কম্পিত ও চিত্ত ব্যাকুলিত হইতে লাগিল । এমন আনন্দ-
দের সময়ে সহসা একরূপ ভাবান্তর হইল কেন, কিছুতেই নির্ধারণ
করিতে না পারিয়া, তিনি নিতান্ত উদ্ভ্রমনার ন্যায় অন্তঃপুরমধ্যে প্রবেশ
করিলেন । ক্রমে সুখের দিবা দেখিতে দেখিতে শেষ হইয়া গেল ।

এ দিকে, ভরতজননী কৈকেয়ী প্রিয়সহচরী মম্বরার কুপরামর্শে প্রলোভিত হইয়া, রামের অভিষেকসংক্রান্ত মহোৎসব, নয়নের বিষম অপ্রীতিকর এবং হৃদয়ে বিদ্ধ শেলস্বরূপ বিবেচনা করিতে লাগিলেন । একে স্ত্রীলোকের মন তুলখণ্ডের ন্যায় স্ফুটাবতঃ লঘু ও কোমল, সামান্য কারণ-বায়ুতেই বিচলিত হয়, তাহাতে আবার ক্রুর-মতি মম্বরার অসংপরামর্শরূপ প্রবলবাত্যাসংযোগ হইয়াছে ; সুতরাং কৈকেয়ীর হৃদয় একবারে বিপরীতভাবাপন্ন হইয়া, কোথ-দেব, হিংসা প্রভৃতি দ্বারা যুগপৎ সমাকীর্ণ হইল এবং রামের প্রতি ভাদৃশ স্নেহ, দয়া ও মমতা সকলই একবারে বিলীন হইল । তখন তিনি মনে মনে কহিতে লাগিলেন, যেমন এক বৃক্ষের বক্ষল কিছু-তেই বৃক্ষান্তরে লাগে না, তক্রপ সপত্নীপুত্র, পর বই, কখন আপন হয় না । রাম রাজা এবং সীতা রাজমহিষী হইবেন, আর আমার ভরত চিরকাল রাজ্যভোগে বঞ্চিত থাকিয়া, উহাদের অধীন হইয়া থাকিবে, ইহা ত আমি কখনই চক্ষে দেখিতে পারিব না । যখন সকলে সপত্নীকে রাজমাতা বলিয়া ডাকিবে, তখন উহা আমার কর্ণে যেন বিষবর্ষণের ন্যায় বোধ হইবে । আমি সপত্নীর সুখ কদাপি সূচক্ষে দেখিতে পারিব না । এক্ষণে যাহাতে রাম রাজা না হইয়া, আমার ভরত রাজপদ প্রাপ্ত হয়, এবং সপত্নী রাজার মা বলিয়া অহঙ্কার করিতে না পারে, আশু তাহার কোন উপায় স্থির করা কর্তব্য ।

এইরূপ ভাবিয়া কৈকেয়ী, সাদরসম্বোধনে প্রিয়সখীকে কহিলেন, মম্বরে ! বল দেখি, কি উপায়ে আমাদের অভীষ্টসিদ্ধ করি । মম্বরা পূর্বেই উপায় স্থির করিয়া রাখিয়াছিল, সুতরাং কণবিলম্বব্যতিরেকে কহিল, দেবি ! অসুরযুদ্ধে মহারাজ আহত হইলে, তুমি তাহার

যথেষ্ট শুভ্রা করা । তাহাতে মহারাজ সন্তুষ্ট হইয়া তোমাকে দুইটী বর দেন । এক্ষণে ঐ দুই বর দ্বারাই আমাদের অভী-
প্সিত কার্য সুসম্পন্ন হইবে । এই বলিয়া যে প্রকারে মহারাজের
নিকট বর প্রার্থনা করিতে হইবে, তৎসমুদায় কৈকেয়ীকে শিখাইয়া
দিল । কৈকেয়ী তদ্বাক্যশ্রবণে বিপুল হর্ষলাভ করিয়া, আপনার
অঞ্জের সমুদয় আভরণ পরিত্যাগ করিলেন ; এবং মলিনবেশে স্নান-
বদনে ধরাসনে শয়ন করিয়া, সজ্জননয়নে পুত্ৰিকণে মহারাজের
আগমন পুতীকা করিতে লাগিলেন ।

রাজা দশরথ অন্তঃপুর মধ্যে প্রবেশ করিয়া, অগ্রে, প্রিয়মহিষী
কৈকেয়ীর বাসভবনে গমন করিলেন । তিনি অন্যান্য মহিষীদিগের
অপেক্ষা কৈকেয়ীকে অধিকতর ভাল বাসিতেন এবং তদীয় রূপগুণে
একরূপ বিমোহিত হইয়াছিলেন যে, ক্ষণকালের জন্যও তাহার কাছ-
ছাড়া থাকিতে পারিতেন না । কেবল কৈকেয়ীর সহিত একত্র উপ-
বেশন, একত্র কথোপকথন করিতেই ভাল বাসিতেন । কৈকেয়ীর
বদন মলিন দেখিলে তাহার অন্তরের সীমা থাকিত না । এক্ষণে
রোরুদ্যমানা প্রিয়তমা কৈকেয়ীকে সহসা ধরাসনে নিরীক্ষণ করিয়া,
সচকিতনয়নে মনে মনে কহিতে লাগিলেন, এ কি, আজি প্রিয়ার
একরূপ ভাবান্তর দেখিতেছি কেন ? বুঝি কোন মহৎ অনিষ্টসংঘটন
হইয়া থাকিবে । বাহা হউক, ইহার কারণ জিজ্ঞাসা করি, এই বলিয়া
আলস্তে ব্যস্তে, প্রণয়পূর্ণ মধুরবচনে জিজ্ঞাসা করিলেন, প্রিয়ে !
আজি কি কারণে তোমার নয়ন-সরোবর উজ্জ্বলিত হইয়াছে । কি
নিমিত্তই বা তোমার মলিনময় অঙ্গাভরণ ধূলায় লুপ্তিত হইয়া
বিবর্ণ ও হীনপ্রভ হইয়া গিয়াছে । কি জন্য তুমি বিচিত্র বসন
পরিত্যাগ করিয়াছ । তোমার সে লাবণ্যময়ী হৃদয়হারিনী মূর্তির একরূপ

দশাবিপর্যয় কেন ? সেই মধুরালাপ, সেই বিলাস, সেই বিজয় সব কোথায় ? প্রিয়ে চারুশীলে ! তোমার একুপ অভাবনীয় অবহাস্তর কখন ত নয়নগোচর হয় নাই। তোমার কি কোন প্রিয়বিরহ বা অপ্রিয়-সংঘটন হইয়াছে ? অথবা কেহ কি তোমার প্রতি রূঢ় বা অপ্রিয় বাক্য প্রয়োগ করিয়া, জ্বলিত হৃতাশনে কিবা বিষধরমুখে আজ্ঞাসমর্পণ করিতে বাসনা করিয়াছে। মতুষা একুপ শোকের কারণ কি ? এক্ষণে সত্তর ইহার প্রকৃত কারণ বলিয়া, আমার জীবন রক্ষা কর ।

রাজার এবভূত প্রণয়গর্ভ, অনুনয়বাক্য শ্রবণ করিয়াও মহিষী কিছুমাত্র উত্তর করিলেন না, বরং পূর্বাপেক্ষা অধিকতর স্নানবদনে কপটক্রন্দন করিতে লাগিলেন। স্বল্পবয়সে লোকের মুক্তিহুতি এক-বারে বিলুপ্তপ্রায় হইয়া থাকে। রাজা মহিষীর প্রতারণা কিছুমাত্র বুঝিতে না পারিয়া, অতিকাতরকচনে কহিলেন, প্রিয়ে ! তোমার মুখ বিষয় ও লোচন অশ্রুপূর্ণ দেখিয়া, আমার মন অতিমাত্র ব্যাকুল হইতেছে। তোমার ঘন ঘন নিঃশ্বাসবায়ু দ্বারা আমার চিত্ত প্রতিক্রমেই বিষমচিন্তাতরঙ্গে মগ্নপ্রায় হইতেছে। আমি চিরকাল তোমার অভিপ্রায়ানুরূপ কাৰ্য্য করিয়া আসিয়াছি। এক্ষণে যদি অজ্ঞানতঃ কোন অপরাধের কাৰ্য্য করিয়া থাকি, প্রকাশ করিয়া বল ; উহার প্রতিবিধানে যত্নবান্ হই। সত্য বলিতেছি, বাহাতে তোমার চিত্ত ঐশ্বর্য হয়, বাহাতে তুমি সুখী হও, আমি কায়মনোবাক্যে তাহা করিতে ত্রুটি করিব না।

ঠেকেরী নৃপতির মুখনিঃসৃত অভিপ্রায়ানুরূপ বাক্যশ্রবণে কপটরোমন সংবরণ-পূর্বক, মনে মনে বিপুল হর্ষলাভ করিয়া কহিলেন, মহারাজ ! আপনাদিগ্ন স্বরণ থাকিতে পারে, যৎকালে আপনি

অনুরোধে আহত হন, তখন আমি আপনার বিস্তর সেবাও সুশ্রব করি। তাহাতে মহারাজ এ দাসীর প্রতি প্রসন্ন হইয়া দুইটি বর প্রতিক্ষত হন। আজ আমি ঐ দুই বর চাহিতেছি, প্রদান করুন। সরলহৃদয় রাজা হৃষ্টচিত্তে কহিলেন, প্রিয়ে! তোমাকে আমার অদেয় কিছুই নাই। আমার এই রাজ্য, পরিজন, ঐশ্বর্য, তাবতই তোমার। আমি কেবল নামমাত্র রাজা; বস্তুতঃ তুমিই এ সমুদয়ের অধীশ্বরী। অতএব আমি শপথ করিয়া বলিতেছি, তুমি যে অভিলাষ করিবে, অচিরে আমাদ্বারা উহা সম্পাদিত হইবে।

কৈকেয়ী মনোভিলাষ ফলোন্মুখ দেখিয়া, উল্লসিতমনে ধর্ম-সাক্ষী করিয়া কহিলেন, মহারাজ! যদি আপনি আমার বাসনা পরিপূর্ণ করিতে, স্বীকৃত হইলেন; তবে আমি এক বরে ভরতের যৌবরাজ্যে অভিষেক, ও অন্য বরে, চতুর্দশ বৎসর রামের বনবাস প্রার্থনা করিলাম। আপনার ন্যায় সত্যবাদী ও সত্যপ্রতিজ্ঞ জগতে আর নাই। এক্ষণে আপনি স্বকৃতপ্রতিজ্ঞাপালন করিয়া সত্যধর্ম রক্ষা করুন।

রাজা দশরথ, কৈকেয়ীর এবল্লুত মর্ম্মভেদী প্রার্থনাবাক্য শ্রবণে হতবুদ্ধি হইয়া, কণকাল স্তব্ধভাবে দণ্ডায়মান রহিলেন। তৎপরে হা রাম! বলিয়া উন্মূল্লিত ভরুর ন্যায় ভূতলে পতিত হইলেন। তাঁহার সর্কশরীর কল্পিত, মস্তক ঘর্ণিত, নয়নজলে বক্ষঃস্থল প্রাবিত, এবং সর্কীবয়বের শোণিত যেন শুষ্কপ্রায় হইতে লাগিল। তখন তিনি কি করিবেন, কি বলিবেন, কিছুই নির্ণয় করিতে না পারিয়া, কিয়ৎকাল অধোমুখে মৌনাবলম্বন করিয়া রহিলেন। পরে, মুহূর্মুহ দীর্ঘনিঃশ্বাস পরিত্যাগ করিয়া, মনে মনে কহিতে লাগিলেন, হায়! কি সর্বনাশের কথা শুনিলাম! এমন সুখের সময়ে, মহিষীর

মুখ হইতে একরূপ নিদারুণবাক্য নির্গত হইবে, ইহা স্বপ্নেরও অগোচর । হায় ! কেন আমার এই মুহূর্ত্তেই মৃত্যু হইল না । কেন আমি এখনও জীবিত রহিয়াছি । আমার হৃদয় কেন এখনও বিদীর্ণ হইতেছে না । আমি আপনার সর্বনাশের জন্যই কি বরষার প্রতিশ্রুত হইয়াছিলাম । এই নিমিত্তই বুঝি, আবার পুনরায় অলঙ্ঘনীয় প্রতিজ্ঞাসূত্রে আবদ্ধ হইলাম । আমি আপনার বিপদ আপনাই করিলাম । আমার অপরিণামদর্শিতার ও অবিমূষ্যকারিতার দোষেই এই বিষম বিপদ উপস্থিত হইল । হায় ! যদি অগ্রপশ্চাৎ বিবেচনা করিয়া কাৰ্য্য করিতাম, তাহা হইলে আর আমাকে একরূপ অভাবনীয় বিষম সঙ্কটে পতিত হইতে হইত না । রাজা এইরূপে মনে মনে বহুবিধ আক্ষেপ করিয়া; অবশেষে মহিষীর চিত্তপ্রসাদ ভিন্ন উপায়ান্তর নাই, ইহাই স্থির করিলেন ।

তদনন্তর, দশরথ অপেক্ষাকৃত চিত্তের ঐশ্বর্য্যসম্পাদন পূর্ব্বক, সজলনয়নে কাতরবচনে কৈকেয়ীকে সম্বোধন করিয়া কহিলেন, দেবি ! আমি জন্মাবধি তোমার মুখ হইতে কখন রুঢ় বা অপ্রিয় কথা শ্রবণ করি নাই । আজি কেন তুমি একরূপ সর্বনাশের কথা কহিলে ? তোমায় এ বুদ্ধি কে দিল ? তুমি এ স্বার্থশালিনী বুদ্ধি কোথা হইতে পাইলে ? কোথায় কল্য রামকে রাজ্যাসনে উপবিষ্ট দেখিয়া বিপুল হর্ষলাভ করিবে, না আজি তুমি সামান্য বনিতার ন্যায় বিমাতৃত্বাব অবলম্বন করিয়া, সেই প্রাণপ্রতিম রামচন্দ্রের অরণ্যবাস প্রার্থনা করিতেছ । ছি ছি, এ পাপসঙ্কল্প হইতে বিরত হও । এমন ইচ্ছা আর কখন করিও না । রাম আমার জীবনের জীবন । পৃথিবীতে যত প্রকার প্রিয়বস্তু আছে, রাম আমার সর্বাপেক্ষা অধিক প্রিয় । আমি, এমন জীবনসর্বস্ব রামচন্দ্রকে

কেমন করিয়া বনে পাঠাইবা। রাম আমার প্রাণ হইতেও প্রিয়তর । আমি সে রামকে কি অরণ্যবাসী করিতে পারি ? দেখ, এ জগতে রাম কাহারও অপ্রিয়ভাজন বা অসুখের হেতুভূত নহেন । সকলেই বৎসকে সমধিক সমাদর, প্রগাঢ় স্নেহ ও বহুল সম্মান করিয়া থাকে । তুমি সে রামচন্দ্রের কেন অনর্থক অমঙ্গলচিন্তা করিতেছ ? আরো বলি ; দেখ তুমি, স্বয়ংই আমার নিকট কত দিন কহিয়াছ যে, রাম কৌশল্য অপেক্ষা তোমাকে অধিক ভক্তি ও সমাদর করিয়া থাকে । কিন্তু তোমার ভরত তোমার প্রতি সেরূপ অনুরাগ ও বস্ত্র প্রদর্শন করে না । তুমিও তুমি সপত্নীপুত্র না ভাবিয়া, ভরত অপেক্ষা রামকে অধিক স্নেহ করিয়া থাক । তবে তুমি, আজি কেন প্রিয় রামের অনিষ্টসাধনে উদ্যত হইয়াছ ? 'ভাল, তোমাকেই কেন জিজ্ঞাসা করি না ; তুমি সেই প্রাণাধিক সরলাঙ্গা বৎস রামচন্দ্রকে স্বাপদসঙ্কুল বিজনবনে বিসর্জ্জন দিয়া, কি প্রকারে নিশ্চিন্ত থাকিবে ? তোমার মন কি কাতর হইবে না ? দেখ ; আমার রাম ক্ষীরকণ্ঠ, অতি শিশু । শিশুকাল কিছু বনবাসের সময় নহে । এখন কোথা, আমরা পুত্রহন্তে রাজ্যভার সমর্পণ করিয়া অরণ্যে বাস করিব, না তুমি বৎসকে বনবাসী করিতে অভিলাষ করিতেছ । অতএব তোমার এ অভিলাষ কতদূর অসঙ্গত, তাহা কেন তুমি স্বয়ংই বিবেচনা করিয়া দেখ না ? অগ্নি অপ্রিয়বাদিনি ! তুমি এমন কথা আর কথক মুখাগ্রে আনিও না । আরো বলি, দেখ, গুণশ্রেষ্ঠ জ্যেষ্ঠসদে, কনিষ্ঠের রাজ্যপ্রাপ্তি কখন শাস্ত্রসংঘত, নহে । রাম বয়োজ্যেষ্ঠ, ভরত কনিষ্ঠ । অতএব রাম থাকিতে কিপ্রকারে ভরতকে রাজপদ প্রদান করা যাইতে পারে । তাহা হইলে লোকে কি বলিবে ? আমি নিশ্চয় বলিতেছি, রাম থাকিতে ভরত কখনই রাজ্যোপাধি গ্রহণে

সম্মত হইবে না । রামের প্রতি তাহার অচলা ভক্তি আছে । অতএব তুমি এ ছরাশা পরিত্যাগ কর । তুমি আর বাহ্য চাহিবে, তাহা দিব । কি ধন, কি পরিজন, কি রাজ্য সকলই তোমাকে দান করিতেছি । অধিক কি, যদি তোমার সন্তোষের জন্য পুণ পৰ্য্যন্ত পরিত্যাগ করিতে হয়, তাহাতেও কাতর নহি । কিন্তু আমার পুণের পুণ রামচন্দ্রকে কখন বনবাস দিতে পারিব না । দেখ, রাম এক মুহূর্ত্ত আমার চক্ষুর অন্তরাল হইলে, দশদিক অন্ধকারময়, জগৎ অরণ্যময়, সংসার বিষময়, এবং দেহ শূন্যময় বোধ হইয়া থাকে । অতএব হে পতিরতে প্রমদে ! যদি সুামীর সুখস্বচ্ছন্দ কামনাই গুণ-বতী ভার্য্যার একমাত্র প্রার্থনীয় হয় ; যদি পতির প্রিয়কার্য্য সতীর অবশ্যকর্তব্য বলিয়া পরিগণিত হয় ; যদি পতির প্রাণ পতিপরায়ণা কামিনীর সুখসৌভাগ্যের অদ্বিতীয় উপায় হয় ; এবং স্বামিবাক্য-প্রতিপালন পতিব্রতা নারীর লক্ষণ হয় ; তবে আমি তোমার চরণে ধরিয়া বিনয় করিতেছি, তুমি ক্ষান্ত হও ; রামের প্রতি রাগ দ্বেষ সকলই পরিত্যাগ কর, এবং রামকে রাজত্ব প্রদান করিয়া আমার জীবন দান কর ।

রাজার এইরূপ বিনয় ও পরিতাপ বাক্য শ্রবণ করিয়া, বিনয়-বধিরা কৈকেয়ীর বজ্রলেপময় হৃদয়ে, বিন্দুস্রাজ করুণারসের সঞ্চার হইল না । বরং প্রজ্জ্বলিত অনলে ঘৃতনিক্ষেপের ন্যায়, তাহার চিত্ত একবারে কোপানলে জ্বলিয়া উঠিল । কৈকেয়ী পাদদলিতা বিষধরীর ন্যায়, অকুশাহতা করেণুর ন্যায় বিষম কোপপ্রকাশ পূর্ব্বক, দশ-রথকে বহুতর ভৎসনা করিয়া, নিষ্করুণ বচনে কহিল, মহারাজ ! পূর্ব্বে বরদান করিয়া, পরে অহুতাপ করা অতি অনার্থের কার্য্য । আপনি ইচ্ছাপূর্ব্বক আমাকে বরদ্বয় প্রতিজ্ঞাত হইয়াছেন, তদনুসারে

আমি আপন অভিমত প্রার্থনা করিয়াছি ; ইহাতে আমার দোষ কি ? বলুন দেখি, স্বকৃত অঙ্গীকারপালন না করা, কতদূর অধাৰ্ম্মিকের কার্য্য ? কল্পিনকালে কোন রাজা এরূপ অধৰ্ম্মসঞ্চয় করিতে প্রবৃত্ত হন না । কি আশ্চর্য্য ! কালে সকলকেই বিপরীতভাবাপন্ন দেখিতেছি । এক্ষণে কি আপনার দেহের সহিত সমগুণ সকলও জরাভিভূত হইয়া পড়িল ? কোথায় অন্য কেহ অধৰ্ম্মাচরণ করিলে, আপনি তাহার সমুচিত শাস্তিবিধান করিবেন ; না নিজেই, প্রতিজ্ঞাভঙ্গরূপ মহা-প্রত্যবাসে নিমগ্ন হইতে বাসনা করিতেছেন । ইহা কি ভবাদৃশ রাজাধিরাজের উচিত কার্য্য হইতেছে ? আপনি এতদিন যে ধাৰ্ম্মিক, সত্যপরায়ণ, ও স্থিরপ্রতিজ্ঞ বলিয়া পরিচয় দিতেন, এখন আপনার সে সত্যবাদিতা, সে ধাৰ্ম্মিকতা কোথায় ? আমি নিশ্চয় বলিতেছি, অসুন্দরশী লোকেরাই আপনাকে ধৰ্ম্মপরায়ণ, সত্যবাদী বলিয়া প্রশংসা করিয়া থাকে । বস্তুতঃ আপনার ন্যায় মিথ্যাবাদী, স্বার্থপর, প্রতারক ও অধাৰ্ম্মিক আর দুটী নাই । আপনি রুদ্ধ হইয়াছেন, আজি বাদে কাল মরিতে বাইবেন, তথাপি এখন পর্য্যন্ত কি দুহৃতিতে ভীত নহেন ? জিজ্ঞাসা করি, প্রবঞ্চনা কি প্রশস্ত রাজ-ধৰ্ম্মের অঙ্গ ? যে ব্যক্তি স্বকাৰ্য্যসাধনের জন্য পূৰ্বে প্রতিশ্রুত হইয়া, পরে উহা প্রতিপালন করিতে অস্বীকৃত হয়, তাহাকে মিথ্যাবাদী, অস্থিরচিত্ত ও কাপুরুষ ভিন্ন আর কি বলা যাইতে পারে ? বলুন দেখি, আপনার পূৰ্বে কখন কোন রাজা স্বকৃত প্রতিজ্ঞাবাক্য উল্লঙ্ঘন করিয়া, ছুরপনেন্ন পাপসংগ্রহ করিয়াছেন ? অতএব আজি কেন আপনার এরূপ ছুরুক্ষি উপস্থিত হইল । আপনি এক্ষণে প্রতিশ্রুতপালনে অস্বীকৃত হইয়া, কেন সেই চিরনিখল ইক্ষ্বাকু-বংশকে অভিনব কলঙ্কস্পর্শে দূষিত করিতে অভিলাষী হইতেছেন ।

মহারাজ ! এমন কার্য কখন করিবেন না । যখন ধর্মসমক্ষে আমায় বরদ্বয় প্রতিক্ষুত হইয়াছেন, এবং সেই বরদ্বয় প্রদান করিবেন বলিয়া, পুনরায় অঙ্গীকার করিয়াছেন, তখন অবশ্যই আমার অভিলাষ পরিপূর্ণ করিতে হইবে । আমি ষথার্থ বলিতেছি, আমার প্রার্থনা কখন অন্যথা হইবে না । সপত্নীপুত্র রাজা হইবে, আর আমার ভরত চিরকাল তাহার দাস হইয়া থাকিবে; ইহা আমি প্রাণ থাকিতে কখন চক্ষে দেখিতে পারিব না । অধিক কি, যদি মহারাজ কল্য রামকে বনবাস না দেন ; তাহা হইলে আমি নিশ্চয়ই মহারাজের সমক্ষে আত্মঘাতিনী হইব । যদি স্ত্রীবধরূপ দুরপনয় পাতক স্পর্শ করিতে বাসনা না করেন, যদি প্রতিক্ষুত প্রতিপালন প্রকৃত পুরুষার্থ বলিয়া সূীকার করেন, যদি ধর্ম্মে আপনার ভয় থাকে, তবে অনন্যমনে আমার প্রার্থনা পূর্ণ করুন ; এবং রামকে নির্দোষিত করিয়া প্রকৃত রাজধর্ম্ম রক্ষা করুন ।

রাজা অশ্রবণমাত্র, অনন্যোপায় বিবেচনা করিয়া, হা হতোৎস্মি বলিয়া পুনরায় মুচ্ছিত ও ভূতলে পতিত হইলেন । কিয়ৎকাল পরে চেতনাসঞ্চার হইলে, তিনি গলদঞ্জনয়নে কাতরবচনে বহু বিলাপ ও পরিতাপ করিয়া কহিতে লাগিলেন, হায় ! কেন আমার মুচ্ছা অপগত হইল । কেন আমি পুনরায় সংজ্ঞালাভ করিলাম । যদি এ মুহূর্ত্তেই আমার প্রাণ বিয়োগ হইত, তাহা হইলে আর আমাকে একরূপ বিষম সঙ্কটে পতিত হইতে হইত না । যদি এখনই আমার মস্তকে বজ্রঘাত হইত, তাহা হইলে আমি চরিতার্থ হইতাম । হা বিধাতঃ ! তোমার মনে কি এই ছিল ? দক্ষবিধে ! এই নরাধমের ললাটে কি এই লিখিয়া রাখিয়াছিলে ? হায় ! আমি কেমন করিয়া নৃশংস রাক্ষসের ন্যায় এমন লোমহর্ষণ কার্য্যে প্রবৃত্ত

হইব । কেমন করিয়া, “রাম ! তুমি রাজপদ পরিত্যাগ করিয়া অরণ্যে গমন কর,” এই নিদারুণ সৰ্কনাশের কথা মুখে উচ্চারণ করিব । হা বৎস রামচন্দ্র ! হা গুণনিধে ! হা রঘুকুলধুরন্ধর ! হা পিতৃবৎসল ! হা জীবনসৰ্কসু ! হা হৃদয়নন্দন ! এই নরাধম পিতা হইতেই তোমার সৰ্কনাশ উপস্থিত হইল । এই মূঢ় পাপাত্মাই, তোমার সমস্ত দুঃখের একমাত্র কারণ । এই নৃশংস হতভাগ্য পিতাই, তোমার যাবতীর বিপদের অধিতীয় হেতু । এই ছুরাত্মা স্ত্রৈণ পিতাই তোমার সকল অমঙ্গলের নিদান ।

এইরূপ আক্ষেপ করিয়া, রাজা ক্রণকাল অনন্যদৃষ্টিতে অধোমুখে রহিলেন । তদনন্তর ঘন ঘন দীর্ঘ নিঃশ্বাস পরিত্যাগ পূৰ্ব্বক, সহসা উদ্ভূতরোষাবেগসহকারে কৈকেয়ীকে নানা প্রাকার তিরস্কার করিয়া কহিলেন, আংপাপীয়সি, নৃশংসে, কেকয়কুলকলঙ্কিনি ! পরিণামে তুই যে আমার এরূপ সৰ্কনাশ করিবি, ইহা কখন সুপ্তেও জ্ঞানি না । আমি এতকাল স্বর্ণলতাভ্রমে বিষবল্লী আশ্রয় করিয়াছিলাম, সুধাজমে গরল সংগ্রহ করিয়াছিলাম, মণিময়হারভ্রমে কালবিষধরী কণ্ঠে ধারণ করিয়াছিলাম । রে কেকয়কুলপাংশুলে ! তুই রাজকুলে জন্মগ্রহণ করিয়াছিস, কিন্তু তোর আচরণ রাক্ষসীরও অপেক্ষা অধম । তুই নিশাচরীর ন্যায় মায়াজাল বিস্তার করিয়া, দশরথের সৰ্কনাশ করিতে বসিয়াছিস, অসতীর ন্যায় পতির প্রাণসংহারে উদ্যত হইয়াছিস ; এবং ব্রহ্মশাপের ন্যায়, চিরক্রমাগত প্রশস্ত রাজবংশ ধ্বংস করিতে প্ররত্ত হইয়াছিস । জগতে তোর মত নিষ্ঠুরা নারী আর কে আছে ? রে পতিঘাতিনি আচারনিষ্ঠুবে ! স্ত্রীজাতিশুলভ লজ্জা, করুণা ও মমতা, কি তোর পাষণময় হৃদয় হইতে একবারে তিরোহিত হইয়াছে ? আমি বারংবার এত অনুনয়

বিনয় করিয়া বলিলাম, আমার জীবন রামায়ত্ত । আমি রাম বিনা
বুদ্ধমাত্র প্রাণধারণ করিতে পারিব না । তথাপি তুই এপয্যন্ত
বৎসের প্রতি বৈরিভাব পরিত্যাগ করিলি না, বরং নির্ঘমা অসতী
নারীর ন্যায় নির্দক্ষসহকারে সেই প্রাণাধিক জগচ্ছত্র রামচন্দ্রের
নির্ধাসন প্রার্থনা করিতেছিস । রে পাপীয়সি ! তোরা হৃদয় কি
নিতান্তই বজ্রসারময় ; কিছুতেই দ্রব হইবার নহে ? হায় ! কেন
আমি নারীরূপিণী কালসপী গৃহে আনিয়াছিলাম । কেনই বা আমি
এর পরিণয় সুীকার করিয়াছিলাম । কেনই বা রাক্ষসীর আপাত-
মধুর প্রবঞ্চনাবাক্যে বিমোহিত হইয়া, ইহাকে বরদান অঙ্গীকার
করিয়াছিলাম । হায় ! কি হেতু আমার তৎকালে একরূপ দুর্বুদ্ধি
উপস্থিত হইয়াছিল । কেন আমি মায়াবিনী অসতীর প্রতিজ্ঞাপাশে
আবদ্ধ হইয়াছিলাম । হা দিক ! স্ত্রীর বাক্যে আমাকে একরূপ অভূত-
পূর্ব, অশ্রুতপূর্ব, বিষমকাণ্ড সম্পাদনে প্ররত্ত হইতে হইল । প্রাণ
যায় সেও সুীকার, তথাপি আমি একরূপ নিদারুণ বাক্য কখনই মুখে
আনিতে পারিব না । ইহাতে যাহা হবার তা হউক ।

রে নৃশংসে ! পুত্র অপেক্ষা প্রিয়বস্তু জগতে আর কি আছে ?
আমি পিতা হইয়া, সেই প্রাণপ্রতিম পুত্রধনকে কেনন করিয়া,
অনাথের ন্যায় গহনকাননে বিসর্জন দিব ? তাহা হইলে জগতে
আমার অপযশ ছুর্নিবার হইয়া উঠিবে । আমি এমন কাৰ্য্য কখনই
করিতে পারিব না । রে পাপীয়সি ! তুই মনে করিয়াছিস যে, রাজ-
মাতা হইয়া সকলের উপর আধিপত্য করিবি ; কিন্তু আমি কখনই
তাহা হইতে দিব না । তুই যদি এখনও নিরস্ত না হস্, তবে এই
দণ্ডেই তোরা ভরতকে ত্যজ্যপুত্র করিবি । তাহা হইলে তোরা আশা
ভরসা সকলই একবারে নির্মূল হইয়া যাইবে ।

কৈকেয়ী শুনিয়া গম্ভীরস্বরে কহিল, মহারাজ ! আপনি যতই কেন বলুন না, যতই কেন তিরস্কার করুন না, যতই কেন ভয় দেখান না, কৈকেয়ীর চিত্ত কিছুতেই ভীত বা বিচলিত হইবার নহে। যদি ভান্স পূর্বাদিকভাবে অন্তর্মিত হয়, যদি মরুভূমিতে কনকপদ্ম প্রস্ফুটিত হয়, যদি মেরু উৎপাটিত হয় ; তথাপি কৈকেয়ীর প্রার্থনা কিছুতেই অন্যথা হইবে না। আপনি যখন দুম্পরিকর ধর্মশৃঙ্খলে আবদ্ধ হইয়াছেন, তখন অবশ্যই আমার অভিমত কার্য সম্পাদন করিতে হইবে। কিছুতেই ইহার বিপর্যয় হইবে না।

দশরথ মনে করিয়াছিলেন, যদি অল্পনয়ে না হইল, তবে তিরস্কার ও ভয়প্রদর্শন করিলে, অবশ্যই কৈকেয়ীর চিত্ত নত্ৰভাব অবলম্বন করিবে। কিন্তু যখন দেখিলেন, কিছুতেই পাপীয়সীর মন নত হইবার নহে ; তখন একবারে হতাশ হইয়া, হায় ! কি হইল, বলিয়া অনিবার্য্যবেগে অশ্রুবারি বিসর্জন করিতে লাগিলেন। অনন্তর একান্ত আকুল হৃদয় ও কল্পিতকলেবর হইয়া, করুণস্বরে কহিতে লাগিলেন, হা বৎস রামচন্দ্র ! এমন সুখের সময়ে তোমার এরূপ দুর্গতি ঘটবে, কখন স্বপ্নেও উদয় হয় নাই। হায় ! আমার আর জীবিত থাকিবার প্রয়োজন কি ? আমার সকল সুখ ও সকল আশা একবারে তিরোহিত হইয়াছে। হায় ! আমার দক্ষহৃদয় এখনও কেন বিদীর্ণ হইল না। রে চক্ষু ! তুমি অন্ধ হও। রে শ্রবণ ! তুমি বধির হও। রে হত জীবন ! তুমি বহির্গত হও ; কি সুখে আর এ পাপাত্মার দেহে অবস্থান করিতেছ। রে বজ্র ! তুমি কি এ ছুরাচারের হৃদয় বিদারণ করিতে ভীত হইতেছ ? রে মৃত্যু ! তুমি কি এ নরাধমের দেহ স্পর্শ করিতে সঙ্কুচিত হইতেছ ? রে কাল !

আর বিলম্ব করিও না ; যত শীঘ্র পার, কৃপা করিয়া এ নরাধমের, এ পাপাত্মার প্রাণসংহার কর । আমাকে যেন এ বিষম কাণ্ড আর দেখিতে না হয় ।

এইরূপ বহুবিলাপ ও পরিতাপ করিয়া রাজা অশ্রুপূর্ণলোচনে কাতরবচনে, কৌশল্যাকে উদ্দেশ্য করিয়া কহিলেন, দেবি ! এখানে কি সৰ্কনাশ উপস্থিত হইয়াছে, কিছুই জানিতে পার নাই । মায়া-
বিনী কৈকেয়ীর কপটবাক্যে বিমোহিত হইয়া, মৃত দশরথ তোমার জীবনসৰ্কস, সৰ্কগুণসম্পন্ন অঞ্চলের নিধিকে, অনাথের ন্যায় গহন-
বনে বিসর্জিত দিতে উদ্যত হইয়াছে । আহা ! আমি এ পাপীয়সী রাক্ষসীর ভয়ে এক দিনের জন্যেও, তোমাকে যথোচিত স্নখী
করিতে পারি নাই । আবার এখন তোমার সৰ্কনাশে প্ররক্ত হই-
য়াছি । তুমি আর এ চরাপরাধীর, এ কৃতঘ্নের, এ নরাধমের
মুখাবলোকন করিও না ; করিলে, একান্ত অপবিত্র হইবে । হায় !
হায় ! আমি এরূপবয়সে স্ত্রীহত্যা করিতে বসিলাম । এ নিদারুণ কথা
দেবীর কর্ণগোচর হইলে, তিনি এক মুহূর্ত্তও প্রাণধারণ করিতে
পারিবেন না । হায় ! কি হইল । হায় ! আমি কি করিলাম । শেষে
আমার অদৃষ্টে কি এই ছিল যে, অসতী নারীর মায়াপাশে আবদ্ধ
হইয়া, আমাকে ইহলোকে বাহার পর নাই অকীৰ্ত্তিভাজন ও পর-
লোকে নিরয়গামী হইতে হইল ! হা ভগবন্ বশিষ্ঠ ! হা মহর্ষে
বিশ্বামিত্র ! হা সখে জনক ! তোমরা কোথায় : এ বিষমসঙ্কটে সমু-
চিত কর্তব্য কি বলিয়া দাও । হা প্রজাবর্গ ! রাম রাজা হবেন বলিয়া,
তোমরা কতই আমোদ, কতই আনন্দ, কতই উৎসব, কতই আশা
করিতেছিলে ; কিন্তু এক্ষণে তোমাদের সে সব একমাত্র বিষাদ-
সাগরে পরিক্ষিপ্ত হইল । তোমরা আর কখন এ মৃত পাপাত্মার

অপবিত্র নাম মুখে আনিও না । হায় ! আমি কি মহাপাতকী ! !
জন্মাবচ্ছিন্নে কেহ কখন বাহা করিতে সাহসী হয় নাই, অধুনা আমি
সেই অপত্যস্নেহসেতু ভগ্ন করিয়া, জগদ্বিখ্যাত চিরপবিত্র রঘু-
কুলকে অপরিহার্য্য অভিনব কলঙ্কে একান্ত দূষিত করিলাম । হা
বৎস ! কোথায় কাল তুমি রাজা হইবে, না তোমাকে হস্তগত
রাজ্যাধিকার পরিত্যাগ করিয়া, বনে গমন করিতে হইল ! এই
বলিয়া দশরথ পুনরায় মুচ্ছিত ও ভূতলে পতিত হইলেন । ক্রমে
যাতনাময়ী যামিনীর অবসান হইল । নিশাপতি যেন কৈকেয়ীর
ভয়ে ভীত হইয়াই, অন্তাচলের নিভৃতপ্রদেশে প্রস্থান করিলেন ।
তারকাবলী জুপালের মুখমণ্ডলের ন্যায় হীনপ্রভ হইয়া, পাণ্ডুবর্ণ
আকার ধারণ করিল । বিহঙ্গমকুল নৃপতির দুঃখে দুঃখিত হইয়াই,
যেন কুজনচ্ছলে ক্রন্দন করিয়া উঠিল । রাজার নিঃশ্বাসবায়ুর স্তম্ভনা-
বস্থা দেখিয়াই, যেন সমীরণ ভয়ে মন্দ মন্দ সঞ্চরিত হইতে লাগিল ।
দেখিতে দেখিতে, রাজার হৃদয়কন্দর ভিন্ন, জগতের সমুদায় স্থান
আলোকময় হইয়া উঠিল ।

পঞ্চম পরিচ্ছেদ ।



পরদিন সূর্যোদয় হইলে, শিষ্য বশিষ্ঠ বামদেব প্রভৃতি মহর্ষিগণ এবং অন্যান্য রাজন্যগণ রাজসভায় আসিয়া সমুপস্থিত হইলেন । ক্রমে নানাঐর্থাবাপূর্ণ হেমকুম্ভ ও আর আর বাবতীয় আভিষেকনিক সামগ্রীসম্ভার আনীত হইলে, বশিষ্ঠদেব রাজার আগমনে বিলম্ব দেখিয়া, শ্রমস্ত্রকে সম্বোধন পূর্বক কহিলেন, সূত ! বেলা অধিক হইয়াছে ; শুভ কর্ণের আর বিলম্ব নাই । তথাপি এখন পর্য্যন্ত মহারাজ অন্তঃপুর হইতে বহির্গত হইতেছেন না । আজি মহারাজের এত বিলম্ব হইবার কারণ কি ? অন্তঃপুরে অপর কাহারও যাইবার অধিকার নাই । কে বাইহার সংবাদ আনিয়া দেয় । এক্ষণে যুবরাজ ভিন্ন, আর কাহাকে অন্তঃপুরে পাঠান বিধি হয় না । অতএব তুমি সত্বর যুবরাজ রামচন্দ্রকে অন্তঃপুরমধ্যে পাঠাইয়া দেও । তদনুসারে শ্রমস্ত্র রামের নিকট উপস্থিত হইয়া কহিলেন, যুবরাজ ! অদ্য আপনার অভিষেক ; তদুপযোগী সমস্ত আয়োজন হইয়াছে বটে, কিন্তু এখনও মহারাজ রাজসভায় আসিতেছেন না । অতএব আপনি অন্তঃপুরে প্রবেশ করিয়া, মহারাজের বিলম্বের কারণ কি, দেখিয়া আসুন ।

রাম শ্রমস্ত্রবচনে বিচित्र বৈশাভুযায় বিভূষিত হইয়া, সত্বর-গমনে অন্তঃপুরমধ্যে প্রবেশ করিলেন এবং পিতৃগৃহসম্বিহিত হইয়া দেখিলেন, মহারাজ নয়ন মুদ্রিত করিয়া একান্ত ভ্রানবদনে ধরাসনে শয়ন করিয়া, দীনভাবে রোদন করিতেছেন ; আর

নয়নজলে তাঁহার বক্ষঃস্থল ভাসিয়া বাইতেছে । কাহারও সহিত বাক্যালাপ করিতেছেন না । কেবল এক এক বার অতিদীর্ঘ নিঃশ্বাস-ভার পরিত্যাগ পূর্বক, “হা রাম” এই বাক্য মুখে উচ্চারণ করিতেছেন । সে গৃহে অপর কেহই নাই ; কেবল বিমাতা কৈকেয়ী তাঁহার নিকটে বসিয়া রহিয়াছেন । কিন্তু তাঁহাকে দেখিয়া কিছু-মাত্র বিষাদিত বোধ হইতেছে না । রাম পিতার এক্রূপ অবস্থাস্তর দর্শনে অতিমাত্র দুঃখিত ও হতবুদ্ধি হইয়া, ক্ষণকাল নিস্তব্ধভাবে তথায় দণ্ডায়মান রহিলেন ; এবং কি নিমিত্ত তিনি এক্রূপ শোচনীয়-দশাপন্ন হইয়াছেন, কিছুই নির্ণয় করিতে না পারিয়া, মনে মনে কতই তর্ক বিতর্ক করিতে লাগিলেন । কিয়ৎক্ষণ পরে তাঁহার নিশ্চয়ই প্রতীতি হইল, কোন অপ্রতিকাষ্য বিপৎপাত উপস্থিত হইয়া থাকিবে । অনন্তর, আর অপেক্ষা করিতে না পারিয়া, একান্ত আকুলহৃদয়ে কৈকেয়ীকে সম্বোধন করিয়া জিজ্ঞাসা করিলেন, মাতঃ ! কি জন্য, মহারাজ আজি এক্রূপ কাতরভাবাপন্ন ও যার পর নাই, শোকাকুল হইয়াছেন ? মহারাজের এক্রূপ অভাবনীয় ভাবাস্তরের কারণ কি ? কৈকেয়ী কহিল, রাম, তুমিই ইহার একমাত্র কারণ । তোমার জন্যই মহারাজের এত ক্লেশ, এত অশ্রুত, এত মনস্তাপ । অতএব তুমি সত্ত্বর ইহার প্রতিবিধানে যত্নবান্ হও ।

রামবাক্য দশরথের কর্ণকুহরে প্রবিষ্ট হইবামাত্র, তিনি নয়নোন্মীলন করিলেন বটে ; কিন্তু তাঁহার শোকভার শতগুণে প্রবল হইয়া উঠিল ; এবং নয়নযুগল হইতে অনবরত বাষ্পবারি বিগলিত হইতে লাগিল । দশরথ রামকে সম্বোধন করিতে পুনঃ পুনঃ চেষ্টা করিলেন, কিন্তু কণ্ঠাবরোধ হওয়াতে কোন ক্রমেই বাক্যানিঃসরণ হইল না । তখন তিনি কেবল নিষ্প্রভনয়নে, বারংবার রামচন্দ্রের

বদনসুধাকর সন্দর্শন করিতে লাগিলেন । তদর্শনে রাম একান্ত ভীত ও বৎপরোনাস্তি শোকাকুল হইয়া, কাতরবচনে পুনরায় কৈকেয়ীকে কহিলেন, মাতঃ ! আমার নিমিত্তই পিতার এক্রূপ ভাব উপস্থিত হইয়াছে । আমিই পিতার এ অসুখসমুদয়ের একমাত্র মূল । যদি পিতৃসন্তোষার্থে আমাকে উপস্থিত রাজ্যাধিকার পরিত্যাগ করিয়া বনে বাস করিতে হয় ; অধিক কি, প্রাণ পর্য্যন্তও বিসর্জ্জন দিতে হয়, তাহাতেও আমি এক মুহূর্ত্তের নিমিত্ত কাতর নহি । অতএব জননি ! কি হইয়াছে বিশেষ করিয়া বলুন । আপনার কথা শুনিয়া আমার অন্তঃকরণে নানা সংশয় উপস্থিত হইল । আপনি জ্বরায় বলুন আর বিলম্ব করিবেন না, আমার প্রাণবিয়োগ হইয়া যাইতেছে ।

রামের আগ্রহাতিশয় দর্শনে, কৈকেয়ী মনে মনে হর্ষলাভ করিয়া অহ্মানবদনে কহিল, রাম ! পূর্বে মহারাজ আমাকে দুইটী বর প্রতিশ্রুত হইয়াছিলেন । এতদিন আমি উহা প্রার্থনা করি নাই । সম্রাতি প্রয়োজন হওয়াতে, এক বরদ্বারা তোমার চতুর্দশ বৎসর অরণ্যে বাস, অপর বরদ্বারা ভরতের রাজ্যাভিষেক প্রার্থনা করিয়াছি । মহারাজ তাহাতে সম্মতও হইয়াছেন । এক্ষণে কেমন করিয়া, সহসা তোমাকে এক্রূপ কথা বলিবেন, এই জন্য নিরুত্তর হইয়া রহিয়াছেন । তদ্বিস্ম মহারাজের শোকের কারণ আর কিছুই দেখিতেছি না । রাম ! লোকে, উভয়লোকহিতার্থে সম্মতনের কামনা করিয়া থাকে । তুমি মহারাজের প্রিয়পুত্র । অতএব তুমি সত্যব্রত রত্নজাকে, সত্যপালনরূপ ঋণজাল হইতে মুক্ত করিয়া, ধার্মিক পুত্রের ন্যায় কার্য্য কর, এবং অদ্যই অযোধ্যা-নগর পরিত্যাগ পূর্ব্বক অরণ্যে গমন কর । আর রথ কালহরণ করিও না । দশরথ শুনিবামাত্র, হা রাম ! বলিয়া মুচ্ছিত হইলেন ।

অসামান্যগুণীয়াশ্রুতি রামচন্দ্র, বিমাতার মুখনিঃসৃত এবং ত
মন্ত্বেদী বাক্য শ্রবণ করিয়াও অণুমাত্র ক্ষুব্ধ বা চলচিত্ত হইলেন
না ; বরং স্থিরচিত্তে প্রসন্নমনে কহিলেন, মাতঃ ! যদি পুত্র হইয়া
পিতৃআজ্ঞা পালন করিতে না পারিব, তবে এ জীবনে প্রয়োজন
কি ? যিনি অনুক্ষণ সন্তানের মঙ্গলচিন্তা করিয়া থাকেন, যাহার
স্নেহের সীমা নাই, যাহা হইতে এই দুর্লভ নরজন্ম লাভ করিয়াছি,
সেই পরম পূজনীয় জনকের সত্যপালনে যদি যত্নবান না হইব,
তবে জগতে আমার নাম কলঙ্করাশিতে চিরনিমগ্ন থাকিবে । এ
জগতে পিতাই পরম গুরু, পিতাই পরম ধর্ম, এবং কায়মনোবাক্যে
পিতৃআজ্ঞা পালন করাই, মানবজন্মের সার কর্ম । অতএব সর্বথা
পিতৃআজ্ঞা আমার শিরোধার্য । কিন্তু জননি ! আমার একটী
প্রার্থনা আপনাকে রক্ষা করিতে হইবে । আমি বনে গমন করিলে
নিশ্চয়ই মহারাজ আমার নিমিত্ত অতিশয় কাতর ও অসুখী হইবেন,
যাহাতে মহারাজের শোক নিবারণ হয়, যাহাতে মহারাজ সন্তুষ্ট
হন, তদ্বিষয়ে আপনি কদাচ আলস্য বা উদাস্য প্রকাশ করিবেন
না । আপনি সর্বদা পিতৃদেবের নিকটে থাকিয়া, যাহাতে তাঁহার
উৎকণ্ঠা বা অসুখ বর্দ্ধিত না হয়, তন্নিমিত্ত অনুক্ষণ যত্নবতী হই-
বেন । কখন পিতাকে একাকী থাকিতে দিবেন না ।

এই বলিয়া রাম, পিতাকে প্রদক্ষিণ ও প্রণাম করিলেন । তদ-
নন্তর বিমাতৃচরণে অভিবাদন পূর্বক বিদায় গ্রহণ করিয়া, জানকী-
ভবনে গমন করিলেন এবং তাঁহার নিকট আদ্যোপান্ত সমুদয়-
বৃত্তান্ত ব্যক্ত করিয়া বলিলেন, প্রিয়ে! পিতৃসত্যপালনার্থ অদ্যই আমি
বনে গমন করিব । আজি হইতে চতুর্দশ বৎস আমাকে সমস্ত সুখ-
সম্পত্তি পরিত্যাগ করিয়া অরণ্যে বাস করিতে হইবে । অতএব যে

পর্যন্ত আমি গৃহে প্রত্যাগমন না করি, ততাবধিকাল তুমি আমার বিরহ সহ্য করিয়া গৃহে অবস্থান কর, এবং অনন্যমনে গুরুজনের সেবা ও শুদ্ধিলাভ নিরন্তর থাক ।

পতিপ্রাণা, একান্তযুক্তস্বভাবা জানকী রামবাক্য শ্রবণে বিষম বিষাদসাগরে নিমগ্ন হইয়া, রোদন করিতে লাগিলেন । অনন্তর অঞ্চলদ্বারা চক্ষুর জল মার্জন করিতে করিতে বলিলেন, নাথ ! পতি, পতিপ্রাণা নারীর ঐহিক ও পারত্রিক সুখের একমাত্র নিদান । পতিশূন্য গৃহ জনশূন্য অরণ্যপ্রায় । যদি আপনি অরণ্যে গমন করেন, তবে আর আমার এ শূন্য গৃহে থাকিয়া ফল কি ? এ জগতে পতিই, পতিব্রতা স্ত্রীর একমাত্র আরাধ্য দেবতা । পতির পদসেবাই, সতীর প্রধান ধর্ম ও নারীজন্মের সার কর্ম । পতির জীবনে সতীর জীবন, পতির সুখে সতীর সুখ, পতির বিপদে সতীর ব্যসন, এবং পতির মরণে সতীর মৃত্যু । ফলতঃ পতি ভিন্ন পতিব্রতা রমণীর গত্যন্তর নাই । অতএব যদি আপনি বনে গমন করেন, তবে এ দাসীকে সহচারিণী করিতে কোনমতে অমত করিবেন না । এ দাসী আপনার চিরকিষ্করী । যেখানে যাইবেন, সেই খানেই এদাসী আপনার চরণসেবায় নিযুক্ত থাকিবে । বিশেষতঃ আপনি যখন বনপর্যটনে একান্ত ক্লান্ত ও পরিশ্রান্ত হইবেন, তখন এ দাসী আপনার পদসেবা করিলে, পথশ্রমের অনেক লাঘব বোধ হইবে । যদি বলেন, অরণ্যবাস বিষমকষ্টকর, তুমি রাজার কন্যা ও রাজার বধূ হইয়া, অসহ্য বনবাসক্লেশ সহ্য করিতে পারিবে না, কিন্তু নাথ ! আপনি আমার নিকটে থাকিলে, যতই কেন দুঃখ হউক না, যতই কেন ক্লেশ হউক না, তাহা সব আমি অনা-
য়াসে সহ্য করিতে পারিব । কিছুতেই আমার কষ্টবোধ হইবে না ।

বরং এখান অপেক্ষা তথায় আমি সহঅশ্রুণ সুখলাভ করিতে পারিব । অধিক কি, আপনি আমার কাছে থাকিলে, সেই জনশূন্য অরণ্য স্বর্গতুল্য স্থলের স্থান, সেই স্বকবলকল পটবস্ত্র, সেই পর্ণকুটীর রাজভবন, সেই তরুমূল রত্নাসন, বলিয়া বোধ হইবে । অতএব হে নাথ ! কৃপা করিয়া এ দাসীকে সহচারিণী করুন । নতুবা এ দাসী ঐ চরণে প্রাণবিসর্জন করিবে । রাম কহিলেন, প্রিয়ে ! যদি একান্তই বনবাসিনী হইতে ইচ্ছা হয়, তবে আর বিলম্ব করিও না, বনগমনের সমস্ত আয়োজন কর ।

উভয়ের এরূপ কথোপকথন হইতেছে, এমন সময়ে লক্ষ্মণ তথায় আসিয়া উপস্থিত হইলেন । রাম লক্ষ্মণকে দেখিয়া কহিলেন, ভাই লক্ষ্মণ ! তুমি গৃহে অবস্থান করিয়া পিতামাতার শুশ্রূষায় কাল-যাপন কর । আমি পিতৃআজ্ঞানুসারে অদ্য জানকীর সহিত অরণ্যে গমন করিব । চতুর্দশ বৎসরের পর, তোমার সহিত পুনরায় সাক্ষাৎ হইবে । সুশীল লক্ষ্মণ শুনিয়া সজলনয়নে কহিলেন, আর্ঘ্য ! এ দাস আপনার চিরানুগত ও একান্ত আজ্ঞাবহ ভৃত্য । আপনিই কেবল এদাসের একমাত্র প্রভু । প্রভুর স্থখে সেবকের সুখ, প্রভুর দুঃখে সেবকের দুঃখ । যদি আপনি অরণ্যবাসী হইলেন, তবে আর লক্ষ্মণের এ ক্লেশময় রাজভবনে থাকিয়া সুখ কি ? অরণ্যে আপনি আর্ঘ্য জনকতনয়ার সহবাসে কালযাপন করিবেন, আর এ চিরসেবক ফলমূলাদি আহরণ করিয়া, বিশ্বস্ত কিল্করের ন্যায় দিবা-রাত্রি আপনাদের পরিচর্য্যায় তৎপর থাকিবে । অতএব এ দাসকে সঙ্গে লইতে কখন অমত করিবেন না । রাম কহিলেন, লক্ষ্মণ ! তুমি আমার প্রাণের ভাই, এবং বিপদে একমাত্র সহায় ও সম্পদে অদ্বিতীয় মিত্র । তোমায় আমায় অভেদাত্মা । তুমি আমার

নিকটে থাকিলে, আমি অরণ্যবাসনিবন্ধন কোন কষ্টই অনুভব করিতে পারিব না, সত্য বটে ; কিন্তু তোমাকে আমার ছুঃখের অংশভাগী করিতে কোন মতে ইচ্ছা হয় না । আমার অদৃষ্টে যদি ছুঃখ থাকে, তাহা আমি স্বয়ংই ভোগ করিব । নিরর্থক তোমার সে কষ্টভার সহ্য করিবার প্রয়োজন নাই । লক্ষ্মণ ! আমি সকল ক্লেশ সহ্য করিতে পারিব, কিন্তু বনবিহারী কিরাতে ন্যায় তোমার উত্তাপক্লিষ্ট মুখকমল মলিন দেখিয়া, কখনই ধৈর্য্যাবলম্বন করিতে পারিব না । অতএব ক্ষান্ত হও ; গৃহে থাকিয়া গুরুজনগণের পরিচর্যা কর । আমার অদৃষ্টে যাহা আছে, তাহাই ঘটবে ।

এইরূপে রাম, প্রাণাধিক লক্ষ্মণকে অনেক বুঝাইলেন, কিন্তু কিছুতেই কিছু হইল না । অনন্তর তিনি অহুজকে, অহুগমনে কৃত-সংকল্প দেখিয়া কহিলেন, ভাতঃ ! যদি নিতান্তই আমার সহচর হইতে ইচ্ছা হইয়া থাকে ; তবে চল, একবার জননী নিকট হইতে বিদায় গ্রহণ করিয়া আসি । এই বলিয়া রাম লক্ষ্মণকে সমভিব্যাহারে লইয়া মাতৃভবনে গমন করিলেন । কৌশল্যা দেখিবামাত্র আত্মলাদে গদগদ হইয়া, সম্মেহসম্ভাষণ পূর্ব্বক প্রণত পুত্রের মুখচুম্বন করিয়া কহিলেন, বৎস ! অদ্য সত্যপরায়ণ মহারাজ তোমাকে যৌবরাজ্যে অভিষিক্ত করিবেন । এক্ষণে রঘুকুলদেবতাদিগের নিকট প্রার্থনা করি, তুমি অব্যাহতরূপে সেই চিরপ্রসিদ্ধ রাজ্যলক্ষ্মী উপভোগ করিয়া পরম স্মৃথে সকলকে প্রতিপালন কর । অম্পকালের মধ্যে তোমার কীর্ত্তি যেন দিগ্দিগন্তব্যাপিনী হয় ।

রাম কহিলেন, ভাতঃ ! এদিকে কি হইয়াছে, তাহা কি আপনি এখনও জানিতে পারেন নাই । মহারাজ পূর্বে বিমাতা কৈকেয়ীকে দুইটী

বরদান করিয়াছিলেন । অধুনা তিনি, মহারাজের নিকট এক বরে, আমার বনবাস ও অপর বরে, স্বপুত্র ভরতের রাজ্যাভিষেক প্রার্থনা করিয়াছেন । তদনুসারে, পরমসত্যবাদী সত্যপ্রতিজ্ঞ পিতা, আমাকে জটাধারণ ও বস্কল পরিধান করিয়া, চতুর্দশ বৎসর অরণ্যে বাস করিতে আদেশ করিয়াছেন । অতএব অদ্য আমি পিতৃস্বাজ্ঞা পালনার্থ লক্ষ্মণ ও সীতার সহিত বনে গমন করিব । এক্ষণে আপনি অনুমতি প্রদান করুন । কৌশল্যা শুনিবামাত্র, হা হতাস্মি, বলিয়া বাতাভিহতা কদলীর ন্যায়, ভূতলশায়িনী হইয়া মুচ্ছিতা হইলেন ।

রাম, বহুযত্নে ও অতিকষ্টে তাঁহার মুচ্ছাপনয়ন করিয়া দিলেন । কৌশল্যা সংজ্ঞালাভ করিয়া, একান্ত শূন্যমননে বারংবার রানের চক্রানন নিরীক্ষণ করিতে লাগিলেন । অনন্তর বহুবিলাপ ও পরিতাপ করিয়া, আকুলবচনে কাতস্বরে কহিলেন, রাম ! কি সর্বনাশের কথা শুনিলাম । তুমি এমন কথা কেন আমাকে শুনাইলে । ইহা অপেক্ষা যে মৃত্যু আমার সহঅগুণে শ্রেয়স্কর ছিল । কোথায় তুমি রাজা হইবে, না এখন তোমাকে বনে গমন করিতে হইল ? হা বিধাতঃ ! তোমার মনে কি এই ছিল । হা ধর্ম ! কালে কি তুমিও অন্ধ হইলে । হা মহারাজ ! এত কালের পর শেষে কি এই করিলে ? এ অভাগিনীর জীবনধন আপনার কি অপরাধ করিল । হা কালমাপিনি ! তুই কি দোষে এ চিরদুঃখিনীর সন্তানকে দংশন করিলি । তোর মনে কি বিন্দুমাত্র দয়ার সঞ্চার হইল না ? হা মৃত্যু ! তুমি এখনও কোথায় রহিয়াছ ? চিরদুঃখিনী বলিয়া কি আমার দেহ স্পর্শ করিবে না । হা বজ্র ! তুমি এত পর্বত বিদারণ করিয়া থাক, কালে কি তোমারও প্রতাপ খর্ব হইল । নতুবা এখনও

আমার হৃদয় বিদীর্ণ হইতেছে না কেন ? বিশ্বস্তরে ! তুমি দ্বিখণ্ড হও, আমি প্রবেশ করি ।

এইরূপ আক্ষেপ করিয়া, কৌশল্যা রোদন করিতে করিতে, রামকে জোড়ে লইয়া কহিলেন, বৎস ! এজগতে তুমি বই মা বলিয়া সম্বোধন করে, এ অভাগিনীর এমন আর কেহই নাই । তুমি আমার অনেক দুঃখের ধন । আমি কত দেবদেবীর আরাধনা করিয়া তোমাকে প্রাপ্ত হইয়াছি ; এবং তোমার জন্য কত মনস্তাপ, কত ক্লেশ, কত দুঃখ ও কত যন্ত্রণা পাইয়াছি, তাহা বলিবার নহে । তথাপি আমি দ্বিরুক্তি করি নাই, কেবল তোমার মুখপানে চাহিয়া সে সব সহ্য করিয়াছি । হৃদয়নন্দন ! তুমি আমার জীবনসর্বস্ব । আমি এক মুহূর্ত্ত তোমার চন্দ্রানন দেখিতে না পাইলে, দশদিগ্ অন্ধকারময় দেখিয়া থাকি ; কেমন করিয়া চতুর্দশ বৎসর তোমার বিরহে প্রাণ ধারণ করিব ? মহারাজ আজ্ঞা করিয়াছেন সত্য বটে, কিন্তু আমি তোমাকে কখন বনে যাইতে দিব না । তুমি বনে গমন করিলে এ অভাগিনীর দশা কি হইবে ? কে আমাকে মা বলিয়া সম্বোধন করিবে ? অতএব আমার কথা রক্ষা কর, তুমি বনে গমন করিও না ।

রাম মাতৃবিলাপবাক্য শ্রবণে, যার পর নাই, শোকাবুল হইলেন বটে, কিন্তু পাছে জননী জানিতে পারিলে আরও অধীর হন, এই ভয়ে অতিকষ্টে সীমিত গোপন পূর্বক, মাস্তূনাবাক্যে জননীকে নানা প্রকার বুঝাইয়া কহিলেন, মাতঃ ! পুত্রের প্রতি পিতার সর্বতোযুখী প্রভুত্ব আছে । যখন পিতা আমাকে বনে যাইতে আজ্ঞা করিয়াছেন, তখন সে আজ্ঞাপ্রতিরোধে আমার ক্ষমতা নাই । এজগতে সত্যই সনাতন ধর্ম্ম । পিতা কৈকেয়ী জননীর

নিকট, সত্যপাশে আবদ্ধ হইয়াছেন ; যদি পুত্র হইয়া সেই সত্য প্রতিপালন না করিলাম, তবে আমার ন্যায় অধার্মিক ও কুপুত্র আর কে আছে ? অতএব জননি ! আমি পিতৃ আজ্ঞা উল্লঙ্ঘন করিতে পারিব না । আপনি গৃহে থাকিয়া পিতার পাদপদ্ম সেবা করিবেন ; ভরতকে আমার ন্যায় স্নেহ করিবেন ; এবং মধ্যমা জননীকে সহোদরা ভগিনীর ন্যায় স্নেহনয়নে দেখিবেন । কাহারও প্রতি বিরুদ্ধভাব প্রকাশ করিবেন না । এ বিষয়ে কাহারও দোষ নাই । সকলই আমার অদৃষ্টের দোষ । বিধাতা আমার ললাটে যদি দুঃখ লিখিয়া থাকেন, তাহা খণ্ডন করিতে কাহারও সাধ্য নাই । আমি চতুর্দশ বৎসরের পর পিতৃসত্য পালন করিয়া পুনরায় আপনার শ্রীচরণ দর্শন করিব । আমার দিব্য, আপনি আর অধৈর্য্য হইবেন না । এক্ষণে প্রসন্নমনে আমাকে বনগমনে সম্মতি প্রদান করুন ।

কৌশল্যা শুনিয়া, বাম্পাকুল-লোচনে করুণবচনে কহিলেন, রাম ! আমি মনে মনে কত আশাই করিয়াছিলাম যে, তুমি বড় হইলে আমার সকল দুঃখ দূর হইবে, আমার তাপিত প্রাণ শীতল হইবে, আমি সুখী হইব ; কিন্তু বিধাতা যে এ অভাগিনীর ললাটে এত দুঃখ লিখিয়াছেন, তাহা কখন স্বপ্নেও জানি না । যাহাদের সন্তান না হইয়াছে তাহারা বরং আমার অপেক্ষা শতগুণে ভাগ্যবতী । নতুবা পুত্রবতী হইয়া কে কোথায় আমার ন্যায় অভাগিনী হইয়াছে ? হা বৎস ! হা কাকালিনীর জীবনধন ! তুমি রাজপুত্র হইয়া কিরূপে সেই জনশূন্য ভীষণ বনে, পাদচায়ে ভ্রমণ করিবে ? ক্ষুৎপিপাসায় কাতর হইলে, কাহার নিকট হইতেই বা খাদ্য ও পানীয় প্রার্থনা করিবে ? কে তোমাদের দুঃখে দুঃখ

প্রকাশ করিবে । হা সতি সীতে ! তোমার অদৃষ্টে কি এই ছিল !
বৎস ! যদি একান্তই মহারাজের আজ্ঞা অবহেলন না কর ; যদি
একান্তই তোমার চিরদুঃখিনী জননীকে শোক-সাগরে পরিক্ষিপ্ত
কর ; তবে একবার ঐ চাঁদমুখে মা বলিয়া ডাক, শুনিয়া আমার
কর্ণকুহর পরিতৃপ্ত হউক । অনেক দিন আর তোমার ঐ চাঁদমুখের
মধুমাখা কথা শুনিতে পাইব না । এই বলিতে বলিতে অন্তর্কীর্ণ-
ভরে তাঁহার কণ্ঠরোধ হইয়া আসিল । তখন আর কিছু বলিতে
না পারিয়া, শিরে করাঘাতপূর্ব্বক রোদন করিতে লাগিলেন ।

তদনন্তর, রাম অতিকষ্টে মাতার নিকট হইতে বিদায় গ্রহণ
করিয়া, সুনিত্রাজননীকে অভিবাদনপূর্ব্বক, জনকভবনে গমন করি-
লেন, এবং দারুণশোকবিহ্বল পিতার পাদপদ্ম বন্দনা করিয়া, সীতা
ও লক্ষ্মণ সমভিব্যাহারে পুরদ্বারে আসিয়া উপস্থিত হইলেন ।
আহা ! তৎকালে তাঁহাদের সে ভাব দর্শন করিলে, পাষাণও দ্রবীভূত
হয়, বজ্রেরও হৃদয় বিদীর্ণ হয় । যিনি আজি, রাজসিংহাসনে অধি-
রোহণ করিয়া রাজশব্দে আহুত হইবেন, তিনি কি না এখন
অনুজের সহিত অনাথের ন্যায় বনগমন করিতেছেন । যিনি রাজর্ষি
জনকের কন্যা, রাজাধিরাজ দশরথের পুত্রবধূ, এবং রঘুকুলতিলক
রামচন্দ্রের ভার্য্যা, যিনি ভূতলে কখন পাদবিক্ষেপ করেন নাই,
খেচর বিহঙ্গমগণও যাহাকে কখন দেখিতে পায় নাই, সেই অসূর্যা-
ল্পশ্যরূপা কামিনী, এক্ষণে রাজভোগবাসনা বিসর্জন দিয়া, বনেচর-
বধূর ন্যায় বনে বনে বিচরণ করিবার নিমিত্ত, পতির সহচারিণী
হইতেছেন । ইহা দেখিয়া পুরবাসিগণ শোকে অধীর হইয়া, হাহা-
কার শব্দে রোদন করিতে লাগিল । কেহ যে কাহাকে সান্ত্বনা
করিবে, এমন লোক প্রায়ই রহিল না ।

রাম পুরদ্বারে উপস্থিত হইলে, সুমন্ত্র তথায় আসিয়া, সাক্ষ-
নয়নে কৃতাজ্জলিপুটে নিবেদন করিল, যুবরাজ ! যদি একান্তই আমা-
দিগকে অনাথ করিয়া বনে গমন করেন, তবে আমাদের এক
প্রার্থনা আপনাকে রক্ষা করিতে হইবে। আমরা প্রাণ থাকিতে, এ
দক্ষক্ষেত্রে বধূসমভিষাহারে আপনাকে পদত্বজে গমন করিতে
দেখিতে পারিব না। বিশেষতঃ মহারাজ আজ্ঞা করিতেছেন।
অতএব আমি রথ প্রস্তুত করিয়া আনিয়াছি ; রথে আরোহণ করুন ;
অন্ততঃ ভাগীরথীর তীর পর্য্যন্ত আপনাদিগকে অগ্রসর করিয়া দিই।
রাম সন্মত হইয়া, সীতা ও লক্ষ্মণের সহিত রথে আরোহণ করিলেন।
রথ কিয়দূর গমন করিলে, রাম আমাদিগকে পরিত্যাগ করিয়া
অরণ্যে গমন করিতেছেন শুনিয়া, নগরবাসী তাবৎ লোকেই দুস্তর
শোকার্ণবে নিমগ্ন হইয়া, উচ্চৈঃস্বরে ক্রন্দন করিতে করিতে দ্রুতপদে
তথায় আসিয়া উপস্থিত হইল, এবং কেহ রথচক্র ধারণ করিয়া, কেহ
বা রথসমীপে ধূলায় লুণ্ঠিত হইয়া, রথের গতিরোধ পূর্বক কহিতে
লাগিল, আমাদের মহারাজ অরণ্যে যাইতেছেন, আমরা আর কি
সুখে এ গৃহে থাকিব। রাজা যেখানে বাস করিবেন, সেই রাজ্য।
অতএব আমাদের এ রাজবিরহিত রাজ্যে থাকিবার প্রয়োজন কি ?

রাম শুনিয়া, রথ হইতে অবতীর্ণ হইলেন, এবং সকলকে বিবিধ
সান্ত্বনাবাক্যে বুঝাইয়া কহিলেন, তোমরা আমার প্রতি যেরূপ
প্রীতি ও স্নেহ প্রকাশ করিতেছ, প্রাণাধিক ভরত রাজা হইলে,
তাহার প্রতি তরুণ ভক্তি ও শ্রদ্ধা প্রদর্শন করিও। ভরত অতি
ধীর, শাস্তস্বভাব, বুদ্ধিমান ও রাজনীতিকুশল। ভরত রাজা হইলে
তোমাদের কোন প্রকার অমঙ্গলের সম্ভাবনা নাই। এক্ষণে তোমরা
আমার অনুরোধ বাক্য রক্ষা করিয়া, স্ব স্ব গৃহে প্রতিগমন কর।

তোমাদের কাতরতা দেখিয়া আমার মনে সান্ত্বন্যর ক্লেশ হইতেছে ।
একণে নিরস্ত হও, আর অনর্থক আমাদের সহিত আসিও না ।

রামের কথা শুনিয়া সকলে হতবুদ্ধির ন্যায়, শুষ্কমুখে পরস্পরের
মুখাবলোকন করিতে লাগিল, এবং অগত্যা নিরস্ত হইয়া, আর্তস্বরে
রোদন করিতে আরম্ভ করিল । ফলতঃ রামের অরণ্যগমনে, যে
ব্যক্তি বিষমশোকভরে অভিভূত হয় নাই, এমন লোক প্রায়ই
ছিল না । অধিক কি, তৎকালে জড়বুদ্ধি পালিত পশুপক্ষ্যাদিও
রামশোকে কাতর হইয়া, অবিরলধারায় নেত্রবারি পরিত্যাগ
করিয়াছিল ।

ষষ্ঠ পরিচ্ছেদ।



রাম, রথে আরোহণ করিয়া শ্রমজ্ঞকে কহিলেন ; সারথি ! এখানে আর অধিক কাল থাকা হইবে না ; শীঘ্র শীঘ্র রথ চালাও । সকল লোককে ঘেরূপ কাতর দেখিতেছি, তাহাতে আর বিলম্ব করিলে, আমাদের বনগমন করা অতিশয় কষ্টকর হইবে । শ্রমজ্ঞ, আদেশ প্রাপ্তিমাত্র অশ্বরজ্জু শিথিল করিল । অশ্বগণ বায়ুবেগে গমন করিতে লাগিল । অনতিবিলম্বে তাঁহারা অযোধ্যা পরিত্যাগ করিয়া জনপদে উপনীত হইলেন । জনপদের অপূৰ্ব শোভা সন্দর্শন করিয়াও, রামের চিত্তে বিমুগ্ধতা শ্রুতসংস্কার হইল না : বরং নানা বিষয়ের ভাবনা আসিয়া উদয় হইতে লাগিল । তিনি কখন মনে করিলেন, আমরা যখন আসি, তৎকালে পিতা মাতাকে ঘেরূপ কাতরভাবাপন্ন ও শোকাবুল দেখিয়াছিলাম, এক্ষণে তাঁহারা যে কি করিতেছেন, কিছুই বলা যায় না । আমি আসিবার কালে কত বুঝাইলাম, কিন্তু কিছুতেই তাঁহাদের চিত্ত শান্ত্যাব অবলম্বন করে নাই ; না জানি কি সর্বনাশ বা ঘটিয়াছে । আবার মনে করিলেন, হয় ত, সকলে কৈকেয়ী জননীকে নিন্দাবাদে কত তিরস্কার করিতেছে । আহা ! তিনি কি করিবেন, তাঁহার দোষ কি ? যদি বিধাতা আমার ভাগ্যে হুঃখভার লিখিয়া থাকেন, তাহা খণ্ডন করিতে কেহই সমর্থ হইবে না । আবার ভাবিলেন, প্রজাবর্গই বা কি করিল । তাহাদের আকার ইঙ্গিত দেখিয়া বার পর নাই,

আকুল ও অশ্রুখী বোধ হইয়াছে । এক্ষণে তাহারাই বা কি প্রমাদ ঘটাইল । এইরূপ মনোমধ্যে নানা চিন্তার উদয় হওয়াতে, রাম একান্ত বিকলচিত্ত হইলেন ; কিন্তু সীতা ও লক্ষ্মণ জানিতে পারিলে পাছে ব্যাকুল হন, এই আশঙ্কায় তিনি স্বীয় ভাব গোপন করিয়া সুমন্ত্রকে কহিলেন, সারথি ! সায়ংকাল উপস্থিত । অতএব অদ্য এই স্থানে অবস্থান করিয়া নিশাযাপন করা হাউক ।

তদনুসারে, সুমন্ত্র তমসানদীকূলে অশ্বরজ্জু সংযত করিয়া, রথবেগসংবরণ করিলেন । সকলে রথ হইতে অবতীর্ণ হইয়া তমসানদীর সলিলে, সায়ং সময়ের সন্ধ্যাবন্দনাদি সমাপন করিলেন । সুমন্ত্র অশ্বগণকে আদ্রপৃষ্ঠ করাইলে, উহারা যদৃচ্ছাক্রমে তীরপ্রকট নবীন শম্পদল ভক্ষণ করিতে লাগিল । অনন্তর রাত্রি উপস্থিত হইলে, লক্ষ্মণ পর্ণশয্যা প্রস্তুত করিয়া দিলেন । রাম ও জানকী তাহাতে শয়ন করিলেন । জানকী পথপ্রমে অত্যন্ত পরিশ্রান্ত হইয়াছিলেন ; সুতরাং মুহূর্ত্তমধ্যে তাঁহার নিদ্রাকর্ষণ হইল ; কিন্তু রাম নানাবিষয়িনী চিন্তায় নিমগ্ন হইয়া, অতিকষ্টে নিশাযাপন করিলেন ।

প্রভাত হইবামাত্র, তাঁহারা তথা হইতে প্রস্থান করিলেন । জানকী, পথের উভয় পার্শ্বে হরিতশাদলপূর্ণ পরম রমণীয় প্রদেশ সকল অবলোকন করিয়া, মনে মনে বিপুল হর্ষলাভ করিতে লাগিলেন । রাম তাহা দেখিয়া সাতিশয় আনন্দপ্রকাশ পূর্ব্বক কহিলেন, প্রিয়ে ! গৃহে থাকিয়া এরূপ আনন্দ কিছুতেই লাভ হয় না । আমি বিবেচনা করি, বনবাস কখনই আমাদের পক্ষে অসুখকর হইবে না ; প্রত্যুত, অনির্কচনীয় সুখজনক হইবে । এইরূপ বলিতে বলিতে, তাঁহারা নানা দেশ, নানা জনপদ, নানা নদী অতিক্রম

করিয়া, পরিশেষে শৃঙ্গবেরপুরে উপনীত হইলেন । সুমন্ত্র রথবেগ-
সংবরণ করিলে সকলে রথ হইতে অবতীর্ণ হইয়া, তাপসতরুতলে
বিশ্রাম করিতেছেন ; ইত্যবসরে নিবাদপতি গুহক, রামচন্দ্রের
শুভাগমন সংবাদ প্রাপ্ত হইয়া তথায় উপস্থিত হইলেন ; এবং একে
একে সকলকে অভিবাদন করিলেন । অনন্তর রামচন্দ্রকে সম্বোধন-
পূর্বক, কৃতাজ্জলিপুটে বিনয়বচনে নিবেদন করিলেন, যুবরাজ !
আপনার চিরানুগত একান্ত আজ্ঞাবহ ভৃত্য উপস্থিত হইয়াছে, কি
আজ্ঞা হয় ? যদি অনুমতি করেন, তবে এ দাস প্রভুর যথোচিত
সেবা করিয়া কৃতার্থতা লাভ করে ।

রাম, কিরাতরাজের এবমুত অভাবিত শিষ্টাচার দর্শনে
পরম প্রীত হইয়া, সুহৃদসম্ভাষণে তাহাকে কহিলেন, মিত্র !
তোমার বিশিষ্ট বিনয়, শীলতা ও সরলভাণ্ডে সবিশেষপরিতোষ
প্রাপ্ত হইলাম । আমাদের নিমিত্ত তোমাকে কিছুমাত্র কষ্ট
করিতে হইবে না । আমরা বনবাসে আদিষ্ট হইয়াছি ; রাজভোগ
একবারে বিসর্জন দিয়াছি । অধুনা আমাদের তপস্বি-সেবিত
বনে বাস করিয়া, বন্যহস্তি অবলম্বন করিতে হইবে । এই বলিয়া,
রাম অন্যান্য সকলের সহিত, পরমসমাদরে গুহকআনীত ফল-
মূলাদি ভক্ষণ করিলেন । অনন্তর গুহকের সহিত অরণ্যভ্রান্ত-সম-
ক্ৰীয় নানা কথাপ্রসঙ্গে, সে দিন তথায় অতিবাহন করিলেন ।

পরদিন প্রভাতে, রাম সীতা ও লক্ষ্মণের সহিত ভাগীরথীর
নির্মলপাবনসলিলে অবগাহন করিয়া, প্রাতঃকৃত্যাদি সমাপন করি-
লেন । তদনন্তর উদ্দেশে, পিতৃমাতৃচরণে অভিবাদন করিয়া,
সুমন্ত্রকে সম্বোধন পূর্বক কহিলেন, সারথি ! আমরা ভাগীরথীতীরে
সমাগত হইয়াছি । অতএব তুমি এইস্থান হইতেই রথ লইয়া অযো-

ধ্যায় প্রত্যাভর্জন কর । আমরা এই খানে জটাধারণ ও বস্কল-
 পরিধান করিয়া, ভাগীরথীর পরপারে গমন করিব । তুমি পিতার
 পরম হিতৈষী ও একান্ত শুভাকাঙ্ক্ষী । পিতৃদেব আমাদের নিমিত্ত,
 যার পর নাই, কাতর ও শোকাকুল হইয়াছেন । বাহাতে ত্বরায়
 তাঁহার শোকাপনোদন হয়, তদ্বিষয়ে সবিশেষ চেষ্টা করিবে । আর
 পিতৃ ও মাতৃচরণে আমার অভিবাদন জানাইয়া কহিবে, তাঁহারা
 আমাদের জন্য কোন মতে ভাবিত না হন । আমরা যেখানে
 থাকি, তাঁহাদের চরণপ্রসাদে নির্ঝিল্লি কালবাণন করিব, সন্দেহ
 নাই । চতুর্দশ বৎসর দেখিতে দেখিতেই অতিবাহিত হইয়া
 যাইষ্টব । অতএব আমরা কিছু কালের পরই, পুনরায় অষোধ্যায়
 গিয়া, তাঁহাদের শ্রীচরণ দর্শন করিব । তুমি যত শীঘ্র পার, প্রাণা-
 ধিক ভরতকে মাতুলালয় হইতে আনাইয়া, পরম সমাদরে যৌব-
 রাজ্যে অভিষিক্ত করিবে । বাহাতে মহুর রাজ্যমধ্যে পুশ্চলা-
 সংস্থাপন হয়, তদ্বিষয়ে মুহূর্ত্তকালের নিমিত্তও উদাসীন থাকিও
 না । ভরতকে আমার সন্তোষসম্ভাষণ অবগত করাইয়া কহিবে, ভরত
 যেমন পিতৃসেবায় নিয়ত তৎপর, তদ্রূপ মাতৃবর্গের শুশ্রূষায় সর্বক্ষণ
 যত্নবান থাকেন । মধ্যমা জননীর চরণে আমার এই সবিনয়
 প্রার্থনা নিবেদন করিও যে, আমি আপন অদৃষ্টের ফলভোগ
 করিতেছি । এবিষয়ে তাঁহার কিছুমাত্র দোষ নাই । অতএব আমার
 প্রতি তাঁহার যেরূপ স্নেহ ও বাৎসল্যভাব আছে, কদাপি উহার
 যেন কিছুমাত্র বৈলক্ষণ্য না ঘটে । মধ্যমা জননী যখন যে অভি-
 ল্য করিবেন, তাহা যেন অবিলম্বে সম্পাদিত হয় । দেখিও, তুমি-
 বন্ধন তিনি যেন কখন ক্ষোভপ্রকাশ না করেন । বশিষ্ঠ প্রভৃতি
 গুরুজনের চরণে আমার সাক্ষাৎপ্রণিপাত নিবেদন করিয়া, এই

কহিবে, যাহাতে অচিরে মহারাজের শৌকনিরূতি হয়, যেন সকলে দ্বারায় তাহার কোন উপায় উদ্ভাবন করেন। পৌরবর্গকে, আমার যথায়োগ্য সাদরসম্ভাষণ জানাইয়া কহিবে, যেন সকলে শৌক-সংবরণপূর্ব্বক অচিরে স্মৃতিচিহ্ন হয় এবং প্রাণাধিক ভরতকে রাজ্য করিয়া পরমানন্দে কালযাপন করে ।

রাম এইরূপ বলিয়া বিবত হইলে, স্মমন্ত্র কৃতাজ্ঞলি হইয়া সজল নয়নে কহিলেন, আয়, য়ুন্ ! আমি কেমন করিয়া শূন্যরথ লইয়া অযোধ্যায় ফিরিয়া যাইব। তাহা হইলে লোকে আমাকে কি বলিবে? মহারাজের কাছেই বা কি প্রকারে আমি এ দক্ষযুথ দেখাইব। তোমার দুঃখিনী জননী যদি জিজ্ঞাসা করেন, আমার রামকে কোথায় রাখিয়া আসিলে, তখনই বা আমি তাহাকে কি বলিয়া সান্ত্বনা করিব। পৌরজন জিজ্ঞাসা করিলে, তাহাদিগকে বা কি কহিব। হায় ! আমার অদৃষ্টে কি এই ছিল, বলিয়া তিনি উচ্চৈঃস্বরে রোদন করিতে করিতে তথা হইতে প্রস্থান করিলেন।

স্মমন্ত্র রথ লইয়া অযোধ্যাভিযুখে গমন করিলে, রাম চণ্ডাল-রাজকে ডাকিয়া কহিলেন, সখে ! রক্ষনির্ধাস ও বস্কল আনিয়া দাও। আমরা এই স্থানে জটাবন্ধন ও বস্কলপরিধান করিয়া, ঋষি-বেশ ধারণ করিব। তদনুসারে গুহক রক্ষনির্ধাস ও বস্কল আনয়ন করিলে, রাম ও লক্ষ্মণ তদ্বারা জটানির্ধারণ করিয়া, এক বস্কলখণ্ডে পরিধেয় ও অপর বস্কলখণ্ডে উত্তরীয় বস্ত্র করিলেন। সীতাও পটবস্ত্র পরিত্যাগ করিয়া, বস্কলান্তর গ্রহণপূর্ব্বক তপস্বিনীর বেশ-অবলম্বন করিলেন। আহা ! সেই ভাবে জানকীকে কি চমৎকার দেখাইতে লাগিল। বোধ হইল, যেন এরূপ অপূর্ব্ব স্ত্রী কখন কাহারও নয়নগোচর হয় নাই। বস্ত্রতঃ, স্বভাবসুন্দর বস্ত্র যে ভাব

অবলম্বন করুক না কেন, সকল অবস্থাতেই রমণীয় ও অনির্কচনীয় প্রীতিপ্রদ হয় ।

তদনন্তর সকলে, তরণীতে আরোহণ করিয়া, ভাগীরথীর পরপারে উত্তীর্ণ হইলেন । তখন রাম লক্ষ্মণকে সঙ্ঘোধন করিয়া কহিলেন, বৎস ! নিষাদপতির প্রমুখাৎ শ্রবণ করিয়াছি, এখান হইতে মহর্ষি ভরদ্বাজের আশ্রম অধিক দূর নহে । অদ্য আমরা সেই স্থানেই গমন করিব । এই বলিয়া, রাম অগ্রে, জানকী মধ্যে ও লক্ষ্মণ সর্বপশ্চাতে, এই ভাবে শ্রেণীবদ্ধ হইয়া, সকলে দক্ষিণাভিমুখে গমন করিতে লাগিলেন । আহা ! সে সময়ের কি আশ্চর্য্য ভাব । বোধ হইল, যেন সাক্ষাৎ ধর্ম্ম অধর্ম্মের ভয়ে ভীত হইয়া, কোশলরাজ্য পরিত্যাগপূর্ব্বক নির্জুনকাননে প্রবেশ করিতেছেন ; আর, স্বয়ং রাজলক্ষ্মী তদীয় অনুসরণে প্রস্তুত হইয়াছেন, এবং মূর্ত্তিমান্রঘুকুলযশোরীশি, তাঁহাদের পশ্চাৎ পশ্চাৎ গমন করিতেছেন । জানকী উৎসুক্যবশতঃ ক্রিয়ৎপদ সবেগে গমন করিয়া, বন্ধুর ভূত্যাগে পুনঃ পুনঃ কুসুম-কোমল পদে স্থলিত হওয়াতে, জ্ঞানবদনে প্রাণপতিকে কহিলেন, আর্ষ্যপুত্র ! আর কতদূর গেলে মহর্ষির তপোবন দৃষ্ট হইবে । রাম প্রিয়ার কাতরতা শ্রবণে অতিমাত্র বিষাদিত হইয়া ভাবিতে লাগিলেন, হায় ! সামান্য পথপর্য্যটনে যাহার এক্রপ কষ্টবোধ হইতেছে, না জানি তিনি চতুর্দশ বৎসর কেমন করিয়া বনে বনে ভ্রমণ করিবেন । এই বলিয়া রাম অশ্রুজল বিসর্জন করিতে লাগিলেন । সীতার জন্য যে, রামের নিরন্তর নেত্রবারি বিগলিত হইবে, এই তাহার প্রথমাবতার হইল ।

অনন্তর, রাম জানকীকে কহিলেন, প্রিয়ে ! তোমার মন্তরগতি

দেখিয়া বোধ হইতেছে, তুমি পথশ্রমে ক্লান্ত ও কাতর হইয়াছ । বিশেষতঃ আতপতাপে তোমার মুখকমল মলিন ও সর্বশরীর ঘর্ণাক্ত হইয়াছে । ঐ দেখ, সম্মুখবর্তী অশোক তরুণ, কম্পমান-শাখাবাহুপ্রসারণদ্বারা, বিশ্রামার্থ তোমাকে আহ্বান করিতেছে । অতএব চল, ঐ স্থানে গমন করা যাউক । তদনুসারে সকলে সেই তরুণের সুশীতল ছায়ায় কিয়ৎকাল শ্রান্তিদূর করিয়া, সন্ধ্যার প্রাক্কালে ভরদ্বাজের তপোবনে উপস্থিত হইলেন, এবং সৌম্য-মূর্তি মহর্ষির সম্মুখবর্তী হইয়া, স্ব স্ব নামোচ্চারণ পূর্বক তদীয় চরণারবিন্দে অভিবাদন করিলেন । মহর্ষি “সত্যব্রতপালন করিয়া ভূভারহরণ কর” এই আশীর্বাদ প্রয়োগ করিয়া, মধুরসম্ভাষণ পূর্বক কহিলেন, বৎস রামচন্দ্র ! তোমাদের এই স্থানে আসিবার পূর্বেই, আমি সবিশেষ সমস্ত জানিতে পারিয়াছি । ভাবিতেছিলাম, তোমরা কতক্ষণে তপোবন অলঙ্কৃত করিবে । অধুনা তোমাদের শুভাগমনে কি পর্য্যন্ত আনন্দিত হইয়াছি, বলিতে পারি না । বৎস ! তুমি পিতৃসত্য-পালনার্থ, হস্তগত রাজ্যাধিকার পরিত্যাগ করিয়া, চতুর্দশ বৎসর অরণ্যবাসে আদিষ্ট হইয়াছ । অতএব যে পর্য্যন্ত চতুর্দশ বৎসর পূর্ণ না হয়, তাবৎকাল আমাদিগের আশ্রমে অবস্থান কর । তপোবন অতি রমণীয় স্থান । এখানে থাকিলে, তোমরা বনবাস-নিবন্ধন কোন কষ্টই অনুভব করিতে পারিবে না । পরে, জানকীকে কহিলেন, বৎসে ! তুমি সাক্ষাৎ লক্ষ্মীস্বরূপা । তোমার গুণের সীমা নাই । তুমি যে পতিসহচারিণী হইয়াছ, ইহাতে তোমার পতিপরায়ণতাগুণের পরাকাষ্ঠা প্রদর্শিত হইয়াছে । এক্ষণে কিছুকাল আমাদের তপোবনে, পতিসহবাসে মনের সুখে কালযাপন কর । এইমাত্র কহিয়া, মহর্ষি সমিহিত শিষ্যের প্রতি

উঁহাদের আতিথ্যসংকারের ভার্যাপণ করিয়া, সুয়ং সায়ন্তন-
হোমবিধি ও সঙ্ক্যাবন্দনাদি সমাপনার্থ, তথা হইতে প্রস্থান
করিলেন ।

সায়ংসময় অতীত হইলে, রাম যথোচিত বিশ্রামস্থল লাভ
করিয়া, মহর্ষিগণকাল্যে সমুপস্থিত হইলেন, এবং সমীপস্থিত বেত্রা-
সনে উপবেশন করিয়া বিনয়মধুরবচনে নিবেদন করিলেন, ভগবন্ !
রাজধানী তপোবন হইতে অধিক দূর নহে । যদি আমরা এখানে
অবস্থান করি, তাহা হইলে ভরত প্রভৃতি সংবাদ পাইয়া, নিশ্চয়ই
এখানে আসিয়া প্রমাদ ঘটাইবে । অতএব একরূপ একটী স্থান নির্ধা-
ন করিয়া দিন, যেখানে অবস্থান করিলে, কেহই সহজে আমা-
দিগের অনুসন্ধান করিয়া উঠিতে না পারে । তাহা হইলে আমরা
নিরুদ্ধেগে কালযাপন করিতে পারিব । মহর্ষি কহিলেন, বৎস !
যদি একান্তই এখানে থাকিতে অভিলাষ না হয়, তবে চিত্র-
কূট পর্বতে গমন করিয়া, তথায় বাসস্থান মনোনীত কর । চিত্রকূট
অতি রমণীয় স্থান । দেখিলেই বোধ হইবে, উহা যেন ত্রিভুবন-
সৌন্দর্য্যের একাধার । সেখানে কিছুকাল বাস করিলেই, অচিরে
তোমাদের চিত্তের ঐশ্বর্য্য সম্পাদিত হইয়া, অন্তরে অভূতপূর্ব্ব
সুখসঞ্চার হইতে থাকিবে । অধিক কি, তোমাদের আর রাজ-
ধানীতে প্রতিগমন করিতে কখনই ইচ্ছা হইবে না । তোমরা প্রাতঃ-
কালে, অতি সাবধানে যমুনা পার হইয়া কিয়দ্দূর গমন করিলে,
পরমপবিত্র অতিরহৎ এক বটরূক্ষ দেখিতে পাইবে । উহার নাম
শ্যামবট । ঐ রূক্ষটী পথশ্রান্ত পথিকজনের বিশ্রাম-নিকেতনস্বরূপ ।
মুনিগণ আতপতাপিত হইলে, ঐ শ্যামবটের শাখাতলে বসিয়া
নিরন্তর বিশ্রামস্থল লাভ করিয়া থাকেন । তথা হইতে কিয়দ্দূর

দক্ষিণাভিমুখে যাইলেই, পরিশেষে চিত্রকূটের সমীপস্থ একটী স্বভাবসুন্দর উন্নতভূভাগ নয়নগোচর হইবে । ঐ প্রদেশটী অতীব মনোরম বলিয়া, তপোনিষ্ঠ তপস্বিসম্প্রদায়, তথায় পর্ণকূটীর নির্মাণ করিয়া পরমসুখে কালযাপন করিতেছেন ।

পরদিন প্রাতঃকালে, রাম লক্ষ্মণ ও জানকী মহর্ষির নিকট বিদায় গ্রহণ করিয়া, জাহ্নবীযমুনা-সঙ্গম-সমুদ্র মহাতীর্থে অবগাহন-পূর্ব্বক, উড়ুপারোহণে কালিন্দীর পরপারে উত্তীর্ণ হইলেন ; এবং মহর্ষিপ্রদর্শিত পথ অবলম্বন করিয়া কিয়দূর গমন করিলে, শ্যামবট প্রাপ্ত হইলেন । অনন্তর তাঁহারা উহা পশ্চাতে রাখিয়া চিত্রকূটাভিমুখে গমন করিতে লাগিলেন । সেইকালে কঙ্কর-কন্টকাকীর্ণ দুর্গম পথ পর্য্যটনে জনকরাজতনয়ার সুকোমল চরণতল ক্ষতবিক্ষত হওয়াতে, রক্তচন্দনধারার ন্যায়, বিন্দু বিন্দু রুধিরধারা নির্গত হইতে লাগিল । তথাপি তিনি সে অসহ্য যাতনা সহ্য করিয়া, চক্ষের জল বল্কলাঞ্জে মার্জ্জন করিতে করিতে, পতির অনুগমন করিলেন । কিন্তু ক্ষতযন্ত্রণা ক্রমশঃ অসহ্য হওয়াতে, জানকী অগ্রগামী পতিকে কাতরস্বরে কহিলেন, নাথ ! ধীরে ধীরে চলুন ; আমি দ্রুতগমনে ক্রমেই অক্ষম হইতেছি । রাম শুনিয়া কহিলেন, প্রিয়ে ! অদ্য এই স্থানে বিশ্রাম করা যাউক । চিত্রকূট এখান হইতে অধিক দূর নহে ; কল্য তথায় গমন করা যাইবে ।

তদনুসারে, লক্ষ্মণ কিঞ্চিৎ ফলমূলাদি ও পানীয় আনয়ন করিলে তদ্বারা তাঁহারা ক্ষুৎপিপাসা নিরন্তর করিলেন । ক্রমে পথ-শ্রমে কাতরতাপ্রযুক্ত, জানকীর ঘোরনিদ্রার আবির্ভাব হইল । তখন তিনি রামবাহুর উপরি মস্তক বিন্যস্ত করিয়া পরমসুখে শয়ন করিলেন । বোধ হইল, যেন সৌদামিনী নবীন জলধরের সহিত অম্বর-

তল পরিত্যাগ করিয়া, দৈর্ঘ্যাবলম্বনে ধরণীপৃষ্ঠে নিদ্রা যাইতেছেন ।

ক্রমে সায়াংসময় উপস্থিত হইল । ভগবান মরীচিমালী যেন জানকীর দুঃখ দেখিতে না পারিয়াই, অন্তগিরিশিখরে অধিরোহণ করিলেন । বিভাবরী তমোময় আবরণে দশদিক আচ্ছন্ন করিল । সুধাকর, যেন সীতাছুঃখে দুঃখিত হইয়াই, সুধাবর্ষণচ্ছলে অঞ্জবিন্দু ক্ষেপণ করিতে লাগিলেন । তখন রাম লক্ষ্মণকে কহিলেন, ভাই ! অদ্য আমরা এই মনুষ্যসমাগম-শূন্য স্থাপদ-সঙ্কুল ভীষণ স্থানে অবস্থান করিতেছি, অতএব সতর্কতাপূর্বক রাত্রিযাপন করিতে হইবে । লক্ষ্মণ অনুজধর্মরক্ষণে একান্ত যত্নশীল, সুতরাং নিদ্রা পরিত্যাগ করিয়া, সশস্ত্র সমস্ত যামিনী জাগরিত রহিলেন ।

পরদিন, তাঁহারা তথা হইতে প্রস্থান করিয়া চিত্রকূটে উপস্থিত হইলেন । চিত্রকূটবাসী তপস্বিগণ, তাঁহাদের শাস্ত ও বীররস-মিশ্রিত মনোহর মূর্তি অবলোকন করিয়া, সবিষ্ময়ে পরস্পর কহিতে লাগিলেন, ইহারা কে, কোথা হইতে আগমন করিতেছেন । দেখিয়া আপাততঃ প্রতীতমান হয়, ইহারা তিস্রাজীবী, কিন্তু তাহা হইলে এরূপ অনুপমরূপ-লাবণ্য-সম্পন্ন কামিনী কেন সঙ্গে আসিবে ? ভিক্ষুকের দ্বারপরিগ্রহ যে একান্ত অসম্ভব । তবে বুঝি বিবেকী ; নতুবা এখানে আসিবার কারণ কি ? কিন্তু যে ব্যক্তি বিষয়বাসনাবর্জিত হন, তাহার হস্তে বীরচিহ্ন কার্য্যকর কেন ? অনুমান হয় কোন রাজর্ষির পুত্র, কিন্তু তাহাই বা কি প্রকারে বিচারসম্মত হয় ? রাজপুত্রে কোথায় জটীভার বহন করিয়া থাকে ? তবে অন্যচারী ব্যাধ । কিন্তু ব্যাধ অতি নীচ জাতি ; নীচবংশে এরূপ অমানুষ সৌন্দর্য্য কখনই সম্ভবে না । তবে নিশ্চয়ই ইহারা দেবতা ; নতুবা মনুষ্যালোকে এরূপ অদৃষ্টপূর্ব অভূত রূপরাশির

সমাবেশ কখনই দৃষ্ট হয় না। এইরূপ সকলে নানা তর্কবিতর্ক করিতেছেন, এমন সময়ে রাম সমীপস্থ হইয়া, তাঁহাদের চরণ বন্দনা করিলেন ; এবং আত্মপরিচয় প্রদান করিয়া সকলের সংশয় অপনোদন করিয়া দিলেন ।

ক্রমে, মুনিগণের সহিত রাম ও লক্ষ্মণের বিশিষ্টরূপ আলাপ হইতে লাগিল । জানকীরও সমবয়স্কা ঋষিতনয়াদিগের সহিত সখীবৎ সৌহার্দভাব জন্মিল । অনন্তর তাঁহারা সেই স্থানে কুটীর-দ্বয় নিষ্ঠাণ করিয়া তাহাতে অবস্থান করিতে লাগিলেন । আহা ! সময়ে কি না করে । যাঁহারা সুরম্যহৃদ্যাস্থিত মনিময় পর্য্যঙ্কে, কুসুমসুকোমল শয্যায় শয়ন করিয়া দিনযামিনী যাপন করিতেন, যাঁহারা নিরন্তর নানারসমিশ্রিত উপাদেয় ভক্ষণ, ও মহামূল্য বিচিত্র বসন পরিধান করিতেন ; শত শত দাস দাসী যাঁহাদের সেবায় নিয়ত নিযুক্ত ছিল ; অধুনা তাঁহাদের পর্ণকুটীরে ধরাসনে শয়ন, ফলমূলাদি ভক্ষণ, নির্য্যবহারি পান, ইত্যাদি বন্যরুত্তিতে সময় অতিবাহিত হইতে লাগিল ।

এদিকে বৃদ্ধ রাজা দশরথ, রামবিরহে একান্তকাতর ও যার পর নাই শোকাভিভূত হইয়া, আহার বিহার নিদ্রা প্রভৃতি তাবৎ ব্যাপার পরিত্যাগ করিলেন ; এবং অবিশ্রান্ত অশ্রু বিসর্জন করিয়া, অহোরাত্র কেবল, হারাম ! এই করুণশব্দে বিলাপ করিতে লাগিলেন । দুর্ল্লিখহ পুত্রশোকদহনে নিরন্তর অন্তর্দাহ হওয়াতে, তাঁহার শরীর ক্রমশঃ শীর্ণ ও বিবর্ণ হইয়া কঙ্কালমাত্রাবশিষ্ট হইল । তিনি একান্ত রামগতপ্রাণ ; সুতরাং রামবিরহে, দুর্ল্লিখ দেহভারবহন-ক্লেশ অসহ্য হওয়াতে, দিনযামিনী ধরালুণ্ঠিত হইয়া, কখন আত্মভৎসন, কখন রামগুণ-কীর্তন, কখন বা কৌশল্যাকে অনুন্নয়, কখন কৈকে-

য়ীকে তিরস্কার করিতে লাগিলেন ; এবং কেবল সূমন্ত্রের আগমন-পথ নিরীক্ষণ করিয়া জীবিত রহিলেন ।

চতুর্থ^১ দিবসে সূমন্ত্র শূন্যরথ লইয়া, আর্তিস্বরপূর্ণ অযোধ্যায় উপস্থিত হইলেন ; এবং দশরথের সন্নিধানে গমন করিয়া সাক্ষাৎকালে কাতরসুরে নিবেদন করিলেন, মহারাজ ! এ হতভাগ্য রামচন্দ্রকে অরণ্যে রাখিয়া আসিল । দশরথ শ্রবণমাত্র, হা রাম ! বলিয়া মুচ্ছিত হইলেন । সূমন্ত্র অতিষভে তাঁহার চৈতন্য সম্পাদন করিলে, রাজা গলদশ্রলোচনে আকুলবচনে জিজ্ঞাসা করিলেন, সূমন্ত্র ! তুমি আমার বৎসকে কোথায় রাখিয়া আসিলে ? বৎস আমায় কি বলিয়া দিয়াছেন ? সূমন্ত্র আদ্যোপান্ত সমস্ত বর্ণন করিয়া কহিলেন, মহারাজ ! যুবরাজ রামচন্দ্র, মহারাজের চরণে প্রণাম জানাইয়া নিবেদন করিয়াছেন, পিতা যেন আমাদের নিমিত্ত কিছুমাত্র শোক বা দুঃখ প্রকাশ না করেন । আমরা তাঁহার চরণপ্রসাদে অরণ্যে পরমসুখে কালযাপন করিব । আমাদের জন্য কোন চিন্তা নাই ।

দশরথ শ্রবণমাত্র, দীর্ঘনিঃশ্বাস পরিত্যাগপূর্বক রোদন করিতে করিতে কহিলেন সূমন্ত্র ! বিরত হও ; আর বলবার আবশ্যকতা নাই । আমার হৃদয় অহুতাপানলে ভস্মীভূত হইল ! হা বৎস রামচন্দ্র ! হা বৎস লক্ষ্মণ ! হা বৎসে সীতে ! তোমরা এখন কোথায় রহিয়াছ । কণ্টককঙ্করাকীর্ণ দুর্গমবনে কেমন করিয়া ভ্রমণ করিতেছ । আতপতাপে মুখ-চন্দ্র মলিন হইলে, স্নেহনয়নে কে তোমাদের মুখনিরীক্ষণ করিতেছে । পিপাসিত হইলে, কে তোমাদিগকে জলদান করিতেছে । ক্ষুধার উদ্বেক হইলে, কে তোমাদিগকে আহার করাইতেছে । হা বৎস রামচন্দ্র ! একবার আসিয়া এ

পাপিষ্ঠের এ নরাধমের অঙ্কভূষণ হও । মধুরস্বরে একবার এ নির্দয়কে এ নিষ্ঠুরকে, পিতা বলিয়া সম্বোধন কর । শুনিয়া আমি এ জন্মের মত বিদায় হই । হা পিতৃবৎসল ! পিতাকে সত্যার্থ হইতে রক্ষা করিয়া, ভাল পিতৃভক্তি প্রদর্শন করিলে । পিতৃদুঃখ যে কি প্রকারে পালন করিতে হয়, তাহার নূতন পথ উদ্ভাবিত করিয়া জগতের দৃষ্টান্তস্থলাভিষিক্ত হইলে । আমি ইহজন্মে আপন দুষ্কৃতির ফলভোগ করিতেছি । কিন্তু আর এ দুঃসহ যাতনা সহ্য হয় না । এক্ষণে কালের শরণাপন্ন হইয়া সকল শোক, সকল দুঃখ, সকল সম্ভাপ বিসর্জন করিব । প্রিয়দর্শন ! আমার অন্তিমকাল উপস্থিত ; এ সময়ে তোমার চন্দ্রানন একবার দেখিতে পাইলাম না, অন্তঃকরণে বড়ই আক্ষেপ রহিল । এইরূপ আক্ষেপ করিতে করিতে, তাহার ইন্দ্রিয় সকল বিকল, মুখশ্রী মলিন, এবং নয়নযুগল দৃষ্টিহীন হইয়া পড়িল । প্রাণবায়ু, প্রবল নিঃশ্বাসবায়ুর সহিত দেহত্যাগ করিয়া পলায়ন করিল । দশরথ হতচেতন হইয়া, মানবলীলা সংবরণ করিলেন ।

রাজার তাদৃশী অবস্থা দর্শনে, সকলে হাহাকার করিয়া, উচ্চৈঃস্বরে রোদন করিতে লাগিল । কৌশল্যা শোকে নিতান্ত বিহ্বল হইয়া, মহারাজ এ চিরদুঃখিনীকে পরিত্যাগ করিয়া কোথায় চলিলেন ; এ অভাগিনীর আর যে কেহই নাই । প্রিয়পুত্র পরিত্যাগ করিয়াছেন, জীবনস্বামীও কি পরিত্যাগ করিলেন ; এইরূপ বিলাপ করিয়া মূর্ছিতা হইলেন । সুমিত্রা দুর্বিষহ শোকভরে অতিভূত হইয়া, হায় ! কি সর্বনাশ হইল, বলিয়া মূর্ছাপ্রাপ্ত হইলেন । পৌরজন আর্তনাদ করিতে করিতে, কেহ মহারাজ, কেহ পিতঃ, কেহ প্রভো, ইত্যাদি সম্বোধনে, দশরথের শরীরোপরি অজস্র

অশ্রুবিসর্জন করিয়া তদীয় অঙ্গের ধূলি ধৌত করিতে লাগিল।
তৎকালে রাজভবন নিরন্তর হাহাকাররবে পরিপূর্ণ হইয়া উঠিল।

ক্রমে অফাৎ গত হইলে, ভরত মাতুলালয় হইতে আগমন
করিয়া দেখিলেন, রাজপুরীর আর সে অবস্থা নাই। রাজসভা
শূন্য, পৌরজন বিষাদমগ্ন, সর্বত্রই হাহাকারপূর্ণ। তদর্শনে, হৃদয়ে
শঙ্কা উপস্থিত হওয়াতে, ভরত ক্ষণবিলম্বব্যতিরেকে পিতৃভবনে
গমন করিলেন; দেখিলেন, তথায় পিতা নাই। পিতার সেই
শয্যা, সেই রত্নসিংহাসন, সেই সকল বিলাসের বস্তু, হীনপ্রভ ও
বিগতশ্রী হইয়া রহিয়াছে। দেখিবামাত্র ভরতের মনে একপ্রকার
অভাবিত ভাবের উদয় হইল। তিনি আরও অধিক ব্যাকুল হইয়া
মাতৃগৃহে প্রবেশ করিলেন। কৈকেয়ী আহ্লাদভরে প্রণত পুত্রের
মুখচুম্বন ও মস্তকাস্পর্শ করিয়া, কুশল জিজ্ঞাসা করিলেন। ভরত
কুশল-বার্তা বিজ্ঞাপন করিয়া, আকুলবচনে জিজ্ঞাসা করিলেন,
মাতঃ! রাজধানীর এক্রূপ অভূতপূর্ব ধ্বংস দর্শন করিতেছি
কেন? মহারাজ কোথায়? তিনি শারীরিক ত ভাল আছেন?
অনেক দিবস হইল, পিতৃচরণ দর্শন না করাতে, আমার চিত্ত অতি-
মাত্র ব্যাকুল হইয়াছে। অতএব জননি! ত্বরায় বলুন, পিতা কোন
স্থানে অবস্থান করিতেছেন?

কৈকেয়ী কহিলেন, বৎস! সত্যপ্রিয় মহারাজ কালধর্মের
বশংবদ হইয়া, মায়াময় সংসার পরিত্যাগ পূর্বক, পরলোকে গমন
করিয়াছেন। ভরত শ্রবণমাত্র, হা পিতঃ! বলিয়া ছিন্নমূল তরুর
ন্যায় ভূতলে পতিত হইলেন, এবং উচ্চৈঃস্বরে রোদন করিতে
করিতে কহিলেন, মাতঃ! আর আমি এ জন্মের মত পিতার
পাদপদ্ম দর্শন করিতে পাইব না। তবে এ জগতে আর কে

আমাকে স্নেহমধুরসম্ভাষণে আচ্ছাদন করিবেন। কে আমাকে বাৎসল্যভাব-পূরিত কর দ্বারা স্পর্শ করিবেন। বিপৎপাৎ হইলে, আমি কাহার নিকট গিয়া আশ্রয় গ্রহণ করিব। বৎস বলিয়া আর কে আমাকে সম্ভাষণ করিবেন। হায় ! আমি কি হতভাগ্য। সম্ভান হইয়া, অস্তিমকালে পিতার কোন কার্য্যই করিতে পারিলাম না। হায় ! কি আক্ষেপের বিষয়। চরমসময়ে একবার পিতার সহিত সাক্ষাৎ পর্য্যন্তও হইল না। এইরূপ বহু বিলাপ করিয়া, ভরত পরিশেষে চক্ষের জল মার্জ্জন পূর্ব্বক कहিলেন, মাতঃ ! কি কাল-ব্যাদি পিতাকে আক্রমণ করিয়াছিল ? কৈকেয়ী পুত্রসমীপে, আদ্যোপান্ত মহারাজের মৃত্যুর কারণ বর্ণন করিয়া कहিলেন, বৎস ! আমি কত ষড়্‌যন্ত্র করিয়া তোমার নিমিত্ত রাজ্যরক্ষা করিয়াছি। এক্ষণে শোকসংবরণ পূর্ব্বক, রাজ্যভার স্বহস্তে গ্রহণ কর। তোমাকে রাজ্যসনে আসীন দেখিয়া, আমার চক্ষু পরি-তৃপ্ত হউক ।

একে পিতৃশোক ভরত অতীব কাতর হইয়াছিলেন, তাহাতে আবার এইরূপ অতর্কিত রামনির্দাসনের কথা শুনিবামাত্র কম্পিত-কলেবর হইয়া, হা হতোহস্মি, বলিয়া ভূতলে পতিত ও মূর্ছিত হইলেন। পিতৃশোক অপেক্ষা তাঁহার ভ্রাতৃবিয়োগশোক শতগুণে তাপজনক হইল। ক্ষণকাল পরে সংজ্ঞালাভ হইলে, তিনি কিং-কর্তব্য-বিমূঢ় হইয়া, কিয়ৎকাল শূন্যনয়নে কৈকেয়ীর মুখ নিরীক্ষণ করিতে লাগিলেন। অনন্তর সহস্রাউদ্ভূতরোষভরে জননীকে বহু তিরস্কার ও ভৎসনা করিয়া সবিবাদে कहিতে লাগিলেন, আমি জন্মাস্তরে কত পাপসঞ্চয় করিয়াছিলাম, তাহাতেই এমন রাক্ষসীর দন্ধোদরে জন্মগ্রহণ করিয়াছি। আমার জীবনে ধিক্। আমি এখনও

জীবিত রহিয়াছি। আমার কেন এই মুহূর্তেই মৃত্যু হইল না? হা
 ঞ্জার রঘুবীর! এই হতভাগ্যের জন্যই আপনার যত দুর্গতি
 ঘটিয়াছে। এই মন্দভাগ্যই আপনার সকল অনর্থের মূল। হায়!
 আমি যদি জন্মগ্রহণ না করিতাম, তাহা হইলে আর এবস্তুত বিষম
 অনর্থ সংঘটিত হইত না। হায়! যদি ভূমিষ্ঠ হইবামাত্রই আমার মৃত্যু
 হইত, তাহা হইলে আর আর্ষ্যকে একরূপ অভূতপূর্ব দুঃখার্ণবে পতিত
 হইতে হইত না। হা মাতঃ! তুমি মুহূর্তকালের মধ্যে কি এক অতি-
 মহান অনর্থশ্রোত প্রবাহিত করাইয়াছ। জগতে তোমার এ অপবশ,
 চিরস্থায়িরূপে দেদীপ্যমান রহিল। তুমি যে রাজ্যের লোভে এই
 বিষমকাণ্ড করিয়াছ, সে রাজ্যে আমার প্রয়োজন নাই। এযাঁহার
 রাজ্য, আমি তাঁহাকে সিংহাসনে বসাইয়া, সুয়ং স্বাবজ্জীবন প্রভু-
 পরায়ণ ভৃত্যের ন্যায় তাঁহার চরণসেবা করিব। হা আর্ষ্য রামচন্দ্র!
 হা আর্ষ্য সীতে! হা অন্নজ লক্ষ্মণ! তোমরা রাজভবন শূন্য করিয়া
 কোথায় গমন করিয়াছ। এখানে পিতৃদেব তোমাদের বিয়োগে
 কাতর হইয়া, প্রাণত্যাগ করিয়াছেন। হায়! হায়! যাহা হইতে
 পিতার মরণ, অগ্রজের নির্দাসন, রাজ্যের অরাজকতা ও প্রজা-
 পুঞ্জের দীনতা হইয়াছে, সেই পাণীয়সীর গর্ভজাত বলিয়া, সকলে
 আমাকে কত নিন্দা, কত ঘৃণা করিতেছে। কি সর্বনাশ! কেমন
 করিয়াই বা জনসমাজে এ মুখ দেখাইব। এ লোকাপবাদ ছুনিবার
 হইয়া উঠিয়াছে। এই বলিয়া ভরত, উচ্চৈঃস্বরে রোদন ও অনিবার্য-
 বেগে অশ্রুবিসর্জন করিতে লাগিলেন।

ভরতের ক্রন্দন শব্দ শ্রবণ করিয়া, বশিষ্ঠদেব দ্বারায় অন্তঃপুর-
 মধ্যে প্রবেশ করিলেন; এবং তৎসমীপে উপস্থিত হইয়া, মূর্তিমান
 জ্ঞানরাশির ন্যায়, গম্ভীরসরে কহিলেন, রাজকুমার! রোদন সংবরণ

কর । তরলপ্রকৃতি সামান্য মনুষ্যের ন্যায়, একরূপ কাতর হওয়া তোমার কর্তব্য নহে । দেখ, প্রাণিমাাত্রই অবশ্যম্ভাবী মৃত্যুর অধীন । জন্মিলেই মৃত্যু হয়, ইহা চিরপ্রসিদ্ধ । কেহ চিরকাল জীবিত থাকিতে পারে না । আজি হউক, বা দুইদিন পরেই হউক, সকলকেই কাল-ধর্ম্মের অনুরাগত হইতে হইবে । তখন আর পার্থিব বিষয়ের সহিত কোন সম্পর্কই থাকিবে না ; পুত্র কলত্রাদির সহিত সম্বন্ধ একবারে তিরোহিত হইবে । যে দেহের নিমিত্ত কত যত্ন, কত আয়স সূঁকার করিতে হয়, সেই দেহই পরিশেষে ধূলায় বিলুপ্ত ও ভস্মরাশিতে পরিণত হইয়া থাকে । অতএব, যখন প্রাণিমাাত্রই ধ্বংসশীল, তখন আর তাহার নিমিত্ত শোক করায় ফল কি ? আরও যদি জানিতাম যে, শোক করিলে প্রথম প্রিয়পদার্থের সহিত পুনর্জন্মের সম্ভাবনা আছে ; তাহা হইলে অনুরোধ করা যাক্‌তি নাই । কিন্তু যখন দেখিতেছি, একবার জীবন গত হইলে আর কিছুতেই তাহাকে প্রত্যাবর্তিত করিতে পারা যায় না, তখন আর যথা শোকমোহে অভিভূত হইবার প্রয়োজন কি ? বৎস ! এই যে সংসার দেখিতেছ, ইহা অতি বিচিত্র । সংসারের কোন বিষয়েরই স্থিরতা নাই । প্রাতঃকালে জগতের যে ভাব দর্শন করা যায়, মধ্যাহ্নকালে সে ভাব পরিবর্তিত হইয়া, ভাবান্তর লক্ষিত হইতে থাকে । আবার সায়াংকালে অন্যবিধ ভাব দৃষ্টিগোচর হয় । জগতের সকল বস্তুই এই-রূপ পরিবর্তনশীল । ইচ্ছাবিযোগ-নিবন্ধন অন্তঃকরণে শোকের উদয় হয় বটে, কিন্তু প্রকৃত মনুষ্যের হৃদয়ে উহা অধিকক্ষণ স্থান প্রাপ্ত হয় না । তুমি জ্ঞানবান্ ও পণ্ডিত । তোমার বিশিষ্টরূপ কার্য্যাকার্য্য-জ্ঞান জন্মিয়াছে । অতএব বৎস ! তুমি সংসারের অসারতা, ও বস্তুমাত্রেরই অনিত্যতার বিষয় পর্যালোচনা করিয়া, চিন্ত

স্থির কর ; এবং মনোমন্দির হইতে শোক, দুঃখ একবারে দূরীভূত করিয়া দাও ।

বৎস ! ষৎকালে মহারাজ পরলোকগমন করেন, তখন রামচন্দ্র বনে গমন করিয়াছিলেন, এবং তোমরাও কেহ এখানে উপস্থিত ছিলে না ; সেই কারণে আমি মহারাজের মৃত দেহ তৈলপূর্ণ পাত্রে সংস্থাপিত করাইয়া রাখিয়াছি । এক্ষণে সৰ্ব্বশোকবিস্মরণপূৰ্ব্বক, তদীয় অস্ত্যেষ্টিক্রিয়া সমাপন করিয়া, পুত্রের কার্য্য কর ; এবং রাম যেমন পিতৃ-আজ্ঞা শিরোধার্য্য করিয়া বনে গমন করিয়াছেন, তদ্রূপ তুমিও পিতৃ-আজ্ঞা পালন পূৰ্ব্বক প্রজাপালনকার্য্যে দীক্ষিত হও ।

ভরত, বশিষ্ঠদেবের উপদেশবাক্য আকর্ষণ করিয়া, ক্ষণকাল অধোমুখে মৌনাবলম্বন করিয়া রহিলেন । অনন্তর অতিরহৎ নিঃশ্বাস-ভার পরিত্যাগ পূৰ্ব্বক, চক্ষের জল মার্জন করিতে করিতে অক্ষুট-স্বরে কহিলেন, ভগবন্ ! পিতার মৃত্যু ও অগ্রজের নির্দাসন, উভয়ই আমার চিত্তকে একবারে আকুল করিয়া তুলিয়াছে । হৃদয়ের মৰ্ম্ম-গ্রস্থি সকল, যেন শিথিল হইয়া পড়িতেছে । মানুষ্যের পদে পদে বিপদ ঘটয়া থাকে, সত্য : কিন্তু আমার ন্যায় একরূপ বিপদের উপর বিপৎপাত কখন কাহার অদৃষ্টে ঘটে নাই । এই কারণে আমি কিছুতেই ধৈর্য্যাবলম্বন করিতে পারিতেছি না । শোকমোহে অভিভূত হওয়া উচিত নহে, তাহা আমি বিলক্ষণ অবগত আছি, কিন্তু কি করি, কিছুতেই আমার চিত্ত স্থির হইতেছে না । এই বলিয়া অবিরল-ধারায় বাষ্পবারিবিমোচন করিতে লাগিলেন ।

তদনন্তর বশিষ্ঠদেব পিতৃপ্রেতক্রিয়াকরণার্থে পুনঃপুনঃ অনু-রোধ করিলে, ভরত কথঞ্চিৎ শোকাবেগসংবরণ করিয়া, যে স্থানে পিতার মৃতদেহ রক্ষিত হইয়াছিল, তথায় তাঁহার সহিত গমন করি-

লেন ; এবং নয়নজলে তদীয় অঙ্গ ধৌত করিয়া, পরিশেষে সরযু নদী তীরে পিতার অস্ত্যেষ্টি-ক্রিয়া সমাপন করিলেন ।

ক্রমে, অস্ত্যেষ্টিক্রিয়ার পরে যে যে ক্রিয়াকলাপ করিতে হয়, ততাবৎ সুসম্পন্ন হইলে ; বশিষ্ঠদেব ভরতের নিকট উপস্থিত হইয়া কহিলেন, কুমার ! রাজা না থাকিলে রাজ্য রক্ষা হওয়া দুষ্কর । মহারাজের মৃত্যু হওয়া অবধি কোশলরাজ্য অরাজক হইয়াছে । অতএব তুমি কল্য হইতে সাম্রাজ্যের শাসনভার গ্রহণ করিয়া, প্রজাপালনকাৰ্য্যে ভ্রাশ্বিত হও ।

বশিষ্ঠদেবের বাক্য শ্রবণ করিয়া, ভরত রোদন করিতে করিতে কহিলেন, ভগবন্ ! আমি প্রাণ থাকিতে, কখনই রাজ্যভার গ্রহণ করিতে পারিব না । এ আৰ্য্য রামচন্দ্রের রাজ্য ; ইহাতে আমার অধিকার কি ? যদি বলেন, পিতৃদেব আমাকে রাজপদ প্রদান করিয়া গিয়াছেন, কিন্তু আমি নিশ্চয় বলিতেছি, ইহাতে কখনই তাঁহার আন্তরিক ইচ্ছা ছিল না । পাপীয়সী জননীর ভয়েই এরূপ বিষমকাণ্ড ব্যবসিত হইয়াছে । এক্ষণে আমি আৰ্য্যের নিকট গমন করিয়া, যেমন করিয়া পারি, তাঁহাকে রাজধানীতে আনয়ন করিব, এবং রাজাসনে উপবেশন করাইয়া, নিরন্তর তাঁহার সেবা ও শুশ্রূষায় কালযাপন করিব । আৰ্য্য আমাকে সবিশেষ স্নেহ করিয়া থাকেন । আমি তাঁহার চরণে ধরিয়া বিনয় করিয়া বলিলে, তিনি কখনই আমার প্রস্তাবে অমত করিবেন না । বিশেষতঃ পিতৃদেবের স্বর্গারোহণ-সংবাদ শুনিলে, তিনি কখনই নিশ্চিন্ত থাকিতে পারিবেন না । অতএব আপনি আৰ্য্যসকাশে যাইতে অনুমোদন করুন । বশিষ্ঠদেব ভাতৃপরায়ণ ভরতের নিকটাকাতিশয়-দর্শনে হৃষ্টচিত্ত হইয়া, তদীয় গমনে সম্মতি প্রদান করিলেন ।

তদনন্তর, ভরত ভাতৃউদ্দেশে, দীনবেশে অরণ্যযাত্রা করিলেন । যথাকালে চিত্রকূটপর্কস্নেহে উপস্থিত হইলে, রামের পর্ণকূটীর তাঁহার নেত্রপথে পতিত হইল । তখন তিনি অতিদীনমনে কূটীরদ্বারদেশে গমন করিয়া দেখিলেন, রামচন্দ্র মৃগচর্কের আসনে উপবেশন করিয়া, লক্ষ্মণের সহিত মধুরালাপে কালযাপন করিতেছেন । রামের মস্তকে নবজটাজাল, সর্সাবয়বে ডম্বলেপন, হস্তে কুশাঙ্গুরীয়, এবং অধোদেশে বল্কলবাস । আর্ষ্যের তাদৃশী দশা দর্শনে, ভরত শোকভরে অতিমাত্র অধীর হইয়া, সাক্ষাৎনয়নে, হা আর্ষ্য ! বলিয়া রামচন্দ্রের পাদমূলে আত্মসমর্পণ করিলেন, এবং উচ্চৈঃস্বরে রোদন করিতে করিতে কহিলেন, আর্ষ্য ! আমার অপরাধ মার্জনা করুন । এই হতভাগ্যের, এই নরাধমের জন্যই আপনার একুপ শোচনীয় দশা উপস্থিত হইয়াছে । হায় ! আমি যদি পাপীয়সী নির্ঘমা জননীর দন্ধোদরে জন্মগ্রহণ না করিতাম, যদি ভূমিষ্ঠ হইবামাত্রই আমার প্রাণবিয়োগ হইত, তাহা হইলে আর আনাকে আর্ষ্যের একুপ অবস্থা দেখিতে হইত না । আমি আর আপনার এ প্রকার অবস্থা দেখিতে পারি না ; আমার হৃদয় বিদীর্ণ হইয়া যাইতেছে । আর্ষ্য ! যদি আমার প্রতি আপনার স্নেহ ও মমতা থাকে, যদি আমার এ পাপজীবন রক্ষা করিতে বাসনা হয়, তবে আপনি অচিরে এ ঋষিবেশ পরিত্যাগ করিয়া গৃহে চলুন । আপনার বিরহে রাজ্য উৎসন্ন হইয়া যাইতেছে ।

রাম, ভরতকে একান্তকাতর ও বার পর নাই বিষন্ন অবলোকনে, উত্তরীয় বল্কলদ্বারা তদীয় নয়নের অশ্রুমার্জন করিয়া, সস্নেহ-মধুরসম্ভাষণে সান্ত্বনা করিয়া কহিলেন, বৎস ভরত ! উঠ উঠ, ধৈর্য্যাবলম্বন কর, এত কাতর হইতেছ কেন ? আমি এ পয়াস্ত

তোমার কোন অপরাধ দেখিতে পাই না, তবে তুমি আজি কেন আমার নিকট ক্ষমা প্রার্থনা করিতেছ ? এবং কি কারণেই বা জন-
নীর প্রতি দোষারোপ করিয়া আপনার অমঙ্গল কামনা করিতেছ ?
দেখ ভাই ! মাতৃনিন্দা করা মহাপাপ । তুমি কেন অকারণে জন-
নীকে নিন্দাবাদে দূষিত করিতেছ ? আর ও কথা কখন আন্তিক্রমেও
মুখে আনিও না ; আনিলে, মহাপাতক সঞ্চয় করা হইবে । তাঁহার
দোষ কি ? তিনি কি করিবেন । আমি আপন অদৃষ্টের ফলভোগ
করিতেছি ! যদি বিধাতা আমার ললাটে দুঃখভার লিখিয়া থাকেন,
তাহা কেহ কখন খণ্ডন করিতে পারিবে না । বৎস ! তুমি মনে
করিতেছ, অরণ্যবাস-নিবন্ধন আমি অসুখী হইয়াছি ; কিন্তু দেখ,
একদিনের জন্যেও আমার মনে বিন্দুমাত্র অসুখসঞ্চার হয় নাই ।
আমি গৃহেতে যে ভাবে ছিলাম, এখানে বরং তদপেক্ষা সুখে দিন-
যাপন করিতেছি । দেখ ভাই ! আমার রাজ্যভার গ্রহণ করা কেবল
তোমাদের সুখস্বচ্ছন্দের নিমিত্ত । যদি তোমরা স্বয়ংই সেই সুখ-
ভোগ করিতে সমর্থ হও, তবে আর আমাকে রুখা কেন অরুরোধ
করিতেছ ? আমার যতই কেন কষ্ট হউক না, যতই কেন অসুখ
হউক না, তোমরা সুখস্বচ্ছন্দে থাকিলে সে কষ্ট সে দুঃখ একদিনের
জন্যেও আমার অসুখকর হইবে না । আমি যখন মাতার নিকট,
চতুর্দশ বৎসর অরণ্যবাস করিব, বলিয়া প্রতিশ্রুত হইয়াছি, আর
বিশেষতঃ পিতা আমাকে সত্যপালনে আদেশ করিয়াছেন, তখন
আমি তোমার প্রার্থনায় সম্মত হইয়া দুরপনয়ে পাপপঙ্কে লিপ্ত
হইতে পারিব না । তুমি গৃহে গমন কর । পিতৃদেব তোমার হস্তে
সাম্রাজ্যের শাসনভার সমর্পণ করিয়াছেন । তদনুসারে তুমি পিতৃ-
আজ্ঞা পালনপূর্বক রাজ্যশাসন কর । কদাচ তাহার অন্যথাচরণ

করিও না। করিলে বিষম অধর্মসঞ্চয় হইবে, এবং পিতৃদেবও পাপস্পর্শী হইবেন। অতএব পিতাকে ধর্মপথস্থলিত করা অপেক্ষা, তোমার রাজ্যভার গ্রহণ করা কতদূর সঙ্গত, তাহা তুমিই কেন এক বার বিবেচনা করিয়া দেখ না। যদি সম্ভান দ্বারা পিতৃবাণী ও পিতৃধর্ম প্রতিপালিত না হয়, তবে পুত্রকামনার আবশ্যকতা কি? বৎস! আমি বলিতেছি, তুমি গৃহে গমন করিয়া, পিতৃ-আদেশানুযায়ী কর্তব্যানুষ্ঠানে কৃতনিশ্চয় হও, এবং অস্মদ্বিরহকাতর জনকের সেবা ও শুশ্রূষায় কালযাপন কর।

ভাতৃবৎসল ভরত, অগ্রজের কথা শুনিয়া যৎপরোনাস্তি বিষণ্ণ হইলেন; এবং বাস্পাকুলনয়নে কাতরস্বরে কহিলেন, আর্ঘ্য! পিতা আমাদিগকে পরিত্যাগ করিয়া স্বর্গারোহণ করিয়াছেন, এক্ষণে আপনিও যদি অযোধ্যাগমনে অমত করেন, তবে আর আমাদিগের গতি কি হইবে। আমাদিগের যে আর কেহই নাই। আমরা কাহার মুখপানে চাহিয়া দুঃখানল নির্বাপন করিব। বিপদ পড়িলে, কে আমাদিগকে আশ্বাস প্রদান করিবেন? কুপথে পদার্পণ করিলে, কে আমাদিগকে নিবারণ করিবেন? আর্ঘ্য! আর অযোধ্যার সে শ্রী নাই। অতএব আমি গৃহে গমন করিব না। শূন্যগৃহে বাস করা অপেক্ষা, অরণ্যবাস আমার পক্ষে শ্রেয়ঃ। এক্ষণে আমাকে আরও বিষয়ের জন্য কোন কথা কহিবেন না। আমি আর্থ্যের আজ্ঞাবহ কিঙ্কর, যদি অনুমতি করেন, তবেই যাবজ্জীবন চরণসেবায় নিযুক্ত থাকিব, নতুবা আর্ঘ্যসমীপে এ জীবন পরিত্যাগ করিব।

ভরতমুখে পিতার মৃত্যুসংবাদ শুনিয়া, রাম হাহাকারশব্দে রোদন করিতে লাগিলেন, এবং বহু বিলাপ ও পরিতাপ করিয়া, পরিশেষে উচ্ছলিত শোকাবেগসংবরণপূর্বক, লক্ষ্মণ ও জানকীর

সহিত পিতৃউদ্দেশে উদক-ক্রিয়া সমাপন করিলেন । অনন্তর, তিনি সাস্তুনাবাক্যে ভরতকে অশেষ প্রকারে বুঝাইয়া করিলেন, ভাই ! তুমি বিবেচক ও বিজ্ঞ, জানিয়া শুনিয়া কেন এমন কথা কহিতেছ ? পাপসংগ্রহ করিয়া রাজ্যভার গ্রহণে ফল কি ? তুমি আমাকে রথ্যা অনুরোধ করিও না । আমার গৃহে গমন করা হইবে না । যাবৎ পিতৃআজ্ঞা পালন করা না হইবে, তত্তাবৎকাল আমি অরণ্যে বাস করিব । চতুর্দশ বৎসর দেখিতে দেখিতে অতিবাহিত হইয়া যাইবে । অতএব কিছুকাল পরেই আমি গৃহে প্রতিগমন করিব । এক্ষণে তুমি অযোধ্যায় গমন করিয়া, রাজকার্য্যে মনোনিবেশ কর, এবং যাহাতে সত্ত্বর রাজ্যে শৃঙ্খল সংস্থাপিত হয়, তদ্বিষয়ে যত্নবান হও । দেখ, পিতৃদেবের মৃত্যু হওয়াতে, প্রজালোক অনাথ হইয়াছে । সুতরাং তোমার আর এক মুহূর্ত্তও এ স্থানে বিলম্ব করা উচিত হয় না ।

বৎস ! তুমি রাজকার্য্যে সদা সৰ্ব্বক্ষণ অবহিত থাকিয়া, যাহাতে প্রকৃতিপুঞ্জের প্রশংসার ও ভক্তির ভাজন হইতে পার, তদ্বিষয়ে বিধিমতে চেষ্টা করিবে । দেখ, রাজ্যশাসন ও প্রজাপালন করা, বড় সহজ ব্যাপার নহে । রাজ্যশাসন করিতে হইলে, অনেকগুলি গুণ কথা আবশ্যিক । অসাধারণ বিদ্যাবুদ্ধি, প্রভূত দয়াদাক্ষিণ্য, অবিচলিত পৈষ্যগাভ্রীর্ষ্য, সমধিক অভিজ্ঞতা প্রভৃতি সদা গুণের একাধার হইতে না পারিলে, প্রকৃতরূপে রাজ্যশাসন হয় না । যাহার উপর যাবতীয় লোকের ধন, প্রাণ, ও মান রক্ষার ভার সমর্পিত হয়, তাহার কৰ্ত্তব্যসাধন করা যে কতদূর কঠিন, বলা যায় না । তিনি যদি তরলপ্রকৃতি, অলস, অধাৰ্থিক, পক্ষপাতী, আমোদপ্রিয়, অজিতেন্দ্রিয় ও দয়াশূন্য হন, তাহা হইলে সে রাজ্যের শ্রেয়ঃ-

সম্ভাবনা কি ? অতএব তুমি অনলস হইয়া, বিবেক ও সহিষ্ণুতাকে অবলম্বন করিয়া, পুত্রবৎ প্রজাপালন করিবে। যখন যে কার্যের আন্দোলন করিতে থাকিবে, পক্ষপাতশূন্যচিত্তে তাহার কৰ্ত্তব্যতা নিরূপণ করিও। অহুরোধপরতন্ত্র হইয়া, অথবা মিত্রবিবেচনায় রাজ-ধর্মের অযথাভূত কার্য কখনই করিও না। ইহা যেন তোমার হৃদয়ে সদা সর্বক্ষণ দেদীপ্যমান থাকে যে, পুত্র যদি রাজনিয়েমের বহিষ্ঠূত কার্য করে, তথাপিও সে রাজার নিকটে দণ্ডার্থ; এবং শত্রুও যদি সংকার্যে প্ররত্ত হয়, তথাপি সে পুরস্কারের পাত্র।

বৎস ! এক্ষণে তুমি কৈশোর অবস্থা অতিক্রম করিয়া যৌবনে পদার্পণ করিয়াছ। যৌবন অতি ভয়ানক কাল। এসময় যদি নির্দোষে ও নিষ্কলঙ্কভাবে যাপন করিতে পারা যায়, তাহা হইলে যাবজ্জীবন আর কোন শিক্ষা থাকে না। যৌবনসমাগমে মানুষের কুপ্ররতি সকল অঙ্কুরিত হইয়া কালপ্রভাবে ক্রমশঃ প্রবল হইয়া উঠে, এবং মূঢ়ব্যক্তিকে অপথে প্রবর্তিত করায়। তখন কৰ্ত্তব্য-কৰ্ত্তব্য-বিবেচনা-শূন্য ও সদসৎ-পরিচিন্তন-শক্তি-বিহীন হইতে হয়। তৎকালে সৎকে অসৎ ও অসমীচীন, এবং অসৎকে সৎ ও সমীচীন বলিয়া প্রতীয়মান হয়। কাম, ক্রোধ, দ্বেষ, হিংসা, গর্ভ, ছুরাশা প্রভৃতি অসদগুণ সমুদয় বলবৎ হইয়া উঠে। ক্রমে ধনগর্ভ আসিয়া উপস্থিত হয়। ধনগর্ভিত পুরুষ মানুষকে মানুষ বলিয়া জ্ঞান করে না। আপ-নাকেই সর্বপ্রধান বিবেচনা করিয়া থাকে। আপনি যাহা বলিব, অন্যায় হইলেও তাহাই যুক্তিসঙ্গত; আপনি যাহা করিব, মন্দ হইলেও তাহাই সর্বাঙ্গসুন্দর। অন্যে যতই কেন ভাল বলুক না, যতই কেন ভাল করুক না, কোন ক্রমেই উহা সমাদৃত বা মনোনীত হয় না। যাহারা মনের মত কথা বলিতে পারে, কেবল তাহাদেরই

বাক্য সৰ্ব্বাপেক্ষা আদরণীয় । ধনবানেরা ঐ সকল অনন্যগতি, বাক্চতুর, প্রিয়ভাষী, চাটুকারদিগকে হিতাকাঙ্ক্ষী, কার্যাজ্ঞ ও সদ-
সদ্বিবেচক বিবেচনা করেন ; এবং উহাদের পরামর্শানু-
সারেই কর্তব্যাকর্তব্য স্থির করিয়া থাকেন । যাহারা মিথ্যাস্তুতিবাদে
অসমর্থ, একরূপ প্রকৃতির লোক, যতই কেন বিবেচক ও পণ্ডিত হউক
না, ঐশ্বর্য্যশালীর নিকট কোনক্রমেই প্রতিষ্ঠালাভ করিতে পারেন
না । ধনবান হইলেই প্রায় আত্মাভিমান, পরনিন্দা, পরদ্বানি, ও
ঔদ্ধত্য প্রভৃতি দোষের প্রাবল্য ঘটে । অর্থই সকল অনর্থের মূল ।
জগতে এমন কোন দুষ্কৰ্ম্ম নাই, যাহা অর্থের নিমিত্ত না হইতে
পারে । তুমি এবমুত্ত যৌবন ও রাজ্য-সম্পত্তির অধিকারী হইলে ।
যৌবনপ্রভাবে অসামান্য-সৎস্বভাব-সম্পন্ন ব্যক্তিরও বুদ্ধিরক্তি কলু-
ষিত হইয়া যায় । অতএব সাবধান ; যেন যৌবনমদে ও বিষয় গর্বে
তোমার মতিভ্রম না জন্মে । দেখে তাই ! তুমি কদাপি পরধনে
লোভ, সজ্জনের মর্যাদাভঙ্গ ও নীচজনের সহিত সংসর্গ করিও না ।
বিপদ পড়িলে অস্থির না হইয়া, ধৈর্য্যাবলম্বন পূর্বক তৎপ্রতীকারে
যত্নবান হইবে । সর্বদা গুরুজনে নম্রতা, পরগুণে প্রীতি দেখাইবে ;
এবং লোকাপবাদে ভয় করিবে । উপসর্পণাকুশল চাটুকারদিগের
শ্রবণমধুর অমূলক স্তুতিবাদে প্রলোভিত হইয়া, কদাপি সাধুবিগর্হিত
লোকাচারবিরুদ্ধ অপথে পাদবিক্ষেপ করিও না । তুমি রাজনীতি-
কুশল । তোমাকে রাজ্যশাসনসম্বন্ধে অধিক কিছু বলিবার আবশ্যক-
কতা দেখিতেছি না । তবে এইমাত্র বলিলেই পর্য্যাপ্ত হইবে, তুমি
একরূপ বিবেচনা পূর্বক সকল কার্য্য সমাধা করিবে, যেন তোমার
শুশাসনগুণে ধরিত্রী অচিরে শৌভাগ্যশালিনী হন । বৎস ! আর
এখানে অধিককাল থাকিবার প্রয়োজন নাই । তুমি সত্বর অযো-

ধ্যায় প্রতিগমন করিয়া, রাজ্যমধ্যে স্ননিয়মসংস্থাপন কর । আমি বলিতেছি, ইহার অন্যথাচরণ কখন করিও না । যদি আমার প্রতি তোমার স্নেহ, ভক্তি ও অনুরাগ থাকে, যদি অগ্রজের বাক্যরক্ষা করা অবশ্য কর্তব্য হয়, যদি তুমি অনুজধর্মপ্রতিপালনে পরাঙ্গু থ না হও ; তবে আর এ বিষয়ে কোন বাদানুবাদ না করিয়া, গৃহে গমন কর ।

ভরত অগ্রজকে অযোধ্যাগমনে একান্ত অনিচ্ছুক দেখিয়া, এবং পাছে আর কোন কথা कहিলে তিনি বিরক্ত হন, এই আশঙ্কায় কোন উত্তর করিতে পারিলেন না । কেবল অধোমুখে মৌনাবলম্বনে অশ্রুবিসর্জন করিতে লাগিলেন । অনন্তর যে পর্য্যন্ত অগ্রজমহাশয় অযোধ্যায় প্রত্যাবর্তন না করেন, তদবধি তাঁহার প্রতিনিধিস্বরূপ থাকিয়া রাজ্যাশাসন করিবেন, এই সিদ্ধান্ত স্থির করিয়া ; তিনি রাম ও জানকীকে ভক্তিভাবে প্রণাম করিলেন । পরে ভ্রাতৃত্বভির অসামান্য প্রমাণস্বরূপ অগ্রজের পাছুকাঁদয় মস্তকে ধারণ করিয়া, অযোধ্যাভিমুখে যাত্রা করিলেন । পথে আসিতে আসিতে সহসা, তাঁহার চিত্তের ভাবান্তর উপস্থিত হইল । অতএব তিনি রামশূন্য অযোধ্যায় না যাইয়া, নন্দীগ্রামে উপস্থিত হইলেন ; এবং তথায় রামপাছুকাঁদয় হিরণ্যসিংহাসনোপরি প্রতিষ্ঠিত করিয়া, মন্ত্রিবর্গের সহিত যথানিয়মে রাজকার্য্য সমাধা করিতে লাগিলেন ।

ভরত প্রস্থান করিলে, তাহার কতিপয়দিবস পরে, লক্ষ্মণ একদা মায়ংসময়ের অভিবাদন করিবার নিমিত্ত রামের নিকট উপস্থিত হইয়া, অভিবাদন পূর্ব্বক कहিলেন, আৰ্য্য ! আমাদিগের আর এখানে অধিককাল থাকা কোন মতেই কর্তব্য নহে । আৰ্য্য ভরতের ভাবগতিক দেখিয়া বিলক্ষণ বোধ হইয়াছে, রাজ্যভার গ্রহণ করা,

তাহার কোন মতেই অভিপ্রেত নহে । অতএব সত্ত্বর এস্থানে হইতে স্থানান্তরে গমন করাই বিধেয় । রাম শুনিয়া হর্ষপ্রকাশপূর্বক কহিলেন, বৎস ! ভাল বলিয়াছ । তোমার দূরদর্শিতা দেখিয়া সন্তুষ্ট হইলাম । প্রাণাধিক ভরতকে যেরূপ কাতর দেখিয়াছি, তাহাতে অশ্রুদাতির বিরহ তাহার পক্ষে দুর্ব্বল হইয়া উঠিবে, সন্দেহ নাই । যাহা হউক, ত্বরায় আমরা একরূপ স্থানে গমন করিব যে, তথায় ভরত আমাদিগকে কিছুতেই অনুসন্ধান করিয়া উঠিতে পারিবে না ।

অনন্তর তাহারা চিত্রকূট পরিত্যাগ করিয়া, অগস্ত্যের তপো-বনাভিমুখে গমন করিলেন । পথে যাইতে যাইতে দূর হইতে অবলোকন করিয়া, জানকী রামকে সম্বোধন পূর্বক জিজ্ঞাসা করিলেন, আর্ঘ্যপুত্র ! সম্মুখে যে গিরিবর দৃষ্ট হইতেছে, উহার নাম কি ? রাম কহিলেন, প্রিয়ে ! ঐ বিষ্ণুাচল । উহার পাদদেশে মহর্ষি অগস্ত্যের আশ্রম । সীতা শুনিয়া পরিহাস পূর্বক কহিলেন, নাথ ! শুনিয়াছি, পূর্বে আপনার চরণরেণুপ্রসাদে সতী অহল্যাদেবী পাষণময়ী মূর্ত্তি পরিত্যাগ করিয়া, মানুষ-দেহ প্রাপ্ত হইয়াছিলেন । আজি আমরা বিষ্ণুাদ্রির নিকট দিয়া গমন করিলে, না জানি আপনার পাদস্পর্শে কত শিলা মানুষরূপ ধারণ করিয়া উঠিবে । রাম ঈষৎ হাস্য করিয়া কহিলেন, অগ্নি পরিহাসচতুরে ! সম্পদে বা বিপদে, প্রবাসে বা আবাসে, গৃহে বা অরণ্যে, সকল সময়ে সকল স্থানে তোমার মধুর বাক্যবিন্যাস কর্ণকুহরে অমৃতবর্ষণ করিয়া থাকে । জানকী হাসিয়া কহিলেন, নাথ ! এই জন্যই আপনাকে সকলে প্রিয়বদ বলে ।

এইরূপ বিবিধ কথাবাতায়ে, দুই দিবস পথে অতিবাহন করিয়া, তাহারা তৃতীয় দিবসে মহর্ষি অগস্ত্যের তপোবন প্রাপ্ত হইলেন ।

আশ্রমে প্রবেশ করিবামাত্রই, পবিত্র তপোবনবায়ু সকলের শ্রান্তি হরণ করিল । অনন্তর তাঁহারা কিছুকাল তথায় পরম সুখে যাপন করিয়া, ক্রমে মহর্ষির প্রযুখাৎ দক্ষিণারণ্য-রত্নাস্ত্র সবিশেষ অবগত হইলেন । তখন মহর্ষির নিকট বিদায় গ্রহণ করিয়া, সকলে দক্ষিণা-রণ্যে প্রবেশ করিলেন ।

কিয়দূর গমন করিলে, আরুণ্যকগণ সুভাবসিদ্ধ সংস্কারবশতঃ তাঁহাদিগকে পূজা করিতে লাগিল । তদ্ব্যে জানকী অঙ্গুলিসঙ্কেত পূর্বক কহিতে লাগিলেন, দেখ নাথ ! আপনাকে সমাগত দেখিয়া, বনস্পতি ছায়া-বিতান, তরুলতা ফলপুষ্প, নিব্বারবারি পানীয়, শ্যামল শম্পপ্রদেশ রত্নাসন, মধুকর বীণার ঝঙ্কার, কোকিল সুললিত গান, উপহারস্বরূপ প্রদান করিয়া, ভবদীয় অভ্যর্থনা করিতেছে । রাম দেখিয়া, হর্ষ প্রকাশ পূর্বক কহিলেন, প্রিয়ে ! অরণ্য-বাস কি সুখজনক ! কতদিন হইল, আমরা রাজধানী পরিত্যাগ করিয়াছি ; কিন্তু এ পর্য্যন্ত একদিনের জন্যেও আমাদিগের অন্তরে অসুখসঞ্চার হয় নাই । ফলতঃ প্রকৃতির ঐশ্বর্য্য ভিন্ন, এরূপ অপার সুখ আর কিছুতেই প্রদান করিতে পারে না ।

এইরূপে তাঁহারা অপূর্ব বিপিনশোভা সন্দর্শন করিতে করিতে, নানা বন, উপবন, প্রাস্তর, তপোবন অতিক্রম করিয়া, পরিশেষে জনস্থান-মধ্যবর্তী স্বভাবসুন্দর শম্পবীথী প্রাপ্ত হইলেন । পথের দুই পার্শ্বে উত্তাল তাল, তমাল, শাল, সরল প্রভৃতি পাদপ সকল শ্রেণীবদ্ধরূপে দণ্ডায়মান রহিয়াছে । সেই পথে কিয়দূর গমন করিয়া দেখিলেন, অদূরে তরঙ্গিণী গোদাবরী, চিত্তপ্রমোদকর প্রত্ন-বনগিরির পাদদেশে, রজতমেথলার ন্যায়, সংলগ্ন হইয়া বক্রভাবে প্রবাহিত হইতেছে । ততীর প্রকট রসাল, বকুল, প্রভৃতি তরুনিচয়

বৃহচ্ছায়া বিস্তার করিয়া, যেন বনদেবতাদিগের সুখসেবার জন্য, অপূৰ্ণ বিশ্রাম-বিতান সুসজ্জীভূত করিয়া রাখিয়াছে । নিরন্তর গোদাবরীর সলিলকণবাহী শীতল সমীরণ মন্দ মন্দ সঞ্চারিত হওয়াতে, ঐ সকল তরুতল চিরপরিষ্কৃত, স্নিগ্ধ ও রমণীয় । স্থানে স্থানে কুসুমবন, কুঞ্জকানন ও লতামণ্ডপ, মধুপানমত্ত মধুকরের গুণ্ গুণ্ রবে এবং মদমত্ত কোকিলবধূর কাকলীশব্দে সতত শব্দায়মান ।

রাম, সেই প্রদেশের আশ্চর্য্য সৌন্দর্য্য অবলোকন করিয়া, সহর্ষে লক্ষ্মণ ও জ্ঞানকীকে কহিলেন, দেখ, এ প্রদেশটি কি মনোরম ! দেখিবামাত্রই আমার নয়নযুগল আর অন্যত্র ঘাইতেছে না । এমন সুন্দর স্থান পরিত্যাগ করিয়া যাওয়া কোনমতেই কর্তব্য নহে । সচরাচর এক্রূপ স্থান পাওয়া দুষ্কর । আমার বিলক্ষণ বোধ হইতেছে, এস্থানে বাস করিলে আমরা সুখে ও নিরুপদ্রবে কালক্ষেপ করিতে পারিব ।

অনন্তর, তাঁহারা পঞ্চবটীতে পর্ণশালা নির্মাণ করিয়া, নিরন্তর মনের সুখে কালযাপন করিতে লাগিলেন ।

সপ্তম পরিচ্ছেদ।



এইরূপে তাঁহারা পঞ্চবটীতে অবস্থান করিতে লাগিলেন। অনন্তর কিছুকাল গত হইলে, একদিন লক্ষ্মাধিপতি রাবণের সহোদরা, মায়াবিনী সূৰ্পনা, বনভ্রমণ করিতে করিতে পঞ্চবটীতে আসিয়া উপস্থিত হইল; এবং রাম ও লক্ষ্মণের অলোকসামান্য রূপলাবণ্য দর্শনে মোহিত হইয়া, প্রথমে রামকে, পরে লক্ষ্মণকে পতিত্বে বরণ করিবার ইচ্ছা প্রকাশ করিল। তদর্শনে লক্ষ্মণ সাতিশয় রোষ-প্রকাশ পূর্বক, তাহার নাসিকাচ্ছেদন করিয়া দিলেন। তাহাতে সূৰ্পনা সাতিশয় অবমানিত ও যৎপরোনাস্তি লাজ্জিত হইয়া, লঙ্কেশ্বরের সমীপে উপস্থিত হইল; এবং স্বকীয় দুর্দশার কারণ আদ্যোপান্ত বর্ণন করিয়া, অধোযুখে অজস্র অশ্রু বিসর্জন করিতে লাগিল।

দশানন, পূর্ব হইতেই তাড়কাস্তকারী সীতাপতির উপর জাত-ক্রোধ ও ঈর্ষান্বিত হইয়াছিলেন, এক্ষণে প্রাণসমা সহোদরার ঈদৃশ লজ্জাকর বিড়ম্বনা অবলোকন করিয়া সাতিশয় ক্ষুব্ধচিত্ত হইলেন, এবং তদীয় মুখে সীতার অনুপমসৌন্দর্য্যভাস্ত শ্রবণ করিয়া, সীতা-হরণরূপ বৈরনির্যাতন করিতে মানস করিলেন। অনন্তর মায়াযুগঙ্ঘ্লে আত্মহরতিসাক্ষিসাধনাথ প্রিয়সহচর তাড়কাতনয় মারীচকে জনস্থানভূত্যাগে প্রেরণ করিয়া, স্বয়ং বিমানে আরোহণ পূর্বক প্রচ্ছন্নবেশে তথায় উপনীত হইলেন।

রাক্ষসপতির অনুমতিক্রমে, তাড়কাতনয় মাতৃবৈরীর প্রতি-

যোগিতাচরণমানসে, হিরণ্ময় মায়ামৃগরূপ ধারণ করিয়া, পঞ্চবটী-পরিসরে আসিয়া উপস্থিত হইল ; এবং রামের পর্ণশালাসমীপে মনোজ্ঞগমনে ইতস্ততঃ সঞ্চরণ করিতে করিতে জানকীর নয়নপথে পতিত হইল । জানকী রামের সহিত একাসনে বসিয়া বিবিধ বিশুদ্ধ-মধুরালাপে কালযাপন করিতেছিলেন ; সহসা অদৃষ্টপূর্ব্ব অত্যাশ্চর্য্য কনককুরঙ্গ নয়নগোচর করিয়া, অঞ্জলিসঙ্কেতপূর্ব্বক প্রিয়পতিকে কহিলেন, আর্য্যপুত্র ! দেখুন, কেমন ঐ সুন্দর মৃগটী গ্রীবাদেশ বক্র করিয়া, দেবদারুতরুতলে গাত্রকণ্ঠয়ন করিতেছে । আমরা এত-কাল বনে বাস করিতেছি, কিন্তু এমন বিচিত্র অভূতান্জ কুরঙ্গ কখন দর্শন করি নাই । আহা ! ইহার বর্ণের জ্যোতি কি মনোরম ! বোধ হইতেছে, যেন ইহার দেহপ্রভায় বনপ্রদেশ আলোকময় হইয়াছে । নাথ ! এপর্য্যন্ত আমি আপনার নিকট কোন প্রার্থনা করি নাই । কিন্তু আমার এক অভিলাষ জন্মিয়াছে, আপনাকে তাহা পূর্ণ করিতে হইবে । রাম কহিলেন, প্রিয়ে ! সর্ব্বদা সর্ব্বপ্রকারে তোমার চিত্তবিনোদন করাই, রামের একমাত্র কার্য্য । অতএব কি অভিলাষ বল, অবিলম্বেই উহা সম্পাদিত হইবে ।

জানকী শুনিয়া, সহর্ষে কহিলেন, নাথ ! যদি আপনি এ দাসীর প্রতি একান্ত অনুকূল হন, তবে রূপা করিয়া ঐ মৃগচর্ম্ম আমাকে আনিয়া দিন । ঐ বিচিত্রচর্ম্মাসনে শয়ন করিতে আমার বড়ই ইচ্ছা হইতেছে । রাম সীতার অভিলাষ শ্রবণে সাত্ত্বিক আত্মাদিত হইয়া, লক্ষ্মণকে সম্বোধন পূর্ব্বক কহিলেন, বৎস ! সর্ব্বদা জানকীর চিত্তসন্তোষার্থ যত্নবান্ হওয়া কর্তব্য । অতএব আমি ঐ মৃগমারণে গমন করিতেছি । তুমি নিরন্তর প্রিয়ার নিকটে থাকিবে । কখন প্রিয়াকে একাকিনী রাখিয়া অন্যত্র গমন করিও না ।

অনন্তর লক্ষ্মণহস্তে সীতারক্ষার ভার সমর্পণ করিয়া, রাম লতাপাশে জটাপটল আবদ্ধ করিয়া, সশস্ত্র গণশালা হইতে নির্গত হইলেন ; এবং কনককুরঞ্জের অনুসরণে প্ররত হইয়া দেখিতে দেখিতে দৃষ্টিপথ অতিক্রম করিলেন । মায়ামৃগও রামচন্দ্রকে অনুবর্তী দেখিয়া, কখন উল্লক্ষণ, কখন তুণভক্ষণ, কখন বা সমীপে আগমন, কখন রক্ষের অন্তরালে গমন, কখন বা স্বদেহলেহন ইত্যাদি প্রকারে ধাবিত হইল । তদর্শনে রাম অতীব কৌতূহলাক্রান্ত হইয়া, চিত্রমৃগ ধরিবার আশয়ে শর নিঃক্ষেপ করিলেন না ; বরং প্রতিক্ষণে এইবার ধরিব, এই ভাবিয়া অনন্যমনে ও অনন্যদৃষ্টিতে মৃগের পশ্চাৎ পশ্চাৎ চলিলেন । মায়ামৃগও আপন ছুরভিসন্ধিসিদ্ধির সুযোগ দেখিয়া প্রতিপদে রামের বিষম ভ্রান্তি জন্মাইতে লাগিল । অবশেষে, রাম মৃগানুসরণে একান্ত আসক্ত হইয়া, নিবিড় কাষ্ঠারে প্রবেশ করিলেন ।

এদিকে জানকী, নাথের প্রত্যাবর্তনে বিলম্ব দেখিয়া, কাতর-স্বরে লক্ষ্মণকে কহিলেন, বৎস ! অনেকক্ষণ হইল, আৰ্য্যপুত্র গিয়াছেন, এখনও আসিতেছেন না কেন ? তিনি ত কখন কোথায় এত বিলম্ব করেন না । আজি তাঁহার বিলম্ব হইবার কারণ কি ? আৰ্য্যপুত্রের বিলম্ব দেখিয়া আমার চিত্ত অতিশয় ব্যাকুল হইতেছে । থাকিয়া থাকিয়া, প্রাণ যেন কাঁদিয়া উঠিতেছে ; সৰ্ব্বশরীর কম্পিত হইতেছে । না জানি, কি সৰ্ব্বনাশই উপস্থিত হইবে । বলি, আৰ্য্যপুত্রের ত কোন অশুভ ঘটনা সংঘটিত হয় নাই ? এ বনে নিশাচরেরা সৰ্ব্বদা আসিয়া থাকে । কেহ ত নাথের কোন প্রকার অত্যাহিতসম্পাদন করে নাই ? দেখ লক্ষ্মণ !

যতই বিলম্ব হইতেছে, ততই যেন আমার চিত্তচাঞ্চল্য ক্রমশঃ
প্রবল হইয়া উঠিতেছে। কিছুতেই সুখবোধ হইতেছে না।
আমার প্রাণের ভিতর যে কি করিতেছে, কিছুই বলিতে পারি
না। একবার ভাবিতেছি, কেনই আৰ্য্যপুত্রকে মৃগচৰ্ম্ম আনিতে
বলিলাম। তিনি যদি এখন আমার নিকটে থাকিতেন, তাহা
হইলে আর আমার একরূপ ভাবনা ও অন্তঃকরণ উপস্থিত হইত না।
আরবার মনে হইতেছে, বুঝি আৰ্য্যপুত্রের সহিত আমার আর
দেখা হইবে না। অতএব আমার দিব্য, তুমি আৰ্য্যপুত্রের অনু-
সন্ধানে প্ররত হও ; এবং দ্বরায় তাঁহার শুভসমাচার আনিয়া
আমার কাতরচিত্তে অমৃতসেচন কর। নতুবা, আর আমি এ
অবস্থায় থাকিতে পারি না। আৰ্য্যপুত্রকে আর একদণ্ড না দেখিতে
পাইলে, আমার প্রাণবিয়োগ হইয়া যাইবে।

লক্ষ্মণ, সীতার তাদৃশী কাতরতা দেখিয়া, তাঁহাকে সান্ত্বনা-
বাক্যে অশেষপ্রকারে বুঝাইয়া কহিলেন, আৰ্য্যো ! আপনি অগ্রজ
মহাশয়ের নির্মিত্ত রথী একরূপ ভাবিত হইবেন না। তাঁহার জন্য
কোন চিন্তা নাই। আমি নিশ্চয় বলিতেছি, এজগতে এমন
বীরপুরুষ নাই যে, আৰ্য্যের ছায়াস্পর্শ করিতেও সমর্থ হয়। অতএব
আপনি নিষ্কারণ উদ্বেগ পরিত্যাগ করিয়া সুস্থচিত্ত হউন।

জানকী শুনিয়া, ঈষৎ কোপপ্রকাশ পূর্বক কহিলেন, লক্ষ্মণ !
তুমি কখন আমার বাক্যের অন্যথাচরণ কর নাই। আজি আমার
একরূপ চিত্তচাঞ্চল্য ও কাতরতা দেখিয়া, তোমার মনে কি কিছুমাত্র
কষ্ট হইতেছে না ? আমি এত করিয়া বলিলাম, একবার আৰ্য্য-
পুত্রের সমাচার আনিয়া দাও : তুমি কি তাহা পারিলে না ?
তোমার আন্তরিক ইচ্ছা কি, বল দেখি ? যদি আমার প্রতি তোমার

ভক্তি ও স্নেহ থাকে, তবে আমি বারংবার বলিতেছি, তুমি সজুর গিয়া আৰ্য্যপুত্রের সংবাদ আনয়ন কর, কখন ইহার অন্যথাচরণ করিও না। লক্ষ্মণ শুনিয়া, ক্ষণকাল সাশ্রনয়নে নিস্তব্ধভাবে রহিলেন। অনন্তর যদিও জানকীকে একাকিনী শূন্যকূটীরে রাখিয়া যাইতে তাঁহার কোন মতেই ইচ্ছা ছিল না, তথাপি কি করেন, আৰ্য্যার তাদৃশ নির্ভীকতাশয় দেখিয়া বিশেষতঃ না যাইলে তিনি যার পর নাই অসুখী ও কুপিত হইবেন, এই কারণে অগত্যা তাঁহাকে পর্ণশালা পরিত্যাগ করিয়া, রামের অন্বেষণে গমন করিতে হইল।

লক্ষ্মণ রামান্বেষণে গমন করিলে, সীতার দক্ষিণলোচন অনবরত স্পন্দিত হইতে লাগিল। তখন জানকী বিষম ভীত হইয়া, মানবদনে কহিতে লাগিলেন, আজি অভাগিনীর অন্তঃকরণ কেন বিষাদ-সাগরে মগ্ন হইতেছে, প্রাণ কেন এমন করিতেছে, হৃদয় কেন কাঁপিতেছে, দশদিক যেন শূন্য বোধ হইতেছে। না জানি, লক্ষ্মণ কি অমঙ্গলের সংবাদ বা আনিয়া দেন। এইরূপ একাকিনী কূটীরাত্যস্তরে বসিয়া চিন্তা করিতেছেন, এমন সময়ে ছদ্মবেশী দশানন তথায় আসিয়া উপস্থিত হইল, এবং ছলক্রমে, দুষ্কৃত্যবান সীতার করগ্রহণ করিয়া, বিমানযানে আরোহণ পূর্ব্বক প্রস্থান করিল।

পতিপ্রাণা সীতা, রাবণহতা হইয়া, দাবদন্ধা মৃগীর ন্যায় একান্ত ভীতা ও যার পর নাই কম্পিতকলেবরা হইলেন; এবং কিয়ৎকাল উন্মত্তের ন্যায় শূন্যনয়নে ইতস্ততঃ দৃষ্টি নিক্ষেপ করিতে লাগিলেন। একে স্ত্রীজাতি স্বভাবতঃ ভীরা, তাহাতে আবার, সীতা সহজশালীন্যভরে কাতরা, সুতরাং তৎকালে তাঁহার হৃদয়ে কি একপ্রকার অভূতপূর্ব্ব ভাবের উদয় হইল, তাহা বলিবার নহে।

জানকী, মণিহার। ফণিনীর ন্যায় বিকম্পিতবেণীবন্ধনে, যূথহার।
 হরিণীর ন্যায় চকিতনয়নে, বারংবার আঘ্যপুঞ্জসম্বোধনে উচ্চৈঃ-
 সুরে রোদন করিতে লাগিলেন । নিব্বারবারিপাতের ন্যায়, অন-
 বরত অশ্রুধারা তাঁহার নয়নযুগল হইতে বিনির্গত হইয়া, গণ্ডস্থল
 স্ফাবিত করিতে লাগিল । অনন্তর, কুমুদিনী যেমন চন্দ্রমাকে
 উষাকালীন ঘনঘটায় সমাচ্ছন্ন দেখিয়া, ভ্রানভাবে আকাশমুখী হইয়া
 থাকে, তদ্রূপ তিনি ক্ষণকাল একদৃষ্টে পতির আশাপথ নিরীক্ষণ
 করিতে লাগিলেন । পরে হা জীবিতেশ্বর ! হা জগদেকবীর ! হা
 রঘুপতে ! আপনি এখন কোথায় রহিয়াছেন, কি করিতেছেন,
 একবার দেখিলেন না । এখানে এক পামর একাকিনী অনাথিনী
 পাইয়া, কুলকামিনীকে অপহরণ করিয়া লইয়া যাইতেছে । নাথ !
 এ আপনার উপেক্ষার সময় নয় । ত্বরায় আসিয়া এ অনাথিনীকে
 রক্ষা করুন । আপনি ভিন্ন আমার আর অন্যগতি নাই । আপনি
 দয়া না করিলে এ অভাগিনীর প্রতি আর কে দয়া প্রকাশ করিবে ?
 অগ্নি ভগবতি বনদেবতে ! মাত বসুন্ধরে ! এ জগতে আমাদের মুখ-
 পানে চায়, এমন আর কাহাকেও দেখি না । এক্ষণে আপনারা
 কৃপা করিয়া অর্ঘ্যপুঞ্জকে একবার সমাচার দিন । এইরূপ বহু
 বিলাপ ও পরিতাপ করিতে করিতে, জানকী মূচ্ছিতা হইলেন ।
 তদীয় মর্ম্মভেদী বিলাপবাক্য শ্রবণ করিয়া, বিয়চ্যারী বিহঙ্গমগণও
 আর্তনাদ করিতে লাগিল । কিন্তু তাহাতে বিনয়বধির দশবদনের
 বজ্রলেপময় হৃদয়ে বিন্দুমাত্র করুণারসের সঞ্চার হইল না । বরং
 তাঁহার তাদৃশী দশা দেখিয়া, দশানন হৃৎকচিতে তাঁহাকে লইয়া
 ত্বরিতগমনে স্বীয় রাজধানীতে উত্তীর্ণ হইল ।

এখানে রামচন্দ্র মায়াযুগ বধ করিয়া, প্রফুল্লাস্তঃকরণে পর্ণশালা-

ভিষুখে আগমন করিতে লাগিলেন। কিয়দূর আসিলে সহসা তাঁহার চিত্তের ভাবান্তর উপস্থিত হইল। তখন তিনি পথের উভয় পার্শ্বে অশুভসূচক ছিন্নি মিত্ত দর্শনে, সাতিশয় শঙ্কিত হইয়া কহিতে লাগিলেন, এমন সময়ে এ আবার কি ? কোথায় প্রিয়ার অভিলাষ পূর্ণ হইল বলিয়া অন্তরে বিপুল সুখসঞ্চার হইবে, না আমার নয়ন-যুগল অশ্রুজলে পরিপূর্ণ হইয়া আসিতেছে ; অনবরত বামাক্ষি স্পন্দিত হইতেছে ; হৃদয় কম্পিত হইতেছে, এবং অন্তঃকরণে কত-প্রকার অশিবভাবের আবির্ভাব হইতেছে। বিধাতার কি মনোরথ এ পর্য্যন্তও সম্পূর্ণ হয় নাই ? আমি রাজ্য, ধন, সুহৃদ, পরিজন, সকল হইতেই বঞ্চিত হইয়া জনশূন্য অরণ্যে বাস করিতেছি, ইহাও কি হতবিধির প্রাণে সহিতেছে না। আবার কি বিপদ ঘটাইবার সংকল্প করিতেছেন। যাহা হউক, অনেকক্ষণ হইল আমি আসিয়াছি, প্রাণাধিক লক্ষ্মণের অথবা প্রাণপ্রিয়া জানকীর ত কোন বিপদ ঘটে নাই। নতুবা আমার চিত্ত কেন এত চঞ্চল হইতেছে ; হৃদয় কেন বিদীর্ণ হইতেছে।

এইরূপ চিন্তা করিতেছেন, এমন সময়ে, রাম দূর হইতে লক্ষ্মণকে দেখিয়া কহিলেন, এই যে লক্ষ্মণ দ্রুতপদে এদিকে আসিতেছে ! তবে বুঝি, প্রিয়ার কোন প্রকার বিপদ ঘটয়া থাকিবে। এই কথা বলিতে বলিতে, অর্দ্ধপথে লক্ষ্মণের সহিত তাঁহার সাক্ষাৎ হইল। তখন রাম কহিলেন, বৎস ! তুমি জানকীকে একাকিনী কুটীরে রাখিয়া কেন আসিলে ? আমি আসিবার সময় তোমাকে ভূয়োভূয় কহিয়াছিলাম, এক মুহূর্ত্তও জানকীর কাছছাড়া হইও না। অতএব তুমি কেন এমন করিলে ? ভাইরে ! বোধ হইতেছে আর আমি আগ্রমে গিয়া, জানকীকে দেখিতে পাইব না। লক্ষ্মণ কহিলেন,

আর্য্য ! অনেকক্ষণ হইল, আপনি মৃগের অন্বেষণে আগমন করিয়াছেন । আপনার বিলম্ব দেখিয়া, আর্য্য্য অত্যন্ত কাতর ও উৎকণ্ঠিত হইয়াছেন । তাঁহার তাদৃশী কাতরতা দেখিতে পারিলাম না । বিশেষতঃ তিনি পুনঃ পুনঃ অনুরোধ করিতে লাগিলেন ; এই হেতু আপনার সংবাদ লইতে এখানে আসিয়াছি । আমি আর্য্য্যাকে কত বুঝাইলাম, কিন্তু তিনি কিছুতেই শুনিলেন না । বরং আমার উপর বিষম কোপ প্রকাশ করিতে লাগিলেন । পাছে গুরুজনের বিরাগ-সংগ্রহ হয়, এই ভয়ে আমাকে অগত্যা আসিতে হইল । আপনি অন্য কিছু মনে করিবেন না । এক্ষণে সত্বর চলুন, আপনার অদর্শনে আর্য্য্যার সাতিশয় কষ্ট হইতেছে । যতই বিলম্ব করিবেন, ততই তাঁহার অসুখ ও চিন্তা বাড়িতে থাকিবে ।

রাম লক্ষ্মণের কথা শুনিয়া, সংশয়িতহৃদয়ে, সত্বরগমনে নিজ-আশ্রমে উপস্থিত হইলেন, দেখিলেন, কুটীর শূন্য । তখন মনে করিলেন, বুঝি জানকী তাঁহার মন পরীক্ষা করিবার নিমিত্ত কুটীরের কোন কোণে গুপ্তভাবে অবস্থান করিতেছেন । অতএব তাঁহাকে না ডাকিয়া, স্বয়ংই অনুসন্ধান করিয়া ইহার প্রতিফল প্রদান করিব ; এই ভাবিয়া, রাম এক, দ্বি, ত্রি, করিয়া, কুটীরের ভাবত অংশ অনু-সন্ধান করিলেন, কিন্তু কোথাও জানকীকে দেখিতে পাইলেন না । সেই কালেই তাঁহার হৃদয়ে নানাপ্রকার অশুভ কল্পনার আবির্ভাব হইতে লাগিল । কিন্তু তিনি আবার ভাবিলেন, বুঝি প্রিয়া কোন কার্য্যান্তরে কুটীরের বাহিরে গিয়া থাকিবেন । অতএব জানকীর নাম ধরিয়া, চঞ্চলনয়নে অব্যক্তস্বরে বারংবার ডাকিতে লাগিলেন ; তথাপি কোন উত্তর পাইলেন না । তখন তিনি একবারে হতাশ হইয়া, হা হতোহস্মি বলিয়া, প্রবলবাতাহত তরুশৃঙ্খের ন্যায় ধরা-

পৃষ্ঠে পতিত ও বিলুণ্ঠিত হইলেন । নয়নযুগল হইতে অনর্গল বাষ্পবারি প্রবলবেগে নির্গত হইতে লাগিল । ঘন ঘন নিঃশ্বাস বহিতে লাগিল ; দশদিক শূন্য ও জগৎ অন্ধকারময় বোধ হইতে লাগিল । তৎকালে তিনি পৃথিবীতলে কি পাতালে, শূন্যমার্গে কি ধরাতলে, লোকালয়ে কি জনশূন্য অরণ্যে, সুখের অবস্থায় কি দুঃখের দশায়, স্বপ্নাবস্থায় কি জাগ্রত অবস্থায় আছেন, কিছুই নিশ্চয় করিতে পারিলেন না । কেবল ভূতাবিষ্টের ন্যায়, চিত্তা-
র্পিতপ্রায়, নিস্পৃভশূন্যনয়নে লক্ষ্মণের বদন নিরীক্ষণ করিতে লাগিলেন ।

কিয়ৎক্ষণ সেই ভাবে থাকিয়া, রাম উন্মত্তের ন্যায় গলদশ্র-
লোচনে কহিতে লাগিলেন, কুটীরের চারিদিকে অন্বেষণ করিলাম,
কিন্তু কোন স্থানে প্রিয়ার পদচিহ্নও দৃষ্ট হইল না । বিবেচনা
করি, এ আমাদিগের সে পর্ণশালা না হইবে । হয়ত, আমি ভ্রাস্তী-
ক্রমে অন্যত্র আসিয়া থাকিব । অথবা, বুঝি আমি সে রামই
নহি । নতুবা এক মুহূর্ত্ত যাঁহাকে না দেখিলে জগৎ শূন্যময় বোধ
হয়, সেই আমি, আজ এতক্ষণ জানকীবিরহ কেমন করিয়া সহ্য
করিতেছি । হা প্রিয়ে সীতে ! হা মহারণ্যবাসপ্রিয়সখি বিদেহ-
রাজনন্দিনি ! হা পতিদেবতে ! হা বামশীলে ! হা রামজীবিতেশ্বর !
পর্ণশালা শূন্য করিয়া তুমি কোথায় গমন করিলে ! তোমার
অদর্শনে দশদিক শূন্য দেখিতেছি । সত্ত্বর আসিয়া, একবার দেখা
দিয়া আমার জীবন রক্ষা কর ; এই বলিয়া মূর্ছাপ্রাপ্ত হইলেন ।

ক্ষণকাল পরে, লক্ষ্মণ অতিষত্রে চৈতন্য সম্পাদন করিলে, রাম
অতিদীর্ঘনিঃশ্বাসভার পরিত্যাগ পূর্ব্বক, ভাইরে ! কি হইল ; আমি
যাহা ভাবিয়াছিলাম, তাহাই ঘটিল । জানকী কোথায় গেলেন ।

কে আমার সর্বনাশ করিল ! আমি ত কখন কাহার অপকার করি নাই । এই বলিয়া তিনি লক্ষ্মণের গলায় ধরিয়া উচ্চৈঃস্বরে রোদন করিয়া লাগিলেন । লক্ষ্মণ কি বলিবেন কি করিবেন, কিছুই স্থির করিতে না পারিয়া, কেবল হতবুদ্ধির ন্যায় নীরব হইয়া রহিলেন, এবং আকুলনয়নে মৌনবদনে অজস্র বাষ্পবারি বিসর্জ্জন করিতে লাগিলেন ।

এইভাবে কিয়ৎকাল অতীত হইলে, রাম ছস্তর শৌকার্ণবে পরিক্ষিপ্ত হইয়া কহিলেন, লক্ষ্মণ ! আমি কি কেবল দুঃখভার ভোগ করিবার নিমিত্তই, পৃথিবীতে জন্মগ্রহণ করিয়াছিলাম ? বিধাতা কি আমার ললাটে বিন্দুমাত্র স্মৃতি লিখেন নাই ? নতুবা দেখ দেখি, একরূপ বিপদ-পরম্পরা কাহার অদৃষ্টে ঘটিয়া থাকে । আমি যদি চিরদুঃখভাগী না হইব, তাহা হইলে উপস্থিত রাজ্যাধিকার-চ্যুত হইয়া, কেন আমাকে অরণ্যে বাস করিতে হইবে ! বনবাসে যে কত ক্লেশ, কত দুঃখ, তাহা তোমার অবিদিত নাই, কিন্তু আমি তাহা একদিনের জন্যও অসুখজনক বিবেচনা করি নাই । পিতৃদেবের লোকান্তর গমন, যার পর নাই শোকজনক ও সন্তাপদায়ক ; কিন্তু আমি সে সব দুঃখ, সে সব সন্তাপ একবারে বিসর্জ্জন দিয়া, এক্ষণে কেবল প্রাণপ্রিয়া জানকীর সহবাসস্বখে কালক্ষেপ করিতে-ছিলাম, ইহাও কি বিধাতা দক্ষচক্ষে দেখিতে পারিল না ! হা হতবিধে ! তোমার অভীষ্ট সিদ্ধ হইল, বলিয়া রাম উচ্চৈঃস্বরে পুনরায় রোদন করিতে লাগিলেন । তাহার রোদনশব্দে বনপ্রদেশ প্রতিধ্বনিত হইতে লাগিল ।

অনন্তর, আর অপেক্ষা করিতে না পারিয়া, রাম সীতার অন্বেষণে পর্ণশালা হইতে নির্গত হইলেন, এবং উন্মত্তের ন্যায় একান্ত

বিকলচিত্ত হইয়া, শূন্যহৃদয়ে বনে বনে ভ্রমণ করিতে লাগিলেন । কি বন্য পশুপক্ষ্যাদি, কি তরুলতা, কি নদ নদী, কি সচেতন কি অচেতন পদার্থ, সম্মুখে যাহাকে দেখিতে পাইলেন, তাহার নিকট কাতরস্বরে জানকীর কথা জিজ্ঞাসা করিতে লাগিলেন । ফলতঃ তৎকালে তিনি সীতালোককে একরূপ আকুল ও উদ্ভ্রান্তচিত্ত হইয়াছিলেন যে, তাঁহার চেতনাচেতন জ্ঞান ছিল না ।

আর্যের তাদৃশী দশা অবলোকন করিয়া লক্ষ্মণ অতিমাত্র বিষাদিত ও ক্ষুব্ধচিত্ত হইয়া, অতি বিনীতভাবে কহিলেন, আর্য্য ! বিপদের সময়ে ভবাদৃশ লোকোত্তরকৰ্ম্মা মহানুভব ব্যক্তির, এ প্রকার শোকমোহে অভিভূত হওয়া কোন ক্রমেই কর্তব্য নহে । আপনি যদি এমন সময়ে একরূপ অধীরতা প্রকাশ করেন, তাহা হইলে জগতে ধৈর্য্য ও গান্ধীর্ঘ্য গুণ একবারে আধারশূন্য হইয়া পড়িবে । সকলে বলিয়া থাকে, আপনার ন্যায় ধৈর্য্য ও গান্ধীরশালী পুরুষ আর দ্বিতীয় নাই । অতএব কেন আপনি তরলপ্রকৃতি প্রাকৃত মনুষ্যের ন্যায়, একরূপ কাতর হইতেছেন । দেখুন, বিপদকালে ধৈর্য্যশালী না হইলে, কখনই তাহা হইতে উত্তীর্ণ হওয়া সম্ভব নহে । আপনাকে যে রূপ কাতরতাবাপন্ন দেখিতেছি, তাহাতে যে আমরা সহজে উপস্থিত বিপদের কোন প্রতিকার করিয়া উঠিতে পারিব, একরূপ বোধ হয় না । অতএব আপনি জানিয়া শুনিয়াও কেন, একরূপ অধিরভাব প্রকাশ করিতেছেন । এক্ষণে আমার অনুরোধ বাক্য রক্ষা করুন, এবং ধৈর্য্যগুণ দ্বারা হৃদয়কে দৃঢ়ীভূত করুন ।

লক্ষ্মণের কথা শুনিয়া, 'রাম ক্রণকাল নিমীলিতনয়নে অধোবদনে মোনাবলম্বন করিয়া রহিলেন । অনন্তর একটি দীর্ঘ নিঃশ্বাস পরিত্যাগ পূর্বক, সাষ্টাঙ্গবদনে কহিলেন, লক্ষ্মণ ! তুমি যাহা বলিলে

সকলই সত্য ; কিন্তু কি করিব, আমার চিত্ত যে কিছুতেই স্থির হইতেছে না । তুমি যদি আমার অন্তরে প্রবেশ করিতে পারিতে, তাহা হইলে জানিতে, আমার প্রাণের ভিতর কেমন করিতেছে । দেখ ভাই ! সেই রেবতটিনী, সেই রম্য বিপিন, সেই কমনীয় কুঞ্জকানন, সেই উন্নত ভূধর, সেই সুচ্ছ সরোবর, সেই গিরিনদী, সকলই পূর্ববৎ নয়নগোচর হইতেছে, কিন্তু আমার প্রাণপ্রিয়া জানকীকে ত কোথায়ও দেখিতে পাইতেছি না । আমি প্রতিকাননে, প্রতিকন্দরে, প্রতিপদে, প্রতিপথে, সর্বত্রই এত তন্ন তন্ন করিয়া অনুসন্ধান করিলাম, কিন্তু কোন স্থানে প্রিয়ার সংবাদও পাওয়া গেল না । বিবেচনা করি, এই সকল অরণ্যবাসীরা ঈর্ষ্যা-প্রযুক্ত জানকীর লোকাতীত সৌন্দর্য্যরাশি অপহরণ করিয়া থাকিবে । নতুবা কেশরীর কটিদেশ, কুসুমের হাস্যচ্ছটা, কুরঙ্গের লোচনযুগল, চম্পকাবলীর কান্তিসার, কোকিলের কণ্ঠস্বর, কমলের সুষমা, মরালের মন্দগতি, কোথা হইতে হইল । ভাইরে ! ইহাদিগকে দেখিয়া, আমার হৃদয়ে জানকীর শোক দারুণরূপে উদ্দীপ্ত হইল । প্রিয়ার সেই মোহনরূপলাবণ্য, সেই অনন্যসাধারণ স্বামিভক্তি, সেই অলৌকিক স্নেহ দয়া ও মমতা সকলই আমার অন্তরে নিরন্তর জাগিয়া রহিয়াছে । আমি সে জানকীকে না দেখিয়া, কেমন করিয়া প্রাণ ধারণ করিব । জানকীবিরহে আমার হৃদয় বিদীর্ণ হইয়া যাইতেছে । হা প্রেয়সি ! তুমি কোথায়, বলিয়া, রাম পুনরায় ভূতলে পতিত ও মূচ্ছিত হইলেন ।

কিয়ৎকাল পরে চেতনাসঞ্চার হইলে, রাম দীর্ঘনিঃশ্বাস পরিত্যাগপূর্ব্বক কহিতে লাগিলেন, আমি যে আশাযুক্তি অবলম্বন করিয়া প্রিয়াকে অন্বেষণ করিলাম, তাহা অতি অসার ও অকৰ্ণ্য । নতুবা

আমি এ পর্য্যন্ত কত স্থানে ভ্রমণ করিলাম, যদি কোন খানেও প্রিয়ার কিছুমাত্র সমাচার পাইতাম, তাহা হইলেও জানিতাম যে, আমার আশা সফল হইবার সম্ভাবনা আছে । কিন্তু এখন আমার পক্ষে সে আশা কেবল ছুরাশা বলিয়া বোধ হইতেছে । আমি কেবল মরীচিকায় ভ্রান্ত হইয়া বৃথা ভ্রমণ করিতেছি । ফলতঃ এ জন্মের মত আমার অদৃষ্টে যে আর জানকীদর্শনলাভ ঘটবে, কখনই বোধ হয় না ।

এই প্রকার আক্ষেপ করিতে করিতে, রাম দুঃসহ শোকানলে দগ্ধ হইয়া, অবিরলধারায় নেত্রবারি বিসর্জন করিতে লাগিলেন । কিয়ৎকাল পরে, তিনি হৃদয়-ফলকে জানকীরূপ চিত্রিত করিয়া, নিস্পন্দভাবে নিমীলিত-লোচনে মনে মনে ক্ষণকাল তদীয়মূর্ত্তি সমালোচনা করিতে লাগিলেন । অনন্তর ঘন ঘন নিঃশ্বাস পরিত্যাগ পূর্ব্বক, একান্ত উদ্ভ্রাস্তচিত্তের ন্যায়, পুনরায় ইতস্ততঃ পরিভ্রমণ করিতে লাগিলেন, এবং আহার নিদ্রা পরিত্যাগ পূর্ব্বক, অহর্নিশ কেবল প্রিয়ার সেই মোহনমূর্ত্তি ধ্যান করতঃ, হায় ! কেনই আমি মায়াযুগের অনুসরণে প্রবৃত্ত হইলাম, কেনই আমার তৎকালে একরূপ দুর্ব্বুদ্ধি উপস্থিত হইল, কেনই আমি জানকীর নিকটে না থাকিলাম, কেনই আমার একরূপ মতিভ্রম হইল ; এক্ষণে কি করি, কি উপায়ে প্রিয়ার দর্শন পাই, ইত্যাদিপ্রকারে কখন আত্মভৎসনা, কখন অনুস্মৃতি, কখন বিলাপ, এইরূপে কালযাপন করিতে লাগিলেন । ফলতঃ তৎকালে তাঁহার সে অবস্থা অবলোকন করিলে, অতিবড়-কঠিন লৌহেরও হৃদয় বিদীর্ণ হয়, পাষাণেরও অন্তর দ্রবীভূত হয় । রাম হস্তগতরাজ্যচ্যুত হইয়া অরণ্যে বাস এবং তমিষকান পিতার মৃত্যু এই হেতু দুর্ব্বিষহ মণ্ডুপীড়াও শোকানল, ক্রমে ক্রমে সহ্য

করিয়াছিলেন ; কিন্তু জানকীবিরহ তাঁহার 'চিত্তকে উচ্ছ্বল করিয়া তুলিয়াছিল । তিনি জানকীর নিমিত্ত সৰ্ব্বত্যাগী হইয়াছিলেন ।

এইরূপ নিষ্করুণভাবে বিলাপ ও পরিতাপ করিতে করিতে, রাম নানা স্থান পর্য্যটন করিয়া, পরিশেষে পম্পাতীরে শ্বাসমাত্রাবশিষ্ট, পক্ষিরাজ জটায়ুকে দেখিতে পাইলেন । জটায়ু রামসমীপে, রাবণ সীতা হরণ করিয়াছে, এইমাত্র বলিয়া দেহ ত্যাগ করিল । রাম শুনিয়া, পূৰ্ব্বাপেক্ষা শোকে ও মোহে অতিমাত্র বিকলচিত্ত ও ব্যথিতহৃদয় হইলেন । তৎকালে তাঁহার শোকমাগর শতগুণে প্রবল হইয়া উঠিল । হৃদয়ের স্মরণস্থি সকল যেন শিথিল হইয়া পড়িল । তখন তিনি কিছুতেই ধৈর্য্যাবলম্বন করিতে না পারিয়া, হা প্রেয়সি ! বলিয়া, শোকসহচরী মূৰ্ছার শরণাপন্ন হইলেন ।

অনন্তর সংজ্ঞালাভ হইলে, রাম সাতিশয় ক্ষুব্ধচিত্ত হইয়া লক্ষ্মণকে সম্বোধন পূর্বক কহিলেন, বৎস ! এতকালের পর জটায়ুঃ-প্রযুখাৎ প্রাণপ্রিয়া জানকীর সংবাদ পাইলাম বটে, কিন্তু ইহাতে আমার অন্তঃকরণে স্নেহের সঞ্চার হওয়া দূরে থাকুক, বরং বিষম বিষাদ ও অনুতাপ জন্মাইতেছে । যদি এই মুহূর্ত্তেই আমার মৃত্যু হইত, তাহা হইলে আমি চরিতার্থ হইতাম । দেখ ভাই ! অন্যে ভার্য্যা অপহরণ করিয়া লইয়াগেল, আমি তাহার কিছুই করিতে পারিলাম না, ইহা অপেক্ষা লজ্জা ও আক্ষেপের বিষয় আর কি আছে ? আমাদিগের পূর্বপুরুষ, বিখ্যাত সগর, যাক্কাতা, ভগীরথ প্রভৃতি নৃপতিগণের কীর্ত্তিকলাপ অদ্যাপিও চিরদীপ্যমান রহিয়াছে ; কিন্তু অধুনা আমাহইতে এই কীর্ত্তি রহিল যে, আমি একমাত্র ভার্য্যা-রক্ষণেও সমর্থ হইলাম না । আমি নিশ্চয়ই বলিতেছি, মধ্যমা জননী যে ভরতকে রাজা করিতে ইচ্ছাপ্রকাশ করিয়াছিলেন, তাহা সন্ধিবে-

চনারই কার্য্য হইয়াছিল । নতুবা যে ব্যক্তি ভাষ্যারক্ষণে অসমর্থ, তাহা দ্বারা রাজ্যরক্ষা কিরূপে সম্ভবে । পিতৃদেব যে আমাকে অরুণ্যে বাস করিতে আদেশ করিয়াছেন, তাহা যুক্তিযুক্তই হইয়াছে । আমার ন্যায় নির্বোধের হস্তে রাজ্য থাকিলে, সে রাজ্যের শ্রী কখনই থাকে না । বস্তুতঃ, যে ব্যক্তি হিরণ্যমৃগের যথার্থতা বিশ্বাস করিয়া, তল্লাভে প্ররত হয়, তাহার পক্ষে বনবাসই শ্রেয়ঃ ।

এইরূপ আত্মভৎসনা করিয়া, তিনি কিয়ৎকাল স্তব্ধভাবে মৌন-বলম্বন করিয়া রহিলেন । অনন্তর, বৈরনির্ঘাতনকম্পনা হৃদয়ে অঙ্কুরিত হওয়াতে সহসাউদ্ভূতরোষভরে দশাননকে উদ্দেশ্য করিয়া কহিতে লাগিলেন, রে পামর, পরদারচোর ! তুই যে অদ্বিতীয় বীরপুরুষ বলিয়া অভিমান করিয়া থাকিস্ ; এই কি তোরা বীরত্ব, এই কি তোরা সাহস ! যে ব্যক্তি ছলক্রমে পরদার অপহরণ করে ; তাহার ন্যায় কাপুরুষ আর কে আছে ? তুই রাক্ষসকূলে জন্মগ্রহণ করিয়াছিস্, কিন্তু তোরা স্বভাব রাক্ষসের অপেক্ষাও অধম । মুগ্ধস্বভাবা, পতিব্রতা, নারীকে অপহরণ করিতে, কি তোরা হৃদয়ে কারুণ্যরসের সঞ্চার হইল না ? রে পামর ! তোকে সমুচিত প্রতিফল না দিলে, আমার এ সম্ভাপ কিছুতেই নিরাকৃত হইবে না ।

রাম এই প্রকারে, দশাননকে বহুবিধ তিরস্কার ও ভৎসনা করিয়া ; কি উপায়ে জানকীর উদ্ধার করিবেন, কেমন করিয়াই বা লঙ্কায় উপস্থিত হইবেন, কি প্রকারেই বা রাবণকে সমুচিত শাস্তি-প্রদান করিবেন, উপস্থিত বিপদে কে তাঁহার সহায়তা করিবে, ইত্যাদি বিষয়ের চিন্তায় অহর্নিশ নিমগ্ন রহিলেন । অনন্তর ঐ বিষয়ের আলোচনা করিতে করিতে, পরিশেষে ঋষামুক পর্ষতে গিয়া উপস্থিত হইলেন । তথায় উপকারবিশেষের অনুষ্ঠান করাতে,

কপীশ্বর স্মৃতিবের সহিত তাঁহার অকৃত্রিম মৌহর্দভাব জন্মিল । বানররাজ সীতার উদ্ধাররূপ প্রত্ন্যপকারে প্রতিশ্রুত হইলেন ; এবং প্রধান প্রধান সেনাপতিদিগকে নিকটে ডাকিয়া, দ্বারায় সমর-সজ্জা করিতে আদেশ দিলেন ।

এই সময়ে, রাবণানুজ বিভীষণ অগ্রজকর্তৃক যৎপরোনাস্তি অবমানিত হইয়া, ঋষামুকে রাগসকাশে সিদ্ধশবরতাপসী শ্রমণাকে পাঠাইয়াছিলেন । শ্রমণা তথায় উপস্থিত হইয়া, যথোচিত ভক্তি-যোগসহকারে রামচন্দ্রচরণে প্রণিপাতপূর্বক নিবেদন করিল, দেব ! মহারাজ বিভীষণ দেবচরণে শরণ লইয়া এই নিবেদন করিয়াছেন, আপনি অনাথের গতি, ধার্মিকের রক্ষক ও দুর্জনের নিয়ন্তা । অতএব অধীনে অভয়দানদ্বারা, স্বীয় মাহাত্ম্যের পরিচয় দিন । এ দাস, অবশ্যকর্তব্য বিবেচনায়, আর্য্য জনকছুহিতার উদ্ধারার্থে মাধ্যানুসারে সহায়তা করিবে । এক্ষণে কি আজ্ঞা হয় । রাম শুনিয়া সবিষ্ময়ে কহিলেন, শ্রমণে ! নিষ্কারণ-প্রিয়কারী প্রিয়সুহৃদ বিভীষণের অভাবিত শীলতা ও স্নেহজনতাগুণে অনুগৃহীত হইলাম । তুমি মহারাজকে আমার প্রিয়সম্ভাষণ অবগত করাইয়া কহিও, তিনি আমার প্রতি যেরূপ অচিস্তনীয় করুণা প্রকাশ করিতেছেন, তাহাতে মহারাজের নিকট আমি চিরবাধিত রহিলাম । শ্রমণা শুনিয়া সহর্ষে তথা হইতে প্রস্থান করিল ।

ক্রমে বর্ষাকাল উপস্থিত হইল । চতুর্দিক ঘোর ঘনঘটায় আচ্ছন্ন হইয়া, অন্ধকারময় দৃষ্ট হইতে লাগিল । তুষাতুর চাতক-বৃন্দ নবীন ঘনাবলী দর্শনে আনন্দিত হইয়া, অব্যস্তনধুরশকল্লে স্তুতিবাদ আরম্ভ করিল । মধ্যে মধ্যে মেঘগর্জ্জন, বিদ্যুৎপাতের স্ফুরণ ও বজ্রপাত । তাহাতে বোধ হইল, যেন প্রলয়কাল উপস্থিত ।

নবজলধরের মধুর শব্দ শুনিয়া, ময়ূরময় রীগণ আনন্দে গিরিতরু-
 শিরে কলাপবিস্তারপূর্বক, নৃত্য করিতে আরম্ভ করিল । বোধ হইল,
 যেন প্রারট্‌কাল মেঘরূপ পটাহে তড়িৎরূপ কনকদণ্ডদ্বারা বাদ্য-
 করত উহাদিগকে তালে তালে নাচাইতেছে । ক্রমে হারবিম্বিষ্ট
 মুক্তাকলাপের ন্যায় বারিবিম্ব পতিত হওয়াতে, ধরাতল হর্ষিত
 হইয়া, যেন প্রতাপকারুক্ষে মৃদংগরূপ সৌগন্ধ বিস্তার করিলেন ।
 ইন্দ্রধনুর উদয় হওয়াতে বোধ হইল, যেন কেলিপরায়ণা বর্ষাবধূর
 হস্তভ্রষ্ট হইয়া অঙ্কভঙ্গ রত্নকঙ্কণ দীপ্তি পাইতে লাগিল । বর্ষাকালে
 নদ, নদী, তড়াগ, পল্লব প্রভৃতি জলে পরিপূর্ণ হইয়াগেল । বর্ষা-
 বারি খেলের ন্যায়, রামের অপকার করিব মনে করিয়াই যেন পথ-
 ঘাট সমুদায় ধাবিত করিল । কোথায় যাতায়াতের আর স্রবিধা
 রহিল না । তখন রাম আক্ষেপ প্রকাশ পূর্বক কহিলেন, এ আবার
 কি আপদ উপস্থিত । বিধাতা কি এখন পর্য্যন্তও আমার প্রতি
 প্রসন্ন হন নাই । যদিও এতকালের পর জানকীর উদ্ধারের উপায়
 হইল, তথাপি হতবিধি এখন পর্য্যন্তও প্রতিকূলাচরণ করিতেছে ।
 অতএব ভানিলাম, বিপদের সময়ে, স্রযোগ পাইলে কেহই অনিষ্ট
 করিতে ক্রটি করে না ।

অনন্তর বর্ষাকাল অপগত হইলে, রাম অসংখ্য বানরসৈন্য
 সমভিব্যাহারে লইয়া, জলনিধি অতিক্রম পূর্বক, লঙ্কায় উপনীত
 হইলেন । বিভীষণ রামকে সমাগত দেখিয়া তাঁহার সহিত মিলিত
 হইয়া, সীতাউদ্ধারের সহায়তা করিতে লাগিলেন । রামরাবণের
 ঘোরতর সংগ্রাম চলিতে লাগিল । তখন জয়লক্ষ্মী কাহাকে
 বরণ করিবেন, কিছুই স্থির করিতে পারিলেন না । কখন রামের
 জয়, রাবণের পরাজয়, কখন রাবণের জয় রামের পরাজয় ইত্যাদি

একারে ক্রমান্বয়ে যুদ্ধ চলিতে লাগিল । অবশেষে, রণপণ্ডিত
রামচন্দ্র, বহুকালব্যাপী যুদ্ধের পর, সবংশে রাবণকে সংহার করিয়া,
লক্ষ্মী অধিকার করিলেন ।

অষ্টম পরিচ্ছেদ।



রাম, লক্ষা অধিকার করিয়া, জ্ঞানকীদর্শনে একান্ত সমুৎসুক হইলেন। তৎকালে তাঁহার অন্তঃকরণে একপ্রকার অনির্বচনীয় ভাবের উদয় হইল। বহুকালের পর প্রিয়ার সহিত সমাগম হইবে, এই ভাবিয়া তাঁহার সর্বশরীর আত্মাদে পুলকিত হইতে লাগিল। যাহার জন্য, তিনি এতকাল পাগলের ন্যায়, বনে বনে কেবল রোদন করিয়া বেড়াইতেছিলেন ; আজ তিনি নয়নের প্রীতিপ্রদায়িনী হইবেন ; এই বলিয়া, তাঁহার চিত্ত নিরন্তর অপূৰ্ণ সুখসাগরে নিমগ্ন হইতে লাগিল। গণ্ডস্থল বহিয়া হর্ষবারি প্রবাহিত হইতে লাগিল। তখন তিনি আনন্দে একান্ত অধীর হইয়া, বিভীষণকে ডাকিয়া কহিলেন, সখে। যাহার নিমিত্ত এত কষ্ট ভোগ করিলাম, এক্ষণে তাঁহাকে দেখাইয়া, আমার চিত্ত চরিতার্থ কর। বিভীষণনিরতিশয় হর্ষপ্রকাশ পূর্বক, তৎক্ষণাৎ জ্ঞানকীকে আনয়নাথ অঞ্জনানন্দনকে সঙ্গে দিয়া অশোকবনে শিবিকাযান প্রেরণ করিলেন।

এখানে পতিপ্রাণা চিরদুঃখিনী জ্ঞানকী, পতিবিরয়োজিতা হইয়া অবধি, দুঃসহ বিরহবেদনা সহ্য করিয়া, পতিচরণে মন প্রাণ সমর্পণ পূর্বক, অহর্নিশ মুদ্রিতনয়নে কেবল তদীয় চরণ-চিন্তায় কালযাপন করিতেছিলেন। নিরন্তর চক্ষুর জলে তাঁহার বক্ষঃস্থল ভাসিয়া যাইতেছিল। তথায় দ্বিজটা নান্দী, ধর্মশীলা এক বর্ষীয়সী রাক্ষসী,

তঁাহাকে যথোচিত স্নেহ ও সমাদর করিত । জানকী যখন শোকে ও মোহে অতিমাত্র ব্যাকুল হইতেন ; তখন ত্রিজটা আসিয়া তঁাহাকে অশেষ প্রকারে বুঝাইয়া, বাহাতে তঁাহার শোকাবেগের লাঘব হয়, তাহার চেষ্টা করিত । জানকী কাহারও সহিত বাক্যালাপ করিতেন না । যখন মনে বড়ই অসুখ হইত, তখন কেবল মনের দুঃখ ত্রিজটার নিকট ব্যক্ত করিয়া, রোদন করিতে থাকিতেন । তিনি একান্ত-পতিগতপ্রাণা ছিলেন ; সুতরাং পতিবিরহে তঁাহার সকল সুখের অবসান হইয়াছিল । অশোককাননে আসিয়া অবধি, তিনি আহার ও নিদ্রা একবারে পরিত্যাগ করিয়াছিলেন । দুঃসহ শোকানল নিরন্তর অন্তর দক্ষ করাতে, তঁাহার অল্পপম রূপলাবণ্যের অনেকাংশে ব্যত্যয়, এবং সর্বশরীর শীর্ণ ও বিবর্ণ হইয়া গিয়াছিল ।

রামচন্দ্র লঙ্কায় উপস্থিত হইয়া, তঁাহার উদ্ধারার্থ যত্ন করিতে-ছেন, এই র্ত্তান্ত জানকী ত্রিজটামুখে পূর্বেই শুনিয়াছিলেন । এক্ষণে বিভীষণপ্রেরিত শিবিকাযান উপস্থিত দেখিয়া, এবং হনুমানমুখে রামের সহিত পুনর্খিলন হইবে, শ্রবণ করিয়া, মনে মনে কহিতে লাগিলেন, আজি আমার একি স্বপ্নাবস্থা, অথবা বাস্তবজাগ্রতাবস্থা । আর্য্যপুত্রের সহিত আমার যে পুনরায় মিলন হইবে, আমি পুনর্বার যে তঁাহার চরণকমল দেখিতে পাইব, ইহা কখন সুপ্নেও উদয় হয় নাই । মনে করিয়াছিলাম, বুঝি এ জন্মের মত আর আর্য্যপুত্রের দর্শনলাভ, আমার অদৃষ্টে ঘটয়া উঠিল না । আজি কি বিধাতা প্রসন্ন হইয়া, অভাগিনীর সমুদায় দুঃখের অবসান করিলেন ? আজি কি আমার সকল শোকের সকল মনস্তাপের তিরোধান হইল ? এই কারণেই কি আমার বাম নয়ন স্পন্দিত হইতেছিল ? আর্য্যপুত্র আমার প্রতি যেরূপ স্নেহ, অনুরাগ ও দয়া প্রকাশ করিয়া থাকেন;

তাহাতে তিনি যে আমাকে ভুলিয়া থাকিবেন না ; ইহা আমি বেশ জানিতাম । কিন্তু আমি যেরূপ মন্দভাগিনী ; তাহাতে আমার দক্ষ অদৃষ্টে আবার যে আৰ্য্যপুত্রের সহবাসমুখ ঘটিবে, ইহা কখনই আশা করিতে পারিতাম না । আহা ! আৰ্য্যপুত্র আমার জন্য কত দুঃখ কত ক্লেশ সহ্য করিয়াছেন । আমি তাঁহার বিরহে যেরূপ কাতর হইয়াছিলাম, তিনিও আমার নিমিত্ত সেইরূপ কাতর হইয়াছিলেন । না জানি, আমার জন্য আৰ্য্যপুত্রকে কত কষ্ট ও কত মনস্তাপই ভোগ করিতে হইয়াছে । আৰ্য্যপুত্র আমার প্রতি যেমন চিরানুকূল, যদি আমাকে পুনরায় নারীজন্ম গ্রহণ করিতে হয়, তবে যেন আৰ্য্যপুত্রের ন্যায় পতিলাভ করি । বস্তুতঃ আৰ্য্যপুত্রের ন্যায় পতি কখন কাহারও হয় না । আমি জন্মান্তরে কত পুণ্যই করিয়াছিলাম, তাহাতেই এরূপ অনুকূলপতি লাভ করিয়াছি ।

এইরূপ বলিতে বলিতে, আনন্দভরে জানকীর লোচনযুগল হইতে অবিরলধারায় হর্ষবারি বিগলিত হইতে লাগিল । অনন্তর, হৃদয়ে অপূৰ্ণ সুখসঞ্চার হওয়াতে, তিনি পুনরায় কহিতে লাগিলেন, আজি আমার কি আনন্দের দিন ! ! এতকাল বিষম বিষাদানলে আমার অন্তর, যে পরিমাণে জ্বলিতেছিল ; এক্ষণে আমার হৃদয়ে আবার সেই পরিমাণে সুখারসের সঞ্চার হইতেছে । আজি আমি আৰ্য্যপুত্রের মুখকমল নিরীক্ষণ করিয়া, চিরসন্তপ্ত হৃদয়কে সুস্থ করিব । আজি তাঁহার সহিত একাসনে বসিয়া অনেক দিনের দুঃখ বর্ণন করিব । আমি আৰ্য্যপুত্রের নিকট উপস্থিত হইলে, তিনি যখন আমাকে দেখিয়া মধুরসম্ভাষণে অভ্যর্থনা করিবেন ; না জানি তখন আমার অন্তরে কি অনির্বচনীয় সুখেরই উদয় হইবে । বোধ হয়, তৎকালে আমি আত্মোদে অস্থির হইব ।

এইরূপ ভাবিতে ভাবিতে, জানকী আহ্লাদে গদ গদ হইয়া, শিবিকাযানে আরোহণ করিলেন ; এবং কিয়ৎকাল বিলম্বে রাম-সকাশে উপনীতা হইলেন ।

রাবণ সীতাকে হরণ করিয়াছে, এই কথা শুনিয়া 'অবধি, যে অতিবিষম লজ্জা ও অনুতাপানলে নিরন্তর রামচন্দ্রের সৰ্ব-শরীর দগ্ধ হইতেছিল, এক্ষণে সমুচিতবৈরনির্যাতনদ্বারা যদিও তাহার অনেকাংশে নিৰ্ব্বাপিত হইয়াছিল ; কিন্তু তাঁহার অন্তর হইতে উহা সম্যক্রূপে অন্তর্হিত হয় নাই । রাম, কতক্ষণে সীতাকে দেখিতে পাইবেন, কতক্ষণে তাহার সহিত সমাগম হইবে, কতক্ষণে প্রিয়ার অমৃতময় কথা শুনিয়া, শ্রোত্র পবিত্র ও চরিতার্থ করিবেন ; এই জন্য একান্ত অস্থির হইয়া, প্রতিমূহূর্তেই সম্পূহনয়নে তাঁহার আগমনের পথ নিরীক্ষণ করিতেছিলেন । এক্ষণে জানকীর শিবিকাযান উপস্থিত দেখিয়া সহসা তাঁহার চিত্তের ভাবান্তর উপস্থিত হইল । তিনি যদিও জানকীকে একান্ত বিশ্বদ্ধাচারিণী ও রামগতপ্রাণা বলিয়া জানিতেন ; এবং জানকীর চরিত্রবিষয়ে যদিও তাহার অনুমান সংশয় ছিল না ; তথাপি তিনি লোকগঞ্জনার ভয় করিয়া, সহসা জানকীপরিগ্রহে সাহসী হইলেন না । সীতা দূরত্বরাবণগৃহে একা-কিনী এতকাল কালযাপন করিলেন, যদি তাঁহার চরিত্রে কোনরূপ দোষ ঘটিয়া থাকে ; কিন্তু রাম উহার কোন অনুসন্ধান না লইয়া অনায়াসেই জানকীকে গ্রহণ করিয়াছেন ; এই বিষয় লইয়া পাছে, উত্তরকালে লোকে তাঁহার নিন্দা করে, এই শঙ্কা রামের হৃদয়ে সমুদিত হইল । স্মরণ্য তিনি কিছুতেই জানকীকে গ্রহণ করিতে পারিলেন না ।

অনন্তর রাম এক নিৰ্জ্জনস্থান আগ্রয় করিয়া, লক্ষ্মণ বিভীষণ ও

শুগ্ৰীবকে ডাকাইয়া পাঠাইলেন । তাঁহারা তথায় উপস্থিত হইলে, রাম বিনয় করিয়া কহিলেন, তোমাদের নিকট আমার এক প্রার্থনা আছে । যদি তোমরা তদ্বিষয়ে কোন আপত্তি উত্থাপন না কর, এবং আমার উপর বিরক্ত না হও ; তাহা হইলে আমি তোমাদিগের সমক্ষে প্রকাশ করিয়া বলি । তাঁহারা একবাক্য হইয়া কহিলেন, আমরা ত কখন আপনার কোন কথায় আপত্তি করি নাই ; অতএব কি বলিবেন, ত্বরায় বলুন ।

তখন, রাম স্থিরচিত্তে কহিলেন, বৎস লক্ষ্মণ ! সখে বিভীষণ ! সখে শূগ্ৰীব ! তোমরা এতকাল যাহার নিমিত্ত দুঃখের ও ক্লেশের পরাকাষ্ঠা ভোগ করিয়াছ, এক্ষণে আমি সেই জানকীর পরিগ্রহে অসম্মত হইতেছি । জানকী বহুকাল রাবণগৃহে অবস্থান করিয়াছেন ; এক্ষণে পরিগ্রহ করিলে, পাছে, কেহ তাঁহার চরিত্রসংক্রান্ত কুৎসা করিয়া আমাকে নিন্দাবাদে দূষিত করে, এই হেতু আমি তাঁহাকে সহসা গ্রহণ করিতে পারিলাম না । যদি তিনি সৰ্ব্বথা আত্মশুদ্ধচারিতার কোন বিশেষ প্রমাণ দর্শাইতে পারেন, তবেই তাঁহাকে গ্রহণ করিব ; নচেৎ, আর তাঁহাকে গ্রহণ করিতে পারিব না । এক্ষণে তোমাদের কি মত, বল ।

তাঁহারা রামচন্দ্রের মুখ হইতে তাদৃশ নিষ্ঠুর বাক্য শ্রবণ করিয়া, বিষম বিষাদসাগরে নিমগ্ন হইলেন ; এবং কিয়ৎকাল বাঙ-নিষ্পত্তি করিতে না পারিয়া, মৌনাবলম্বনে পরস্পরের বদননিরীক্ষণ করিতে লাগিলেন । অনন্তর, লক্ষ্মণ সজলনয়নে কাতরস্বরে কহিলেন, আষ্য ! আপনি যখন যে প্রস্তাব করিয়াছেন, আমরা কখন তাহাতে কোন আপত্তি উত্থাপন অথবা অবজ্ঞাপ্রদর্শন করি নাই ; এবং এক্ষণেও আপনার প্রস্তাবে অনাস্থা প্রদর্শন করিতে

সাহসী নহি। কিন্তু আপনার কথা শুনিয়া আমরা হতবুদ্ধি হইয়াছি। এ বিষয়ে যে কি উত্তর প্রদান করিব, কিছুই ভাবিয়া স্থির করিতে পারিতেছি না। আপনি যে লোকাপবাদের ভয় করিয়া, আখ্যায়িকার পরিগ্রহে অস্বীকৃত হইতেছেন, তাহা কোনরূপে কার্য্যকর নহে। সকলে পূর্ব্ব হইতেই, আখ্যায়িকে যেরূপ তপস্বিনী ও গুহ্যচারিণী বলিয়া জানেন, তাহাতে এক্ষণে যে রাবণভবনে অবস্থান জন্য, তাঁহার চরিত্রবিষয়ে কেহ সন্দেহান হইবে, কখনই বোধ হয় না। আর আপনিও আখ্যায়িকার স্বভাব ও চরিত্র ভালরূপে জানেন, তবে কেন আজি এরূপ অনর্থক আশঙ্কা করিতেছেন? আমি নিশ্চয় বলিতে পারি, যদি আখ্যায়িকার চরিত্রে কখন কলঙ্ক স্পর্শ করে, তাহা হইলে, নারীকূলে পরমপবিত্র পাতিত্রত্যাধর্ম্মের একবারে তিরোধান হইবে। অতএব আপনি এ বিষয়ে সম্যক বিবেচনা করিয়া কর্তব্য নির্দ্ধারণ করুন। আমাদিগের আর মতামত কি? আপনি যাহা অনুমতি করিবেন, আমরা কখন তাহার বিরুদ্ধ কার্য্য করিতে পারিব না।

লক্ষ্মণের কথা শুনিয়া, রাম ক্ষণকাল স্তব্ধভাবে নিরব হইয়া রহিলেন। অনন্তর, দীর্ঘনিঃশ্বাস পরিত্যাগ পূর্ব্বক কহিলেন, ভাই! তুমি যাহাই কেন বলনা, কিন্তু আমি এরূপ অবস্থায়, কিছুতেই জানকীকে গ্রহণ করিতে পারিব না। যদি তিনি সর্ব্বজনসমক্ষে পরীক্ষাবিশেষের অনুষ্ঠান দ্বারা আত্মচরিত্রের বিশুদ্ধতা সপ্রমাণ করিতে পারেন; তাহা হইলে তাঁহাকে গ্রহণ করিতে পারিব। অতএব তুমি গিয়া, জানকীকে এই বিষয় অবগত করাও। আর এক মুহূর্ত্তও বিলম্ব করিও না।

লক্ষ্মণ শুনিয়া রোদন করিতে করিতে তথা হইতে প্রস্থান করিলেন, এবং জানকীর নিকট উপস্থিত হইয়া, অভিবাদনপূর্বক, অতিকাতরভাবে কহিলেন, আর্ষ্য ! আমি অগ্রজের নিদারুণ আজ্ঞা বহন করিয়া, এখানে আগমন করিলাম । কিন্তু কেমন করিয়া তাহা ব্যক্ত করিব, ভাবিয়া, আমার হৃদয় বিদীর্ণ হইয়া যাইতেছে । যদি এই মুহূর্ত্তেই আমার মস্তকে বজ্রাঘাত হইত, তাহা হইলে আমি নিষ্কৃতিলাভ করিতাম । হায় ! কেন আমি এমন কার্য্যের ভার-গ্রহণে সম্মত হইলাম ; এই বলিয়া তিনি অবিরল বাষ্পবারি বিমোচন করিতে লাগিলেন ।

জানকী শিবিকায় আরোহণ করিয়া, যখন রামচন্দ্রের নিকট উপস্থিত হন, তৎকালে পথের উভয়পার্শ্বে অমঙ্গলসূচক দুর্নিমিত্ত দর্শন করিয়া, সাতিশয় শঙ্কিত হইয়াছিলেন । এক্ষণে লক্ষ্মণের একরূপ কাতরতা দেখিয়া, তাঁহার অন্তরে বিষম ভয় ও নানা সংশয় উপস্থিত হইল । অনন্তর রাম কি আদেশ করিয়াছেন, শুনিলে নিমিত্ত একান্ত ব্যাকুল হইয়া কাতরস্বরে জিজ্ঞাসা করিলেন, লক্ষ্মণ ! তুমি কেন এত আকুল হইতেছ ? কেনই বা আপনার অমঙ্গল কামনা করিতেছ ? কি হইয়াছে ? কি জন্য তোমাকে একরূপ কাতর দেখিতেছি ? আর্ষ্যপুত্র কি আদেশ করিয়াছেন, দ্বরায় বল । তোমার কথা শুনিয়া আমার মনে নানা সংশয় উপস্থিত হইতেছে । আমি তোমায় বলিতেছি, তুমি নির্ভয় হইয়া বল । ভালই হউক বা মন্দই হউক, তুমি বলিতে স্মার বিলম্ব করিও না । তুমি যতই বিলম্ব করিবে, ততই আমার উৎকণ্ঠা বাড়িতে থাকিবে । আমি আর একরূপ সংশয়িত অবস্থায় থাকিতে পারিব না ; অতএব দ্বরায় বল ।

তোমার বাক্য শুনিয়া অবধি আমার হৃদয় কাঁপিতেছে । আমার দিব্য, তুমি কোন কথা গোপন করিও না ।

লক্ষ্মণ, আর্থ্যার তাদৃশী ব্যাকুলতা দেখিয়া, স্বীয় বক্তব্যবলিতে বারংবার চেষ্টা করিলেন ; কিন্তু কোন মতেই তাঁহার মুখ হইতে বাক্যানিঃসরণ হইল না । অনন্তর, অপেক্ষাকৃত চিত্তের শৈথিল্য সম্পাদন করিয়া, অঞ্জলিবন্ধন পূর্বক নিবেদন করিলেন, আর্থ্য ! আপনি বহুকাল একাকিনী রাবণগৃহে বাস করিয়াছেন, তন্নিবন্ধন পাছে কেহ আপনার চরিত্রবিষয়ে সন্দিহান হইয়া অপবাদ ঘোষণা করে, এবং এ অবস্থায় আপনাকে গ্রহণ করিলে, ভবিষ্যতে পাছে আর্থ্য-কেও নিন্দাবাদে দূষিত করে ; এই আশঙ্কায়, তিনি কোনরূপেই আপনার পরিগ্রহে সম্মত হইতেছেন না । এক্ষণে বলিয়াছেন, যদি আপনি সর্বজনসমক্ষে কোন বিশেষ পরীক্ষা দ্বারা, আত্মচরিত্রের সম্পূর্ণ বিশুদ্ধতা সপ্রমাণ করিতে পারেন, তাহা হইলে তিনি আপনাকে গ্রহণ করিবেন ; নচেৎ কিছুতেই গ্রহণ করিবেন না । আর্থ্য ! আমার অপরাধ মার্জনা করুন । আমি যতদূর জানি, তাহাতে আপনার চরিত্রবিষয়ে আমার কিছুমাত্র সন্দেহ নাই । কিন্তু অগ্রজের হৃদয়ে কেন এরূপ সংশয় উপস্থিত হইল, বলিতে পারি না । হায় ! পরায়ত্ত জীবন কি কষ্টকর । আমি অগ্রজের আজ্ঞাবহ হইয়া, অতিবড়নিষ্ঠুরের ন্যায়, এরূপ সর্বনাশের কথা আর্থ্যার কর্ণগোচর করিলাম । আমার ন্যায় নিষ্ঠুর ও কঠিনহৃদয় আর কে আছে ? এই বলিয়া, লক্ষ্মণ ভূতলে পতিত ও মূর্ছিত হইলেন ।

জানকী লক্ষ্মণের কথা শুনিয়া, ক্ষণকাল জড়প্রায় হইয়া রহিলেন । অনন্তর একান্ত কম্পিতকলেবর হইয়া, হায় ! আমার অদৃষ্টে

কি এইছিল, বলিয়া মুচ্ছিত হইলেন । কিয়ৎকাল পরে, লক্ষ্মণ চৈতন্য লাভ করিয়া, অতিথিতে জানকীর মুচ্ছাপনোদন করিয়া দিলেন । তখন জানকী সংজ্ঞাপ্রাপ্ত হইয়া, অধোবদনে মৌনাবলম্বন করিয়া রহিলেন । পরে দীর্ঘনিঃশ্বাস পরিত্যাগ পূর্বক, সাশ্রুনেত্রনেত্র-বদনে কহিলেন, লক্ষ্মণ ! তোমার দোষ কি ? সকলই আমার অদৃষ্টের দোষ । আমি যদি চিরদুঃখিনী না হইব, তাহা হইলে কেন আমাকে দুর্ভাগ্য রাবণগৃহে বাস করিতে হইবে ? কেনই বা আৰ্য্যপুত্রের হৃদয়ে এরূপ অমূলক সংশয় উপস্থিত হইবে ? মনে করিয়াছিলাম, বিধাতা বুঝি, আমার সকল দুঃখের অবসান করিলেন । কিন্তু আমি যেরূপ মন্দভাগিনী, তাহাতে আমার অদৃষ্টে সুখ কোথায় ? জানিলাম, এবার কেবল দুঃখভোগের জন্যই আমার জন্মগ্রহণ হইয়াছিল ! আমি এ বিষয়ে এক মুহূর্তের নিমিত্তও আৰ্য্যপুত্রকে দোষ দিতে পারি না । সকলই আমার ললাটের লিখন । আমার উপর আৰ্য্যপুত্রের যে দয়া ও মমতা আছে, তাহা আমি বেশ জানি । কিন্তু তিনি কি করিবেন, তাহার হৃদয়ে যে সংশয় জন্মিয়াছে, তাহা হইতেই পারে । তিনি যে আমাকে গ্রহণ করিতেছেন না, তাহা ভাল বই মন্দ নহে । যদি বারাস্তরে নারীজন্ম গ্রহণ করিতে হয় ; তাহা হইলে, যেন আৰ্য্যপুত্রের ন্যায় পতি ও তোমার ন্যায় গুণের দেবর পাই । বৎস ! আর বিলম্ব করিও না, এক্ষণে অগ্নি প্রজ্জ্বলিত করিয়া দাও । আমি উহাতে প্রবেশ করিয়া সকল ক্ষোভের সকল দুঃখের অবসান করিব । আমার আর পৃথিবীতে এক মুহূর্তও এরূপ অবস্থায় থাকিতে ইচ্ছা নাই ।

এইরূপ বলিতে বলিতে জানকীর নয়ন-সরোবর উচ্ছলিত হইয়া

অবিলম্বধারায় বাষ্পবারি বিগলিত হইতে লাগিল । তদৃষ্টে লক্ষ্মণ একান্ত অধীর হইয়া, কেবল অশ্রু বিমোচন করিতে লাগিলেন । এই ভাবে, কিয়ৎক্ষণ অতীত হইলে, জানকী অপেক্ষাকৃত চিত্তের ঈশ্বর্য্য সম্পাদন করিয়া, কহিলেন, বৎস ! আর কেন অনর্থক বিলম্ব করিতেছ, শীঘ্র অগ্নি জ্বালিয়া দাও । আমার অন্তরে বড়ই কষ্ট হইতেছে । অধিক কি, আমার আর এক মূহূর্ত্তও যুথ দেখাইতে ইচ্ছা হইতেছে না । আমার দিব্য, তুমি ভুরায় অগ্নি জ্বালিয়া দাও ! আমি প্রজ্জ্বলিতঅনলে প্রবেশ করিয়া, সকল মনস্তাপ বিসর্জন করি ।

জানকীর তাদৃশী অস্থিরতা দেখিয়া, লক্ষ্মণ সাতিশয় কাতর ও ব্যাকুল হইলেন ; এবং কেমন করিয়াই বা সহসা অগ্নি প্রস্তুত করিয়া দিবেন, তাবিতে লাগিলেন । অনন্তর অতিবড়নিষ্ঠুরের কার্য্য হইলেও, পরিশেষে, তিনি রোদন করিতে করিতে অগত্যা অগ্নি প্রজ্জ্বলিত করিয়া দিলেন । কৃশানু গগনতল স্পর্শ করিবার নিমিত্তই যেন, প্রবলজ্বালাসহকারে জ্বলিয়া উঠিল । তখন জানকী স্থিরচিত্তে, সমবেত সর্ব্বজনকে সাক্ষী করিয়া, উহাতে প্রবেশ করিলেন । সকলে হাহাকার করিয়া, রোদন করিতে লাগিল । লক্ষ্মণ ধূলায় লুণ্ঠিত হইয়া, হায় ! কি হইল, বলিয়া বিলাপ করিতে লাগিলেন । স্ত্রীগ্রীব, বিভীষণ প্রভৃতি তাবত লোকেই, হা দেবি ! কোথায় যাইতেছ, বলিয়া দীনভাবে ক্রন্দন করিতে লাগিলেন । এই সকল দেখিয়া, রাম আর নির্জনস্থানে থাকিতে না পারিয়া, হায় ! কি করিলাম, বলিয়া তথায় উপস্থিত হইলেন, এবং অধীরভাবে রোদন ও বিলাপ করিতে লাগিলেন ।

অনন্তর যথাকালে অগ্নি নির্ঝাণ হইলে, সকলে দেখিলেন,

জানকী জীবিত আছেন । তাঁহার শরীর কিছুমাত্র বিকৃত হয় নাই ; এবং অনলতাপে রূপলাবণ্যেরও কোনরূপ ব্যতিক্রম ঘটে নাই । তাহা দেখিয়া, সকলের হৃদয়ে অভূতপূর্ব বিস্ময়রসের সঞ্চার হইল ; এবং জানকী যে সম্পূর্ণ বিশুদ্ধচারিণী, তদ্বিষয়ে আর কাহারও সংশয় রহিল না ।

জানকী অগ্নিশুদ্ধ হইয়া পতিপরায়ণতাগুণের পরাকাষ্ঠা প্রদর্শন করিলে, তাঁহার পরিগ্রহবিষয়ে রাম একবারে মুক্তসংশয় হইলেন । তখন যুগপৎ লজ্জা ও হর্ষ আসিয়া তাঁহার অন্তঃকরণে সমুদিত হইল । তিনি সীতাকে শুদ্ধচারিণী জানিয়াও যে, তাঁহার পরিগ্রহে সম্মত হন নাই, এই জন্য তাঁহার লজ্জা, আর জানকী সকললোকের সমক্ষে অলিতদহনে প্রবেশ করিয়া, আত্মশুদ্ধচারিতার বিশেষ নিদর্শন প্রদর্শন করিয়াছেন, এই নিমিত্ত হর্ষ উপস্থিত হইল । তখন তিনি আর অপেক্ষা করিতে না পারিয়া, প্রেয়সি ! আমার অপরাধ মার্জনা কর, বলিয়া জানকীর নিকট উপস্থিত হইলেন । সীতা অভিমানভরে বদন অবনত করিয়া রহিলেন । উভয়ের নয়নযুগল হইতে একপ্রকার অপূর্ব অশ্রুধারা বিগলিত হইতে লাগিল । কিছুকাল সেই ভাবে থাকিয়া, রাম প্রয়ণপূর্ণ বচনে কহিলেন, প্রিয়ে ! আর আমাকে যাতনা দেওয়া তোমার উচিত হয় না । এক্ষণে কথা কহিয়া আমার চিত্তচকোর চরিতার্থ কর । জানকী আর থাকিতে পারিলেন না । তখন উভয়ের মধুরালাপ হইতে লাগিল ।

রাম জানকীকে গ্রহণ করিলেন, দেখিয়া সকলের আনন্দের সীমা রহিল না । লক্ষ্মণ, বিভীষণ, সুগ্রীব, এবং প্রধান প্রধান সেনাপতি-

গণ, আত্মলাভে পুলকিত হইয়া প্রগাঢ়ভক্তিসহকারে জানকীর চরণে অভিবাদন করিলেন ; কহিলেন, আৰ্য্যো! এত দিনের পর, আমাদিগের সকল দুঃখ, সকল ক্ষোভ তিরোহিত হইল । জানকী যথোচিত সম্মেহসম্ভাষণ করিয়া বলিলেন, বৎসগণ! তোমাদিগের কৃপায় আমি আৰ্য্যপুত্রের সহিত পুনর্নির্মিত হইলাম । অতএব কায়মনোবাক্যে প্রার্থনা করি, তোমরা মনের সুখে কালযাপন কর ।

তদনন্তর, রাম বিভীষণকে লঙ্কার রাজপদে প্রতিষ্ঠিত করিয়া, এবং প্রিয়শ্রুত শ্রুগ্ৰীব ও অন্যান্য সমরসহায় সকলের নিকট বিদায় গ্রহণ পূর্বক, জানকী ও লক্ষ্মণের সহিত বিমানযানে আরোহণ করিয়া অযোধ্যাভিমুখে যাত্রা করিলেন । যথাকালে তাঁহারা অযোধ্যায় উপস্থিত হইলে, সকলে আনন্দকোলাহল করিতে লাগিল । কৌশল্যা পুত্রবিরহে ত্রিয়মাণা হইয়াছিলেন ; এক্ষণে রামের আগমনসংবাদ শুনিয়া উন্মাদিনীর ন্যায়, দৌড়াদৌড়ি তথায় আসিয়া উপস্থিত হইলেন ; এবং “রাম ফিরিয়া আসিলি রে” বলিয়া তাঁহাকে ক্রোড়ে লইয়া মুখচুষন পূর্বক হর্ষবারি বিসর্জন করিতে লাগিলেন । রামের জন্য তাঁহার হৃদয় যে নিরন্তর জ্বলিত হইতেছিল, এক্ষণে হারাধনকে ক্রোড়ে পাইয়া, তাহা সম্যক্রূপে নির্দীপিত হইল ।

রামের পুনরাগত, অযোধ্যানগরে পূর্ববৎ উৎসবক্রিয়া আরম্ভ হইল । অনন্তর, গুরিক, বিজনপদবাসী, তাবত প্রজাবর্গই অতিমাত্র হর্ষিত হইয়া, রামচন্দ্র রাজপদ গ্রহণ করিয়া আমাদিগকে প্রতিপালন করুন, এই অভিপ্রায় প্রকাশ করিল । রামচন্দ্র অনেক ভাবিয়া, পরিশেষে তাঁহাদের কথায় সম্মত হইলেন ।

তদন্তর বশিষ্ঠ, বামদেব, বিশ্বামিত্র, জাবালি, কাশ্যপ প্রভৃতি মহর্ষিগণ, অযোধ্যায় উপস্থিত হইয়া, রামের অভিষেক সমাধা

করিলেন । রাম সস্ত্রীক রাজ্যে অভিষিক্ত হইয়া, অপত্যনির্বিশেষে
প্রজাপালন এবং জনকছুহিতার সহবাসে মনের সুখে কালযাপন
করিতে লাগিলেন ।

Amulet

Amulet of Lord Krishna

